



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>





600043660P


13.183.13.1.





E. BIBL. RADCL.


84.2.24

2645









ROBERTI WELSTED

D E

Medicina Mentis

L I B E R.



L O N D I N I,

Impensis J. WALTHOE, ex adverso Ex-
cambij Regalis, in Cornhill. MDCCXXVI.





REGI.



T hujusce generis
tentamen MAJES-
TATI TUÆ, RE-
GUM OPTIME,
dicarem, argumen-
ti dignitas utilissimi, ac perpetua
Principum maximorum erga me-
dendi artem ipsiusque cultores
gratia eò usque animum appule-
runt. Humana siquidem mens

primos naturæ honores occupat ;
 quâ nihil majus generatur, &
 citra quam ea, quæ genita sunt,
 nullius ferè momenti æstimantur.
 Sapiëntiæ ipsamet fons & princi-
 pium est, non illius modò, quæ
 urbes condidit, vitámque ornat
 civilem, verùm etiam quæ civita-
 tes gubernat ac servat, nec in pa-
 cis minùs officijs, quàm belli mu-
 neribus elucet. Eâdem etiam ori-
 gine natum est crevítque tempera-
 tum illud & æquabile imperij
 genus, ob salubrem tum quæ ad
 Regem cum quæ ad cives pru-
 dentiam pertinet celeberrimum ;
 quo fretus incitatusque populus
 ille magnus sese privatim excolit,
 communémque industriam ad præ-
 clara

clara sibi posterisque præstanda
 Auspicijs Turs feliciter dirigit:
 Dum unius ad instar familiæ Bri-
 tannia exitiosæ sibi contentionis
 oblita, PATRI obtemperare æmu-
 latione piâ gestit, atque IPSI pa-
 riter dilectos liberorum ritu sub-
 ditos amplissimâ animi munificen-
 tiâ complecti, & singulorum e-
 molumentis consulere summâ cum
 benignitate suave est. Ea Princi-
 pes optimos trahit voluptas, cujus
 illecebris curæ pectora eorum agi-
 tantes deliniuntur. Tanta qui-
 dem grati agnoscimus; & quid-
 nî fas sit ex ijsdem fausta, magni-
 fica omnique laude cumulanda,
 qualia majores non nôrunt, ætâs-
 que hominum, qui nunc sunt,
 nondum

nondum vidit, Britannis augurari?
 Prout felicitatis, quâ jam fruimur,
 præfagia olim animos eorum,
 quotquot in patriam pij extite-
 runt, charissimâ expectatione ob-
 lectabant. Interea nemini ingen-
 tia quantumvis commoda patriæ,
 gaudiâque sincerè fluentia potiri
 licet, qui mentis æquè ac cor-
 poris sanitate careat. Consilium
 proinde lustrandi mentem ægram
 atque infirmam, uti etiam conva-
 lescentem & integritati restitutam
 emanavit. Ac dein, quatenus co-
 pia illud exequendi inter labores
 medicos facta fuit, operæ pretium
 videbatur ea colligere, atque in
 ordinem juxta naturæ institutum
 redigere, quæ observata essent.

Hæc

(7)

Hæc jam literis tradita ut non tam
parva habeantur, quin MAJESTAS
TUA recipiat, ac splendore benignè
iisdem collucentis Patrocini
cohonestet, optare liceat subdito,
quo alter non est TIBI de-
vinctor,

Roberto Welsted.



CHAMBER OF COMMERCE



CHAMBER OF COMMERCE



Argumenta Capitulorum.

P R Æ F A T I O N I S

Sect.		Pag.
1	N obilissima ac utilissima pars Medicinae.	i
2	Modus Medicinae.	iiij
3	Methodi index.	ibid.
4	Ratio tradendi.	iv
5	Valetudo mentis secunda vel adversa dignoscenda.	vj
6	Valetudo mentis ac corporis se mutuo afficiunt.	vij
7	Ex poetis, philosophis, & historicis varia huc transferuntur.	ibid.
8	Educatio huc spectat.	viiij
9	Morbi mentis ac corporis intertexti.	ix
10	Mentis humanæ cum aliorum animan- tium facultatibus collatio.	ibid.
11	Discrimen in parte animi inferiori non fitum est.	x
12	Brutorum interiora à se invicem dis- crepant æquè ac ab eorum nonnullis humana.	xij
	2	13 Dis-

EXHIBIT 10



EXHIBIT 11

Argumenta Capitum.

Sect.		Pag.
13	<i>Discrimen eorum ratio.</i>	xij
14	<i>Quatenus hanc participant dignoscere medici est.</i>	xiiij
15	<i>Distributio affectuum secundum facultates.</i>	xiv
16	<i>Morborum nervorum discriminatio.</i>	ibid.
17	<i>Scribendi causæ.</i>	xv

CAP. I. *Mentis natura.* I

1	Ratio distribuendi facultates.	ibid.
2	Affectus varij corporis & mentis.	2
3	Secunda corporis valetudo menti sæpe incommoda.	3
4	Dolor non semper menti incommodus.	5
5	Sedes sensûs & modi diversi.	6
6	Mentis facultates, sensus simplex, judex, memoria earumque dotes.	ibid.
7	Imaginationis usus & dotes.	7
8	Discendi modus.	8
9	Obsequium facultatum imperatrici.	10
10	Diversitas ex vario sensu vel præ-occupatione.	11
11	Mentis optima conditio.	ibid.

CAP. II. *De valetudine ubi mens præcipue corpori imperat.* 13

1	Valetudo non firmissima.	ibid.
2	In quali corpore.	ibid.
3	Valetudo menti commodissima.	14
4	In-	In-

Argumenta Capitum.

Sect.		Pag.
4	<i>Infensa pituita.</i>	14
5	<i>Item malus habitus.</i>	15
6	<i>Commoda alacritas temperata.</i>	ibid.
7	<i>Quâ ratione commodi animi affectus, & negotia.</i>	ibid.
8	<i>Valetudo continua vel interrupta.</i>	16
9	<i>Continua rarior.</i>	ibid.
10	<i>Interrupta frequentior.</i>	17
11	<i>Indoles præstantior.</i>	ibid.
12	<i>Res adversæ commodæ.</i>	18
13	<i>Exempla Ajacis & Ulyssis.</i>	19
14	<i>Exemplum Alexandri.</i>	20
15	<i>Aliud oppositum.</i>	ibid.

CAP. III. *De organis quibus mens corpori imperat.* 22

1	Nervorum systema,	ibid.
2	<i>Qui primaria sunt organa.</i>	23
3	<i>Eorum affectus morbos ceteros imi- tantur.</i>	24
4	<i>Sensus partium varius.</i>	25
5	<i>Sedes organorum variæ.</i>	ibid.
6	<i>Distributio eorum ex genere,</i>	ibid.
7	<i>Et modo;</i>	26
8	<i>Ex usu;</i>	ibid.
9	<i>Ex situ.</i>	27
10	<i>Contrarius sensus iisdem organis, & aliorum alijs.</i>	ibid.
11	<i>Ratio aversationis.</i>	28
2 2		12 Lucta

Argumenta Capitulum.

Sect.	Pag.
12 <i>Lueta sensuum contrariorum.</i>	29
13 <i>Ejus remedium educatio.</i>	30

CAP. IV. *De varia organorum mentis conditione.* 31

1 <i>Organorum triplex conditio.</i>	ibid.
2 <i>Indolentia,</i>	32
3 <i>Paucis contingens diversa à felici tranquillitate.</i>	ibid.
4 <i>Voluptas periculosa.</i>	33
5 <i>Ufus ejus commodus.</i>	34
6 <i>Repentè transit in dolorem.</i>	ibid.
7 <i>Conditio diversa prout natura fert voluptatem & dolorem.</i>	35
8 <i>Quare voluptas minùs sincera est.</i>	36
9 <i>Exemplum mero continuantis voluptatem.</i>	ibid.
10 <i>Quí voluptas animi commoda fiat.</i>	37
11 <i>Quâ ratione corpus voluptates animi commodè ferat.</i>	38
12 <i>Exercitatio mentis commoda.</i>	40

CAP. V. *De voluptate.* 43

1 <i>Voluptas ætatis cujusque,</i>	ibid.
2 <i>Et temperamenti ;</i>	ibid.
3 <i>Infantiæ primæ.</i>	44
4 <i>Causæ ejusdem.</i>	ibid.
5 <i>Proximæ ætatis.</i>	45
6 <i>Puerilis.</i>	ibid.
7 <i>Quales</i>	

Argumenta Capitulorum.

Sect.		Pag.
7	<i>Quales tunc temporis panduntur dotes & voluptatum fontes.</i>	46
8	<i>Eorum summa.</i>	48
9	<i>Adolescentiæ dotes & natæ inde vo- luptates.</i>	49
10	<i>Amor eique subordinatæ voluptates.</i>	50
11	<i>Amor complurium causa.</i>	51
12	<i>Voluptates ab amore pendentes.</i>	52
13	<i>Amore mundus continetur ex mente veterum; ejusque potestas.</i>	53
14	<i>Honor ei conjunctus.</i>	54
15	<i>Quomodo voluptatum commoda de- cerpenda.</i>	55
16	<i>Voluptas seræ ætatis.</i>	56
17	<i>Illustratur exemplo Socratis.</i>	57
18	<i>Qui & in Prytaneo locum sibi debi- tum censebat.</i>	58
19	<i>Ratio ejusdem.</i>	59
C A P. VI. De Dolor.		61
1	<i>Qualis & quotuplex dolor.</i>	ibid.
2	<i>Sedes diffusa per universum,</i>	62
3	<i>Vel partes.</i>	ibid.
4	<i>Intra latos vel angustos cancellos.</i>	63
5	<i>In nobilibus vel minoris momenti par- tibus.</i>	ibid.
6	<i>Fabrica sedis.</i>	ibid.
7	<i>Ex sede dignoscuntur dolores animi & corporis.</i>	64
8	<i>Ut & dolores singulares.</i>	ibid.
9	<i>Defectus mentis.</i>	65
a 3		10 Do-

Argumenta Capitum.

Sect.	Pag.
10 Dolores erratici.	65
11 Doloris genus ex sede varium.	66
12 Doloris genus.	ibid.
13 Secundum sentiendi modum,	ibid.
14 Et originem.	67
15 Doloris gradus.	ibid.

CAP. VII. *Quæ menti bona augent aut minuunt.* 69

1 Qualibus opus est ad ritè sentiendum.	ibid.
2 Quali ratione sensus imminuitur.	70
3 Sensus augetur dolore & voluptate.	71
4 Dolor ex inediâ acutum & asperum reddit.	ibid.
5 Exemplum Epiçteti & Stoicorum.	72
6 Acies inde non subtilis.	73
7 Exempla Aristotelis & Horatij.	74
8 Desideria naturalia & acquisita acuumt.	75
9 Quomodo æmulatio acuit.	76
10 Sanguine puro opus est.	78
11 Cæli aërisque temperies, solique sa- lubritas.	ibid.
12 Collatio eorum cum egestate.	79
13 Et Libertatis cum Servitio.	ibid.
14 Vis mentis promovetur educatione.	80

CAP. VIII. *De Educatione.* 81

1 Discriminatio bonorum à malis.	ibid.
2 Educatio diversa pro vitæ genere,	82
3 Sylvestris,	ibid.
4 Urbana	

Argumenta Capitum.

Sect.	Pag.
4 Urbana,	83
5 Militaris.	84
6 Exempla Fasonis & Cyri.	85
7 Officium educantis.	90

CAP. IX. *De percipiendi facultate.* 92

1 Mutatio quævis in percipiendi modo notanda,	ibid.
2 Malum interdum fortiùs percipere æquè ac torpidiùs.	93
3 Diversitas juxta subtilitatem vel celeritatem.	94
4 Nec ab his alius est plenior conceptus.	95
5 Vitium stupor.	ibid.
6 Qualis is est.	98
7 Subtilitatis defectus.	99
8 Defectus celeritatis.	100
9 Celeritas nimia.	101
10 Perceptio eorum quæ extra vel intra mentem fiant.	102
11 Erratum in ijs, quæ intra mentem fiunt.	103
12 Quæ affectùs vim denotant.	104

CAP. X. *De Memoria.* 106

1 Memoriae conditio in ætatibus singulis.	ibid.
2 Attentio & apprehensio ad recordandum utiles.	107
3 Et exercitatio.	108

Argumenta Capitulum.

Sect.		Pag.
4	<i>Angustia memoriæ.</i>	108
5	<i>Memoria juniorum, maturorum.</i>	ibid.
6	<i>Ipsius integritas,</i>	109
7	<i>Vigor.</i>	ibid.
8	<i>Memoria senilis.</i>	110
9	<i>Amor & Ira ad reminiscendum conducunt.</i>	111
10	<i>Mine inimicorum affiguntur memoriæ,</i>	112
11	<i>Et pericula & egestas.</i>	113
12	<i>Metus nocet.</i>	114
13	<i>Ideo præcavendus.</i>	115
14	<i>Alacritas bona.</i>	116
15	<i>Methodus auxilium memoriæ,</i>	ibid.
16	<i>Et carmen,</i>	118
17	<i>Et disciplina artificium.</i>	ibid.
18	<i>Artium auxilia.</i>	119
19	<i>Modus repetendi jucundus.</i>	120
20	<i>Historia viri ex cujus memoriâ defuetudine omnia exciderunt.</i>	121
21	<i>Memoriam valere bonum.</i>	122
22	<i>Memoria apud insipientes quandoque valet.</i>	123
23	<i>Angusta memoria commodior quàm larga.</i>	125
24	<i>Memoria angusta cum infidâ confertur.</i>	126
25	<i>Quâ ratione immutatur memoria.</i>	128
26	<i>Quâ ratione memoriæ fidelitas non declarat aliarum mentis facultatum præstantiam.</i>	129
27	<i>Eadem remedia & memoriæ & corpori prosunt.</i>	131

Argumenta Capitulum.

	Pag.
C A P. XI. De imaginandi facultate.	133
Sect.	
1 <i>Imaginandi ratio.</i>	ibid.
2 <i>Colores desumpti ex rebus perceptis & memoriâ retentis variè componuntur.</i>	134
3 <i>Imaginatio sana,</i>	136
4 <i>Ac felix.</i>	137
5 <i>Ratio probandi.</i>	ibid.
6 <i>Opera imaginationis.</i>	140
7 <i>Fortissima cavenda.</i>	141
8 <i>Imaginationis usus.</i>	143
9 <i>Ornatus.</i>	ibid.
10 <i>Poësis ejus opera præcipua complectitur.</i>	145
11 <i>Exemplum abusûs operum imaginationis.</i>	146
12 <i>Operum quorundam distinctio.</i>	148
13 <i>Vitia imaginationis.</i>	149
14 <i>Vitiorum remedia duplicia.</i>	152
15 <i>Quâ ratione eadem juvant.</i>	154
16 <i>Imaginatio malè sana.</i>	155
17 <i>Auxilia.</i>	159
18 <i>Tempora ac regimen operibus imaginationis idonea.</i>	160
19 <i>Fama mentis ab imaginatione pendet.</i>	161

Argumenta Capicum.

	Pag.
CAP. XII. <i>De judicandi facultate.</i>	163
Sect.	
1 <i>Quâ ratione judicatur.</i>	ibid.
2 <i>Unde error.</i>	ibid.
3 <i>Ex tribus prioribus facultatibus veniens error castigatur.</i>	164
4 <i>Scribendi ars errores memoriales corrigit.</i>	166
5 <i>Error à judice venit in ratiocinandi facultatem.</i>	167
6 <i>Eadem utrique facultati organa.</i>	168
7 <i>Mentis veritas.</i>	ibid.
8 <i>Verisimilitudinis gradus.</i>	169
9 <i>Erratur per præcipationem.</i>	170
10 <i>Periculum ejusdem.</i>	171
11 <i>Unde hæc facultas consummatur.</i>	172
12 <i>Laudatur autorum lectio & examinatio;</i>	174
13 <i>Exinde præcognitio eorum quæ eveniunt.</i>	175
14 <i>Non ex hypothefibus.</i>	176
15 <i>Laus Scriptorum Classicorum.</i>	177
16 <i>Præstantia judicis dum in scriptis versatur.</i>	ibid.
17 <i>Vitia ejusdem.</i>	179
18 <i>Puritas fons perspicuitatis.</i>	180
19 <i>Norma puritatis.</i>	181
20 <i>Qualis optanda.</i>	182
21 <i>Judex pro mente totâ,</i>	183
22 <i>Rerum</i>	

Argumenta Capitulorum.

Sect.	Pag.
22 <i>Rerum momenta cognoscit.</i>	185
23 <i>Judicium de Hominibus.</i>	186
24 <i>Hujusmodi disquisitio de judice per-</i> <i>magni est momenti.</i>	187

CAP. XIII. *De ortu atque incremento ejusdem facultatis.* 188

1 <i>Prospectus initij atque incrementi ejusdem.</i>	ibid.
2 <i>Dos illam imitans.</i>	189
3 <i>Quare exemplaria utilia.</i>	190
4 <i>Tardè crescit hæc facultas.</i>	191
5 <i>Sit cura puerorum maxima.</i>	192
6 <i>Varia tentanda.</i>	193
7 <i>Non cogendi juniores sed ratione ducendi.</i>	194
8 <i>Quæ Libertas judici restituta est.</i>	195
9 <i>Judicia de signis.</i>	196
10 <i>Errores ex malè intellectis signis.</i>	197
11 <i>Quæ à fontibus investiganda.</i>	198
12 <i>Usus artis Criticæ.</i>	ibid.
13 <i>Rerum cognitio adjungenda necessario.</i>	ibid.
14 <i>Judicis maturitas.</i>	200
15 <i>Signa maturitatis ; Constantia,</i>	201
16 <i>Et dotum ad judicem spectantium consummatio,</i>	202
17 <i>Uti & vanitatis castigatio.</i>	203
18 <i>In quali indole.</i>	204
19 <i>Comprobatio bonorum.</i>	205
20	<i>Ætas</i>

Argumenta Capitula

Sect.	Pag.
20 <i>Ætas quando viget,</i>	207
21 <i>Atque increscit.</i>	208
22 <i>Morbi ejusdem.</i>	ibid.
23 <i>Signa eorundem.</i>	209
24 <i>Exemplum.</i>	211
25 <i>Non admittendum vulgi judicium.</i>	213
26 <i>Insipientia.</i>	ibid.

CAP. XIV. De Ratiocinatione. 215

1 <i>Quale sit ratiocinari.</i>	ibid.
2 <i>Simplex ratiocinij genus.</i>	ibid.
3 <i>Ratiocinatio vix alia à numeratione.</i>	216
4 <i>Non alia à judicijs repetitis aut sup- putatis.</i>	217
5 <i>Quidam laboris ratiocinandi impa- tientes.</i>	219
6 <i>Progressus ratiocinationis à numero noto ad ignatum.</i>	220
7 <i>Fallacia non aliter quàm Præstigia.</i>	221
8 <i>Maxima certitudo ubi nullâ refert.</i>	222
9 <i>Illatio generis universi vel singularis rei.</i>	ibid.
10 <i>Series illationum.</i>	223
11 <i>Ratiocinandi opus præstantissimum.</i>	224
12 <i>Errores quantum licet cavendi.</i>	225
13 <i>Iidem morbi hujus atque judicis fa- cultatis.</i>	226

Argumenta Capitulorum.

CAP. XV. *De retrospiciendi & recognoscendi facultate.* Pag. 228

Sect.

- | | | |
|----|--|-------|
| 1 | Fus hujus facultatis in cæteras. | ibid. |
| 2 | Ex suspitione oritur ejus exercitium. | 229 |
| 3 | Tardè maturefcit crefcitque inquirendo
in facultates fibi fubjectas ; | 230 |
| 4 | Etiam in ratiocinia. | 231 |
| 5 | Affimilatur ætheri. | 232 |
| 6 | Prænotio huc fpectat ; | 233 |
| 7 | Et quâ ratione. | 234 |
| 8 | Ex ejufdem fanitate colligitur fanitas
totius mentis. | 235 |
| 9 | Hic fita eft confcientia. | 236 |
| 10 | Indicat bonum. | 237 |
| 11 | Morbi. | ibid. |
| 12 | Auxilia. | 241 |

CAP. XVI. *De mentis com- prehenfione ac captu.* 243

- | | | |
|---|---|-------|
| 1 | Diverfitas comprehenfionis. | ibid. |
| 2 | Clarior in pueris. | 244 |
| 3 | Quî excolitur. | 245 |
| 4 | Culturæ difficultas. | 246 |
| 5 | Qualis fit comprehenfio. | 247 |
| 6 | Fundamentum certitudinis. | 248 |
| 7 | Comprehenfio intra certos limites re-
ftricta. | 250 |
| 8 | Comprehenfio errorum. | 251 |
| 9 | Mo- | |

Argumenta Capitulum.

Sect.	Pag.
9 <i>Modus comprehendendi.</i>	251
10 <i>A principiis quâ ratione cavendum.</i>	253
11 <i>Consensus facultatum verum comprobatur.</i>	254
12 <i>Consensus etiam in ijs circa quæ imaginatio versatur.</i>	255
13 <i>Qualia sunt præjudicia.</i>	257
14 <i>Præjudiciorum vis.</i>	258
15 <i>Axiomatum usus.</i>	259
16 <i>Usus imaginationis ad comprehendendum,</i>	261
17 <i>Ac memoriæ.</i>	263
18 <i>Affectus.</i>	ibid.
19 <i>Remedia.</i>	264

CAP. XVII. De Sagacitate. 265

1 <i>Dotes ad medicinam spectantes,</i>	ibid.
2 <i>Quæ coalescunt in Medicinæ indolem accommodam.</i>	ibid.
3 <i>Qualis dos Sagacitas.</i>	267
4 <i>Quâ ratione Sagacitas in opere versatur.</i>	269
5 <i>Unde materiam operum adipiscitur.</i>	270
6 <i>Signa quoduplicia sunt.</i>	271
7 <i>Ex conjecturis innotescunt veri indices.</i>	272
8 <i>Ubi sagacitas plus valet.</i>	275
9 <i>Sagacitati debetur medicina.</i>	ibid.
10 <i>Quousque extenditur Sagacitas medica.</i>	276
11 <i>Fun-</i>	

Argumenta Caputum.

Sect.	Pag.
11 <i>Fundamenta Medicinæ.</i>	277
12 <i>De Rationali disciplinâ atque experientis.</i>	279
13 <i>Quâ ratione Empirici hoc argumenti tractârunt.</i>	280
14 <i>Sophismata Empiricorum.</i>	281
15 <i>Qui Empirici opinionem tuebantur.</i>	ibid.
16 <i>Exemplum.</i>	283
17 <i>Exemplum Sagacitatem medicorum ostendens.</i>	285
18 <i>Signorum investigatio admodum laudanda.</i>	286
19 <i>Vitium eidem oppositum.</i>	287
20 <i>Affectus.</i>	288

CAP. XVIII. *De Solertia.* 289

1 <i>Quâ ratione à Sagacitate contradi-</i> <i>stinguitur.</i>	ibid.
2 <i>Solertiæ interpretatio.</i>	ibid.
3 <i>Prima ejus pars.</i>	291
4 <i>Occasionis descriptio.</i>	292
5 <i>Exempla Solertiæ primæ.</i>	293
6 <i>Pars Solertiæ altera.</i>	295
7 <i>Hæc Solertiæ pars Medicinæ uti-</i> <i>lissima.</i>	296
8 <i>Solertia enitet ex cæteris dotibus.</i>	297
9 <i>Exempla ad Medicinam spectantia.</i>	298
10 <i>Vitium eidem oppositum inertia.</i>	299
11 <i>Affectus.</i>	300
12 <i>So-</i>	So-

Argumenta Capitulorum.

Sect.	Pag.
12 <i>Solertia rarior vel plurimum communitur.</i>	303
13 <i>Solertia circa scopum versatur;</i>	304
14 <i>Vel Consilia.</i>	305
15 <i>Consilia consilij oppositi.</i>	306
16 <i>Solertia juniorum ac seniorum.</i>	308

CAP. XIX. *De imperatrice facultate.*

1 <i>Qualis sit.</i>	ibid.
2 <i>Munus ejusdem.</i>	311
3 <i>Vitia.</i>	312
4 <i>Sanitas.</i>	313
5 <i>Libertas.</i>	314
6 <i>Libertatem adimentia extrinsecus;</i>	315
7 <i>Et intrinsecus præjudicia;</i>	316
8 <i>Et morbi.</i>	317
9 <i>Morbi ejus peculiares.</i>	318

Addenda & Corrigenda.

- P** A G. 4. lin. 15. *lege poena.*
 82. ad marg. *lege sylvestris.*
 84. ad marg. *lege militaris.*



P R Æ F A-



PRÆFATIO.



VALETTUDINEM mentis *Nobilissi-*
 integram tueri aut amissam *ma ac uti-*
 restituere *lissima* *pars Me-*
 cinæ votum est: Ac proinde *dicina.*
 affectus organorum, quæ no-
 bilissimis ipsius facultatibus inserviunt, in-
 sanitatis (a) nomine Romanis dicuntur.
 Planè quasi indicarent, hanc maximè semet
 sanitati opponere, atque adversâ eidem
 fronte pugnare. Neque dubitare licet;
 quin solummodo inchoata aut manca ejus-

(a) Nomen insanix significat mentis ægrota-
 tionem & morbum, id est insanitatem. Cicer.
 Tusc. 3. Quin & sanitas à Cæsare furori oppo-
 nitur, & apud eum Autorem pluribus in locis
 κατ' ἐξοχὴν mentis aut animi sanitatem denotat.

• b

modi •

modi ars sit, quæ corporis itinera explorat ac describit, mentis verò rationes negligit ignoratque : Idque non modò propter hujusce dignitatem ; verùm ideo præcipuè, quòd morbi ipsius nec tolli neque intelligi queant, nisi eorum etiam, quibus mens tentatur, cognitio accedat. Utriusque quippe generis morbi plerumque inter se colligati atque impliciti cernuntur ; adeò ut vix unquam graviores corporis affectiones contingant, nisi mens aliquatenus afflicte-
tùr. Imò & exinde, quòd mentis affectus satis perspectos medici habeant, oritur exquisita in discernendis accidentium fontibus subtilitas ; atque hinc ipsis pateat, quis eorum sensus sit, & in qualem quæque exitum tendant. Hinc dein nascitur curiosa in morbis regendis felicitas, quæ ad modum naturæ cujusque spectat ; quò scilicet propositum medentis usque dirigitur. *Modum autem* (ut cum Hippocratis (a) interprete loqui liceat) *neque pondus, neque numerum aliquem, ad quem referas, cognosces ;*

(a) Μέτρον δὲ, εἰδὲ σταθμὸν, εἰδὲ ἀριθμὸν εἰδὲνα ἄλλον, πρὸς ὃ ἀναφέρων εἴσῃ τὸ ἀκριβὲς ἐκ αὐτοῦ εὐροῖης ἄλλο, ἢ τῶ σώματος τὴν αἴσθησιν. Περὶ Ἀρχ. Ἰητρ.

P R Æ F A T I O.

iii

*certitudinem enim exactam non reperies aliam,
quàm corporis sensum.*

Sensus proinde is est, ad quem medicus *Modus*
respicit, dum qualia, quòtque ac quanta *Medicina.*
naturæ conveniunt, dispiciat: Exinde iti-
dem quid facilè, quid ægrè ferre potest,
dein quid adjuturum est, & quòusque in
remedijs adhibendis conscendere æquum
erit, ritè colligit. Ea profectò cynosura
est, quæ medentibus notatur: Est enim
cum meta, tum viæ ad eandem ducentis
index; cujus quicumque peritior, is me-
dendi artifex sagacior atque securior eva-
dit. (a) *Quapropter operosum est ita exactè
condiscere, ut parum in alterutram partem
delinquas; quanquam ego etiam eum medi-
cum vehementer laudârim, qui parum delin-
quat. Certitudinem autem exactam rarò
videre contigit.*

Propterea verò quòd homo rationis par- *Methodi*
ticeps sit, ob Divinæ, quæ illum intus *index.*
agitat, auræ particulam; in curationibus
eò præsertim respiciendum, ut commo-

(a) Ibidem.

dum sit nobili huic incolæ templum, atque idonea dotibus pandendis scena ibi comparetur atque decoretur. Dum modi ergo plures curandi proponuntur medentibus considerandi, ratio præsertim habenda non modò hujus qui tutus est, sed & qui mentem convalescentis non minùs sanam ac firmam relinquat : Eo scilicet consilio ut, dum vitalis flamma exuscitatur conservatúrque, clarè itidem post resplendeat, ac mentem pariter fulgor ægritudine jam sublatâ ne deficiat. Idcirco autem pars magna consiliorum apud præclaros opifices est, ut mens sibi constet curare, útque ejus functiones supremæ ne lædantur, dum medicamina satis fortia ad sanandum corpus adhibentur : Quod quidem nec fieri potest, nisi, qualiter easdem habere oportet, clarè ac penitiùs intelligatur.

Ratio tradendi.

Ut proinde hujusmodi Medicina dilucidius tradatur, mentis primùm natura exponitur; quibus nempe utitur instrumentis ad opera quævis præstanda, & quænam inter ea diversitas constat: Et quoniam pluribus mens facultatibus ornatur, quales

P R Æ F A T I O.

v.

quales hæ sint, & qualiter in sanitate ejus integerrimâ ordo inter easdem à naturâ conspicitur: Quippe quæ norma est, ad quam vitia exiguntur de eâdem deflectentia; ac proinde quò longiùs prava hæc itinera ab ipsâ recedunt, eò deteriora dignoscuntur. Inquiritur dein in variam organorum conditionem, an voluptas vel dolor aut quædam indolentia inter utrumque sita adsit; quoniam triplex ea conditio multum ad morbos clarè intelligendos æquè ac sanitatem tuendam valet. Nimirum voluptas & dolor indices à naturâ constituuntur; quæ quidem interpretantur ea, quæ mens patitur, & quæ eidem profutura docent, aut cavenda monent. Proximum verò est ut, quæ mentem excolant, considerationem mereantur: Quæ nimirum mens peracuitur, vel hebes redditur; uti & quæ ex educatione bona vel mala proveniunt. Nempe mens ita ferè se habet, prout primis instituta fuit annis, ac certaminibus rerum varijs accommodisq; exercitata, ad corporis dotes regendas, uti & ardua dein superanda præcipuè valet.

*Valetudo
mentis se-
cunda vel
adversa
dignoscen-
da.*

Propterea hæc in primis curæ sunt, ut, ex quo fonte vitia scaturiunt, pateat; & quâ lege nunc corpori mens imperat, nunc & ei paret; utpote inter quas, dum vivitur, consortio minimè dissolvenda sit. Corporis tamen delicijs modo mens sese fruendis dedat, vix gnaviter munia sibi propria obire, nec clarè percipere, percepta tenere, aut quævis vividè imitari poterit, nedum ad laborem fortiter cogitandi se accingere. Quinetiam lumina ipsius mentis sic obfuscantur, ac demum auctoritas labascit. Proinde verò quænam ejus facultates minuunt augentve consideratione digna sunt, & quæ earum singulas juvant aut lædunt. Ubi sanè quæritur, qualis secunda est ipsis valetudo, & quæ incommoda; quando universis inter se convenit; vel quo pacto idipsum, quod huic gratum est, illi adversatur; qualis scilicet earum repugnantia, qualisque omnium consensus est; ubi dein sita est veri falsique agnitio, & pariter recti pravique conscientia. Sanitas quippe mentis integerrima facit, ut libertas eidem competat; ubi omnes itidem facultates bene valent, atque intra fines quæque suos se continent.

Obiter

Obiter dein plura observantur, quæ ad corporis etiam valetudinem spectant, quoniam hoc ipsum mente affectâ læditur, corporisque iterum valetudo mentem afficit. Unde quidem plura desumuntur, quæ ad medicinam faciendam conducunt; atque ipsi fontes aperiuntur, ex quibus ars olim profecta est; dotésque monstrantur, quibus ad eandem feliciter exercendam opus est.

*Valitudo
mentis ac
corporis se
mutuo affi-
ciunt.*

Quoniam autem novâ hâc agendi methodo multa conquirere oportet, quæ in philosophorum atque historiographorum operibus produntur, nil miri si pomœria, quæ à plerisque arti medicæ designantur, excedere necesse sit. Non enim remedia unicè pharmaceutica aut chirurgica hoc negotij exigit; verùm quicquid ubique sapientibus reconditur consilij monitîve, quicquid ex historiâ non solum medicâ discere licet, universum illud ad hunc scopum rectâ dirigitur. Siquidem omnia mentis opera celeberrima perscrutari hujusce instituti ratio videtur, ut conditionem illius præstantissimam dignoscere, eamque, quæ inferior est, dijudicare fas sit.

*Ex poetis,
philosophis,
et histori-
cis varia
huc trans-
feruntur.*

Enimvero opera ejusmodi valetudinem mentis commodissimam atque firmissimam patefaciunt; quæ quidem (uti suprà dictum fuit) norma est, ad quam malè sana ipsius conditio exigere debet. Si qua enim vel longiùs de eadem deflectat, vel ad hanc propiùs accedat, aliquis saltem sanitatis gradus deficiat necesse est. Interea præcipuum inter hæc opera locum Poësis sibi vendicat, qualis consilia sapientium super hâc re complectitur; inania repudiât, & pravè judicata illatave castigat, atque exigit ad normam rectæ rationis, ac proinde iter insigne monstrat ad æquas naturæ leges sancendas; quibus emendari ac dein integra præstari queat.

*Educatio
huc spe-
ctat.*

Quandoquidem autem hæc fieri nisi ætate quæque suâ nequeant, ideo quæ ad peculiares pertinent ætates subinde monere haud alienum est. Quo pacto etiam de educatione agitur tanquam medendi methodo, & sine quâ non nisi perpaucæ ingenioque nobilissimo præditæ mentes aut sanitatem servant continuam, aut interruptam recuperant. Cui itidem subtilis cogitandi facilitas, elegans ornatus, ac in univ-
ersum summæ ejusdem laudes debentur.

Verùm

Verùm hujusmodi de mente disquisitio *Morbi*
 non modò ad nobilissimam hominis par- *mentis ac*
 tem speciatim pertinet, quo solo nomine *corporis im-*
tertexti.
 attentionem mereri potest; sed & ad me-
 dicinam etiam corporis summè excolendam
 utilissima est. Vix enim medentis est cu-
 riosissimè fabrefactum corpus solummodo
 intueri, quatenus ex tubulis sensu unicum
 præter tactum carentibus constans, per
 quos vitales fluere consuèrunt latices, le-
 gēsque motuum istorum nôsse, causāsque
 morborum in hisce indagare; quamvis
 neque hoc operis negligere oporteat; ast
 sæpe ultra hæc mentis explorare sensa,
 morborúmque frequenter gravium initia
 illic deprehendere; causāsque pariter inibi
 sitas exquirere. Nimirum dolor, cujus
 origo menti propriè tribuitur, sopitus eum
 qui ex corpore proficiscitur subinde lenit;
 atque hic ipse dolor interdum mentis do-
 lorem levat. Imò morbus gravis rarò
 datur, ubi nullum à mente symptoma
 proficiscitur.

Ut verò superiores duntaxat facultates *Mentis*
 nomine mentis propriè appellantur, sic ad *humana*
cum alio-
rum animantium facultatibus
collatio.
 hæc

hasce solas regendas præsens hujusmodi labor instituitur; quatenus nimirum cætera, quæ ad mentem spectant, his ipsis subijci debent. Reliqua sanè omnia æquè ad bruta animantia ac homines referuntur; adeò ut non desint, qui nonnullis eorum ratione inferioris hujusce præstantiæ plusquam hominibus tribuant. At licèt quædam ex brutis imperfectas mentis humanæ facultatum imagines præ se ferant, propiùsve ad eandem accedant, vel ab eadem etiam longiori intervallo distent, nondum tamen constitit, huc usque eadem pervenire, neque arte quâvis vim eorum insitam ad paritatem promoveri.

*Discrimen
in parte
animi in-
feriori non
situm est.*

Idcirco autem haud absonum videtur quærere ubi mentis discrimen situm est; ex quo homo reliqua naturæ dignitate animantia superat; quum quoad corpus sæpe non longè aliter habeat: Alia etenim sanguine simili fruuntur, cæterisque pariter laticibus, qui ad vitam spectant æquè ad sensum. Nónne brutorum quorundam perinde atque hominum sanguis exardet, spiritúque æquè repletur? Nónne itidem perturbantur, irâ excandescunt, ac furore per-

P R Æ F A T I O.

xj

percita sunt? - Nónne moerent, tristitiave
ac dolore afficiuntur? Nónne metuumt,
atque etiam blandiuntur? Nónne itidem
læta videmus, atque audimus voces gauden-
tium tollentia? (a) Quod quidem adeò
patet, ut antiqui illi fabularum artifices af-
fectus animi primùm transferri ex brutis in

(a) Cùm pecudes mutæ, cùm denique secla ferarum
Diffimiles soleant voces variâsque ciere

Cùm metus, aut dolor est, & cùm jam gaudia gliscunt.

Quippe etenim id licet è rebus cognoscere apertis.

Inritata canum cùm primùm magna Molossùm

Mollia ricta fremunt, duros nudantia dentes :

Longè aliò sonitu rabie distracta minantur ;

Et cùm jam latrant, & vocibus omnia complent.

At catulos blandè cùm linguâ lambere tentant,

Aut ubi eos jactant pedibus, morsuque petentes,

Suspensis teneros imitantur dentibus haustus :

Longè aliò pacto gannitu vocis adulant ;

Et cùm deserti baubantur in ædibus, aut cùm

Plorantes fugiunt summissò corpore plagas.

Ennet. Lib. V. Ubi plura ad hanc rem spectan-
tia cernere est.

homi-

hominem docerent (a). Quapropter in inferiore animi parte non quærendum est inter eadem atque humanum genus discrimen.

*Brutorum
interiora à
se invicem
discrepant,
æque ac ab
eorum non-
nullis hu-
mana.*

Patet fanè ex Anatomicis disquisitionibus interiora brutorum inspecta sæpenu-mero tantum inter se discriminari; quantum à quibusdam ex illis humana. Quidam itaque altiùs explorandum, quod in humanâ mente residet, neque alij cuivis animantium generi cum humano convenit. Idverò non aliud esse constat, quàm quòd hocce rationis particeps sit; cujus quidem omnes conscij sunt, quotquot hominum ordini adscripti sunt.

*Discrimen
eorum ra-
tio.*

Rationem autem ipsam plures participant homines secundum eminentiorem gradum, adeò ut omnes videant agnoscant-

(a) Hor. Lib. I. Od. 16.

Fertur Prometheus addere principi
Limo coactus particulam undique
Defectam, & infani leonis
Vim stomacho apposuisse nostro.

Ad quem locum annotat Scholiastes vetus; Timorem à lepore posuit, à vulpe astutiam, à lupo rapacitatem, & ex reliquis reliqua; unde intelligitur, nihil gravius esse homini.

que.

que. Sunt interim nonnulli, de quibus idipsum non ita constat; iidemque vel ab ipsis natalibus eodem ritu se habuere; vel hoc ipsum munus casu quodam perdidērunt. Hi quidem in ipso naturæ humanæ limine constituuntur; de quibus ambigitur, utrū inter homines absolutos jure merito recēseri queant. De hisce tamen medicum oportet, si quis consulat, respondere; ideoque ad artem pertinet in rationis radices fontēve inquirere. Proximo supra hosce ordinē siti sunt, quibus per periodos ratio recurrit, deseritque rursus ad statā tempora; qui saltem ad lunæ varias phases vulgò aut insanire aut ad sanam redire mentem crediti fuerunt. Verū etiam plures sanorum sunt ordines; attamen cæteros nonnulli anteire videntur, vel propter ipsa naturæ munera, vel etiam ea, quæ ex educatione ac cultu proveniunt.

Omnes igitur hominum classes dignoscere, & ad qualem quisque pertingat, eatenus medici est, quatenus mentis sanioris integritatem variōsque ejusdem gradus accuratè tenere nemo ritè potest, qui non ex Medicinæ fontibus hanc scientiam haurit. Ac proinde hæc omnia ejusdem professionis sunt,

*Quatenus
hanc par-
ticipant
dignoscere
medici est.*

sunt, quibus recisis isthæc foret mutila, ac quorum cognitionem utilissimam ex principijs ejus solis depromere fas sit.

*Distributio
affectuum
secundum
facultates.*

Hisce ergo de causis varia mentis opera proprijs ipsius facultatibus, quas exerceri quotidie omnes cernimus, tribuere curæ erit; non solum eâ ratione ut singulatim clarè exponantur, atque ex omni parte perspiciantur, prout à naturâ ordinantur; verum etiam propterea quod organa earundem diversa esse ex ipsis affectibus palam fiat. Hinc autem observare liceat, quare iidem homines similibus afficiuntur, quoniam affectus congeneres sunt, organaque sibi mutuo connectuntur; & cur alij diversimodè, quum diversa ijs organa pati liqueat.

*Morborum
nervorum
discriminatio.*

Quoniam interim omnia ejusmodi organa generis nervosi sunt, omnes eorundem morbi huc eo nomine referri videntur; quantumvis alij propiùs morbos corporis accedant, alij etiam ab hisce longiùs remoti conspiciantur. Atque ita facultatis locomotricis affectus tanquam in medio siti naturam horum atque illorum participant. Qui verò strictè sensum afficiunt, hi nervorum morbi dicuntur; atque inter ipsos discrimi-


discrimen notatur, eorum nimirum quos internæ superioresque mentis facultates patiuntur, de quibus solis nunc differitur; dein quos animus quidem intus patitur, at qui ordine naturæ inferiore constituuntur, utpote quales ab hisce superioribus flecti regique possint; ac postremo, quibus sensus exteriores afficiuntur.

Ex quo autem hæc de mente disquisitio ostendere visa est, hoc ipsum, quod solum *Scribendi causa.* medicinam facientes per innumeras cuiusque naturæ ambages instar gubernaculi regit, ad mentem illiusque facultates ac dotes adeò pertinere, ut, nisi hasce jugiter intueantur, earumque indicia expendant, in morbis dignoscendis eventibusque prænoscentis cum ratione pergere non liceat, nedum remedijs adhibendis, quæ ægris peculiariter subveniant, iisque omnibus consilijs instituendis, quibus sanitati restituere, vel valetudinem quæ singulis conveniat naturis tueri fas sit, occasio quærendi hinc nata fuit, utrum tale argumenti genus arti huic medendi eò usque utilis tam accuratè atque apertè enarratum ubivis scriptorum legere esset, ut opera eidem infumta supervacua foret. At verò fatendum me huc usque non

non tam felicem fuisse, ut auctori medico occurrerem, qui hujusmodi quæsitis perspicuè responsa ederet, & qui mentis imperium, quousque proferre licuit, statueret, vel etiam viam panderet, quam post nati tererent, ad ejusdem naturam quatenus ad medicinam spectat, atque affectus elucidandum. Plures quidem videmus, qui organorum fabricam & situm investigatione laudatissimâ oculis subjecerunt, eorûmque figuras ad amissum delineârunt. Varia tamen horum sensa, varios usus, variûmque morem ex ipsis perdiscere vix licebat. Ideoque quod ad illam Anatomies partem spectat, ij ad eorum opera relegandi sunt, quotquot mente complecti velint, quî systema nervosum cultro anatomico denudatum visibus obijciatur. Quin & non levis hæc causa operis impræsentiarum publici juris facienda accedit, quòd morbi generis nervei invalescunt, uti nuperus auctor (a) doctissimus annotavit, cujus judicium hic loci laudare liceat; *Credo equidem magnam hominum partem [egestate &] animi demissione oppressam è viris excedere.*

(a) In libro inscripto, Religio Naturæ delineata.





DE
M E D I C I N A
M E N T I S.



C A P. I.

Mentis Natura.



FACULTATES hominum *Ratio dis-*
 aut ad vitam ipsorum aut ad *tribuendi*
 sensum & intelligentiam spe- *facultates.*
 ctant; quarum priores qui-
 dem corpori, posteriores vero
 menti tribuuntur. Qualis earundem distri-
 butio non eâ ratione intelligitur, quasi mens
 ad istiusmodi munia organis corporeis mi-
 nimè utatur, sed quatenus primaria ipsius
 B organa

organa peculiare obtinent dotes, quibus cæteræ corporis partes destituuntur. Mentis proinde facultates illis, quæ corporis sunt, imperare aut servire possunt, vitæque validius vel languidius afficere, pro naturæ cuiusque vividioris vel torpidioris sensu. Quin & alij insuper hæc, alij aliâ facultate præpollent; nec uno omnes sensu, nec uno sentiendi modo. Cujus notissimum exhibent exemplum, qui muscos tibiæ fidiūve sonos cantionesque depereunt; quibus auditis, alij aliorum sensuum dotibus eximie adornati vix aut saltem leviter tanguntur. Ac præterea hosce exquisitâ aurium fide, quod ad alia pertinet, frequenter nullatenus carere exinde constat; quoniam ijdem sermonis numeros orationūque ac carminum, ubi animus res semetipso dignas, vocibusque feliciter junctas persentit, non sine avidâ quâdam voluptate hauriunt.

*Affectus
varij cor-
poris &
mentis.*

Talis autem mentis natura est, qualis affici ab ijs queat, quæ corpus haud tangunt; at verò, quæ dulcedine aut molestiâ tangunt, mens dum attendit sentiat: Nec tamen ijsdem, quibus corpus, perpetuò affectibus laborat. Imò & nonnunquam quæ dolorem ex corporis læsione pariunt, isthæc mentem

mentem levant juvântque : Sicut etiam quæ corpus valenter alunt roborântve, mentem interdum prægravant. Quo fit, ut vigor mentis non sequatur corporis robur ; nec cibi athletici exercitationesque, quales ad sanitatis fastigium perducunt, ad mentis pariter robur utilesprehendantur. Id quod Pittaci (a) illius sapientis exemplo illustrari potest, qui, singulari certamine cum Phrynone (b) Olympionice instituto, uti maluit consilio quàm apertâ vi, utpote qualis adversarij robur satis Pancratio probatum esset ; ac proinde reti occultè sub scuto allato athletam impedivit.

Et constat quidem secundam corporis va-
letudinem non perpetuò menti bona affer-
re ; quin imò frequenter exinde oboriuntur

*Secunda
corporis
valetudo
menti sapienti
incommoda.*

(a) *Pittacus, qui septem sapientibus apud Græcos adscriptus est, quum de agri Achilæidis possessione inter Athenienses & Mitylenæos armis decerneretur, imperator ipse exercitûs cum Phrynone Atheniensium duce, qui & Pancratiastes & Olympionices fuerat, singulari certamine pugnare instituit. Rete igitur clypeo tegens Phrynonem eo, dum non cavet, involvit ; ipsoque peremto agrum servavit. Laërt. in vitâ Pittaci.*

(b) Olympiade xxxv.

B 2

velut

De Medicina Mentis.

velut nebulæ, unde hujusce oculi caligant; atque ipsa à verò rerum sensu eòusque aberrat, ut propè adsit periculum amittendi imperium, ipsiusque facultates imminuendi, si non penitus extinguendi. Quî interdum evenit, ut corpus demum pro confor-
te honorum, qui menti habentur, ipsi fiat dedecus, nec immeritò ipsius carcer vi-
deri possit. Quo cognito antiquissimi phi-
losophi homines in belluas immundas aliâ-
que inferioris ordinis animantia transfor-
mandi vires corpori bene pasto ac faginato
tribuerunt. Quapropter in pervetustâ illâ
disciplinâ, in quâ migratio animæ humanæ
in cætera animantia perhibetur, pæna ijs in-
tentatur, qui habenas corporibus laxârint;
& hisce quod volupe esset permiserint; ut
scilicet in ea animantium genera detrude-
rentur, quorum similia homines studia re-
ferrent. Huc pertinet diæterium illud So-
cratis apud (c) Xenophontem memoratum,

(c) Οἴεσθαι δὲ φη [ὁ Σωκράτης] ἐπισκοπῶντων, καὶ
τὴν Κίρκην ὧς ποιεῖν τοιούτοις πολλοῖς δεικνύσσαν τὸν
δὲ Ὀδυσσεὰ Ἑρμῆ τε ὑποθημοσύνη καὶ αὐτὸν ἐγκρατῆ
ὄντα, καὶ ἀποσχόμενον τὸ ὑπὲρ τὸν καιρὸν τῶν τοιούτων
ἄπτεσθαι, διὰ ταῦτα ἔ γενέσθαι ὧν. Ἀπομνημ.
Βιβλ. Α'.

qui

qui Circeen hujusmodi sociorum Ulyssis vulgus apud se cœnans sues reddere aiebat, at Ulysses ipsum Mercurio suggerente, cum sibi temperantem, tum sese abstinentem ab importunâ ciborum potionumque ingestione propterea suam non fieri. Quoniam verò vinum inter potiones, quæ corpus excitant ad imperium mentis turbandum, præcipua recenseretur, ideo Mineïades solæ Minervæ, sapientiæ ac bonarum artium Deæ cultrices, Bacchi sacra non accipienda, Ovidio (d) referente, censuerunt.

Quin & sæpe dolor, qui læso corpore sentitur, utcunque acutus sit, si non longius, ultra quod facile ferat natura, procedat aut diutius infideat, nonnihil licet roboris decesserit, mentis viribus minimè officit; inò & hæc debilitas restituere, vel antea languentes erigere atque adaugere consuevit. Quemadmodum ex inediâ dolor ideo

*Dolor non
semper
menti in-
commodus.*

(d) Metam. l. iv. Hujusce rei causâ Poëta ille Bacchi natalitia & colendi ritus per plures libros persequitur. Ubi sanè historiam secundum fabulas tradit adinveniendi usum vini, vitæque de Oriente in Europæ regiones transferendi.

à naturâ inferi videtur, ut ingenium acuat, dētque solertiam ac dexteritatem ad ea omnia adipiscenda utilem, quibus ad vivendum opus est.

Sedes sensus, & modi diversi.

Interea reliquæ corporis partes, si excipias nervorum systema, sensûs minimè participes sunt, quibus tamen ope nervorum sentiendi facultates distribuuntur. Faciunt quippe fibræ nerveæ subtilissimæ integro corpori intextæ, pērque varias ejusdem partes transductæ, ut isthoc totum persentiscere videatur. Is verò sensus acutior vel hebetior est, pro cujusque naturâ & pro variâ methodo, quâ percipiendis rebus debilius aut fortius mens assuefacta fuerit. Isque pariter seu capacior sive angustior est non modò propter naturam, verùm & pro more qui per educandi genus introducit, quique habitum quendam plura simul complectendi quasi de novo creet; cujus demum longo ac perpetuo usu mos ille superadditus firmatur, facilisque redditur.

Mentis facultates, sensus simplex, judex, memoria, earumque dotes.

Quod autem attinet ad mentis facultates, prima recensetur simplex præsentis rei sensus, qui sanè alijs magis alijs minùs viget: De quo dein sensu facultas judex sententiam fert;

fert ; quod quidem iudicium, qualecunque illud sit, memoriæ custodiendum committitur. Hæc verò detinere arctius vel laxius consuevit pro rei momento, ac prout dijudicatur tanquam aliquid singulare raròque occurrens, vel tanquam tritum ac quotidianum, quòdque ideo vix attentionem excitat, nedum recordationem meretur. Unde evenit, ut quanto plura pauciorave retinere valet memoria, tanto majorem minorèmvē rerum copiam sufficiat, quandocunque opus est aut examen de singulis instituere, aut etiam hæc singula unà conferre, quo pacto discernatur, quali ratione ad se invicem habent. Propterea memoria non modò rebus magni momenti ditatur, aut vilibus nullo discrimine oneratur, pro iudicis facultatis disertis ac felici singulas dirimendi habitu, aut pro ipsius vago vel vacillanti ingenio, & inepto decreta sua condendi & disponendi more ; sed & expressius ac distinctius primò imagines capere, ac dein pro debilitate vel firmitate suâ magis minùsve integras easdem conservare potest.

Verùm aliqua videtur facultas, quæ inter iudicem & reminiscentiam intercedit ; qua-

Imaginationis usus & dotes.

lis sanè plurimum confert cùm ad delineandas tum etiam imprimendas memoriæ hæc imagines; adeò ut faciliùs retineri queant, eoque modo salvæ præstari, quò in promptu adsint exhibendæ, quamprimùm uti libet. Ea certè imaginatio est, quæ, quò plus polleat floreâtve, eò fortius imperat cùm facultati judicandi tum etiam reminiscendi. Quippe quæ tam vividè interdum rerum faciem depingit; interdum illarum eòusque similes effingit imagines, quas pro ipsis ostendit obtruditque, ut vix judici libertas relinquatur. Quæ dein facultas, violentis quasi procellis affectuum ab imaginatione fuscitatis correpta, eas mox amplectitur, quales sibimet ab ipsâ obijciuntur, non quales reverâ cognoscuntur.

*Discendi
modus.*

Illud autem universum ex discendi modo elucescere videtur; nempe sonos primùm simplices, quales signis vocalibus tribuuntur, sentiunt aures, qui molliùs & leviùs vel asperiùs & graviùs easdem feriunt pro variâ organorum fabricâ, nervorùmque auditoriorum temperie ac tono. Accedit dein sonorum à se invicem dijudicatio; eosque singulos juxta hanc distributos habet memoria. Interea quanti sit hosce dignoscere,

De Medicina Mentis.

9

cere, qui tanquam artibus fundamenta substernuntur, quotidie discentibus traditur ; ac proinde eisdem repetendo, cæteraque ijs elementa adjungendo, quæ novitate suâ attentionem excitant, principiis disciplinarum iisdem se imbuunt. Quæ eâ tandem promptitudine in mentem revocantur, ut sæpius sponte suâ emanare, potius quam cogi videantur. Veruntamen post hæc initia, quæ assiduè recolendo memoriæ affiguntur, nonnulla singularia sunt, raroque occurrunt, qualia jam tum fortius animum curâ indagandi penitusque cognoscendi acuunt. Deinde plura ejusmodi complectitur memoria, variósque simplicium sonorum ad se invicem habitus, quandoque artis Musicæ elementa discenda sunt. Hinc quanto copiosius sonos eorumdemve tonos depromere discipulus valet, tanto facilius conferre, tanto distinctius singulos singulorumque rationes internoscere poterit. Et ne tandem sonorum multitudine memoria laboret, eos solos retinere atque disponere opus est, qui cæteris præstantiores dijudicati fuerint ; quod sanè absque certo ordine fieri vix potest : Cujus quidem virtus imaginationi ferè debetur, quæ sonos numeris aptè musicis auditos jungit,

jungit, adeoque eosdem modulatur, ut aures eruditae suaviter mulceant; quorum dein oblivisci ægrè licet. Propterea verò numerosa hæc sonorum modulatio cum tantâ subinde voluptate exhibetur, ut facultatem judicem captam abducatur. Id quod maximè efficit vis imaginandi, quum auxilia cæterorum sensuum, ac præsertim oculorum adhibeat; uti quando signis ipsos coram sonos delineat, quæ dein signa tenaciter eosdem memoriæ imprimunt; ac sæpe conjunctæ hæ vires fortius animos iritant, ut æquam servare mentem arduum sit. Unde demum accidit, ut ad partes à vero alienas nonnunquam judex inclinetur.

Obsequium facultatum imperatrici.

Enimvero mentis natura bene habere nequit, nisi omnes ejus facultates principi ascultent, nec omnino ei vim inferant, impediantve ne rerum species sinceræ, prout nudæ à rebus imprimuntur, eidem offerantur: Ac dein nisi sententiæ, quales maturè non verò præproperè feruntur, in memoriâ custodiendæ reponantur. Quo in negotio imaginandi vis jussis principis obediens, memoriæ præsentissimum utilissimùmque auxilium subministrare, quin & ejusdem nutu eas vel singulatim aut etiam conjunctim proferre

proferre valet, siquando hasce inspiciendi aut alijs cognoscendas subiiciendi consilium instituat.

Hinc maxima oritur diversitas, prout facultates singulae magis minusve vigent, ac prout sua quaeque auxilia iudici suppeditant; unde in hoc vel illud iudicium propendit; utrum id fiat propter infirmitatem, vel quod opinione aliquâ occupentur, *Diversitas ex vario sensu vel praesumptione.* cuius momentum praeponderat. Quemadmodum vox supra modum elata surdastro necnon rustico grata est, à quâ tamen aures delicatae violantur. Varia hinc & harum atque illorum de eadem iudicia; quippe soni vehementia surdastri aures non alio prorsus ritu ferit, quàm quo submissa vox bene sanas consuevit; quâ fit ut clarè eundem audiat, nec graviter ferat. Rusticus tametsi auditus ipsi pariter atque urbano vigeat, clamorem tamen in sylvis cum gaudio tollere assuetus, altam in delicijs vocem habet.

Profectò ea mentis conditio admiratione dignissima est, cuius variae facultates munij quaeque suis rite funguntur; ubi nec ulla inter se repugnantia eximias singularum dotes irritas reddit. Quibus sanè nominibus

Mentis optima conditio.

nibus refert (e) *instrumentum, siquod dari possit, musicum, quod omnes simul harmonias conjungeret, cujus voces omnes inter se convenirent.* Quod quidem organum, etiamsi curiosissimè fabrefactum, nisi docto musici imperio promptè omnes parerent partes, auribus prorsus foret illaudatum.

(e) Μαξ. Τυρ. Δόγ. 15. Εἰ ξυνίης παναρμόνιον τι ὄργανον, παντοδαπὰς μὲν φωνὰς, πᾶσας δὲ ἀλλήλαια ἡμολογημένας.





C A P. II.

De valetudine, ubi mens præcipue
corpori imperat.

T acumen mentis vigeat, ac sentiendi facultas integerrima sit, *Valitudo non firmissima* non opus est valetudine firmissimâ, verùm tali, qualis ad labores mentis perferendos idonea evadat. Hæc autem exercitationibus assiduis, quas corporis conditio robusta postulat, minimè gaudet, imò nec cibis potionibusque valentissimæ materiæ; at ijs solis contenta est, quæ faciunt, ne malè sit corporis functionibus, atque ut ministrantes utilisque ejusdem partes promptæ & habiles emineant, dum sibi à facultate imperatrice mandata exequantur.

Id verò præsertim accidere solet, dum *In quali corpore.* corpus potius tenue quàm obesum est; quod

ter corripientes subito mentem agunt præcipitem, at eandem serenam quoque relinquunt, siquando ipsi ultro subsidant, aut fortis viribus pectoris domiti fuerint : Hæc verò si modum non excedat, & mole negotiorum depressas mentis facultates minimè obruat, hæc variâ ac non infausâ rerum molestarum experienciâ auget, ipsiusque demum mentis imperium stabilis.

*Valetudo
continua
vel inter-
rupta.*

Gradus proinde genúsque valetudinis, ubi æquam servare mentem arduis in rebus licet, prius expetendum ; scilicet constans nec interrupta mentis sanitas : Proximos tamen honores occupant, qui ad saniores redeunt mentem ex animi perturbationibus, quique impeditas negotiorum sollicitudines tandem perrumpentes, mentis auctoritatem sibi stabilioremprehenderint ; quæ non tam infesta rerum discrimina sentura est, neque tam graviter prementia, quin immota sede suâ manere poterit.

*Continua
varior.*

Interea prior ea constans ac perpetua mentis sanitas tam rarò observatur, ut Poëta ille Græcus vix nisi sub personâ senis Nestoris eandem describat ; quasi nimirum ad ætatem potius grandem quàm adhuc vigentem

gentem pertineret. Nec sanè à Naturâ aberrat, dum longævum eundem tali temperamento præditum, moribus haud ingratiss, dulcium sermonum pariter atque consiliorum utilium autorem celebrat.

Semita verò, quæ per animi perturbationes ad tranquillio^{Interrupta}rem mentis conditio^{frequen-}nem ducit, magis quidem videtur trita; quâ tamen non sine victoriæ reportatæ laude transitur. Præclaræ quippe mentis est naturæ inæqualis propensionem superare, eandemque imperio regere potuisse. Nec minùs certè mentis robur indicat negotiosam perpetuò actionem sustinere posse, præcipuè si nec acies ejusdem exinde retusa fuerit.

Veruntamen indoles ea mentis præstantior videtur, qualis secundâ jugiter usa fuit^{Indoles præstantior.} fortunâ, neque eâdem corrumpi potuit. Periclitatur nempe ipsa graviùs, quæ à pueritiâ rebus prosperis, iisdemque quæ hæc comitantur blanditijs innutrita fuit, quàm quæ adversis pectus fortiter opponere assuevit.

*Res ad-
versa com-
moda.*

Quod attinet autem ad bonam hominum partem mens corpori adhuc vigenti non tantum imperat, quantum post res adversas sæpius tentatas non sine impari congressu, attamen ex quo diligentia ultimùm victrix evasit. Neque alia videtur causa, cur naturis quibusdam mentis imperium non tam clarè eluceat; siquidem eæ fortè sunt, quibus secunda obtigit valetudo, & quibus fortuna favens non nisi speciosam rerum faciem exhibuit, ac minimè in palæstrâ suâ exercuit. Quî dein accidit, ut inhabiles ad luctandum fiant, siqua causa offeratur, nec minùs ad depellenda quàm prævidenda mala valentes. Unde fortunati istiusmodi homines alijs frequentius inutiles videntur. Nec rarò evenit, ut si longævi evaserint, terræ pondus velut incommodum censerî iisdem contingat. Quâ de causâ illud hominibus felix faustumque prædicatur, ut priore vitæ stadio malis obsideantur; ne mens serò cum difficilibus congressura sit, qualia plerique alij devicerint, idque postquam tempora experiendi jam præterierint. Hinc interim constat, cur animosi juvenes sæpius ad bonam frugem perducti fuerint, qui in perpetuâ cum rebus

bus adversis luctâ versati, malâque crebrò experti ex hoc tanquam gymnasio eruditi certò prodeunt, nisi fortè ad majora à naturâ haud omnino comparati fuerint.

Quam planè rem Græci veteres in historîâ Ajacis Telamonij atque Ulyssis illustrârunt: Quorum ille notus corporis robore; hic mentis præstantiâ. Utriusque hujus personæ dotes Ovidius * peculiare cecinit. Ubi quidem advertere obiter liceat, quòd Poëta munus illud Palladis abripiendi gloriam Ulyssi sapientiâ insigni non sine sale tribuit, sine quo civitas nec initio condita, neque diu constare nedum florere possit. Postea quando tandem Ulyssi Achillea arma decreta fuissent, subjicit laudatus auctor, Ajacem cætera invictum iram doloremque sustinere non potuisse. Quæ quidem pervulgata liceat observatione claudere, ut Ajacem scilicet cònsue excanduisse, ut ipsius ad insaniam adacti furor argumentum nobile Tragediæ Sophocleæ præberet.

*Exemplâ
Ajacis, &
Ulyssis.*

* Metam. L. xiii.

*Exem-
plum Ale-
xandri.*

Rectè igitur faciunt illi, quod & secundum naturam fieri consuevit, qui præclara à talibus exempla desumunt, quales primum rebus exerciti adversis fuerant. Secus etiam si gloria parentum in filios traducta, opibus amicisque ipsorum freta, ingentibus perpetuò gestis effulserit; attamen ea nubibus præmaturè obducta, & non rarò vigente adhuc ætate penitus extincta fuit. Quale Alexandro illi magno contigit, qui postquam Philippi patris copijs militibusque veteranis super Persas & Indos imperium protulerat, mediâ ætate furore correptus nomen non nisi insanis affectandum reliquit.

Aliud oppositum.

Quanto verò felicius humano generi cessit heros ille seculi nostri decus? Cui infirmo corpore, mente altissimâ, innumeris obsessâ erat adversis juvena; quique sic exercitus libertatis patriæ suæ Britanniarumque vindex esse ausus est; ac non modò ipsas ab injurijs, verum & nomen suum laudisque ab oblivione asseruit. Neque profectò illustrius ubivis historiarum exemplum proditum est, in quo cum valetudo corporis
adeo

adeò incommoda cerneretur, tùm integer-
rimæ mentis vigor acutissimus per totum
vitæ laboriosissimæ ac utilissimæ spatium
emineret, quàm quod sacrum Gulielmi
nomen exhibuit.





C A P. III.

*De organis, quibus mens corpori
imperat.**Nervorum
systema.*

NERVORUM fibræ in omnes corporis partes distributæ, dum eadem integræ manent, dumque tonus servatur aptus, organa videntur, quibus mens ad sentiendum utitur : At si sanguis eadem non perfluat, sensus etiam harum cum vitâ tollitur. Unde idipsum sentiendi facultatem afficit, quo ad vivendum opus est. Attamen quod sensum hebetat, motumve inhibet, non statim vitam partium extinguere potis est. Proinde partibus vivis esse licet, quibus obscurus saltem sensus motusve est ; ideoque hisce mens vix, aut languidè saltem, imperat.

Mente

Mente interim sanâ corpore itidem sano, *Qui primariasunt organa.* quæcunque mens indicat per eadem sentiendi organa ad singula membra deferuntur: Neque tamen mentis mandata membris exequi licet, ultra quod à nervis accipiunt. Quapropter muscoli eòusque solùm moventur, quatenus nervorum, quibus constringuntur, actione ad illud valent; ac si nervi deficiunt, eatenus movendi potestate privantur. Exinde pariter evenit, ut musculi omnesque partes, quæ corpori movendo inserviunt, quadantenus haberi organa mentis queant. Quo fit, ut in nonnullis, quibus vis major est, non modò facultas locomotrix, sed & interiora viscerum organa, facultasque cujus actiones * Naturales nominantur, menti obediat. Unde huic imprimis vis impressa quosdam letho dedit. Interdum etiam pari jure sanguinis rivus afficit, adeò ut latex ipse mente subito commotâ in grumos abeat, ubi causæ † evidentes saltem nullæ innotuerint. Hinc & in febres interdum præcipites agit; quarum

* Vide Cels. in Præfatione.

† Ibid. paulò superius.

dein symptomata originem suam altiùs quàm ab humoribus corporis deducunt: Imò nec ab eorundem legibus pendent, neque ad normam reliquarum febrium, quales proximè accedere videntur, tolli confuèrunt.

Eorum affectus morbos cæteros imitantur.

Hinc etiam æmulatio illa affectuum nerveorum, quæ ubivis ferè morborum conspicitur; quum vix unus detur, qui imaginem suam in nervoso genere non agnoscit. Nempe omnia mala perinde ac bona in mentis quasi speculum relata, illinc in corporis partes reperiuntur videntur. Quinimo & similitudo tanta nerveorum cum cæteris affectibus se habet, ut non cujusvis sit hosce ab illis protinus dignoscere. Est etiam ubi intertexuntur, & miras naturæ turbas excitant nervei cæteris superadditi, ut vix liqueat nisi attentè consideranti, quale expetit natura auxilium, dum indices diversa monent; quasi scilicet natura vellet contraria & sibi repugnantia, aut certè ipsa in eodem homine duplex videretur. Omnia autem isthæc ejusmodi sunt, quoniam mens toti ferè corpori, illiusque legibus ac naturæ dominari, omniâque nervorum operâ sentientia sibi met subicere consuevit.

Cæterum

Cæterùm nonnullæ corporis partes sensu *Sensus* pleniori acutiorique, nonnullæ exiliori at- *partium* que hebetiori donantur : Quod quidem in- *varius.* terdum evenit propter raritatem aut frequentiam fibrarum inibi nervearum, quarum plexus alibi apparent, alibi verò ipsæ non tam propè sitæ videntur : Interdum etiam propter earundem intentionem vel remissionem. Quibus itidem causis sanguinis viscosioris & depauperati vitium accedit.

Præterea organa alibi ad hanc, alibi ad *Sedes or-* illam pertinent facultatem ; cujus videlicet *ganorum* exemplum in hisce, quæ ad judicem ratio- *varia.* nésque colligentem peculiari quodam jure spectant; quasi mentis ipsa illic sedes stabiliatur. Id quod in phrenitide videmus, quando fomes morbi delitescens ægrotos mente moveat, quo demum sublato ad se redeunt.

Itaque organa commodè distribui possunt *Distributio* pro vario sentiendi genere ac modo, diver- *eorum ex* sôque eorum usu, & partibus quibus mini- *genere.* strant. Siquidem aliud genus est res intelligentiâ comprehendere, ab eo quod per tactum in extremis partibus sentimus : Ali-
ud

ud iterum imagines rerum tanquam intus depictas clausis aspicere oculis, quales apertis mox intueri licebat, ab illo quod rationes ex alijs, quarum itidem nullas videre imagines fas esset, colligit, & sagaci sensu occulta indagat. Sicuti etiam aliud est videre vel audire ; aliud de eo quod videtur auditurve sententiam ferre ; aliud itidem ex visis auditivæ ad propositum spectantia deligere ; aliud denique ex præsentibus cum ijs, quæ in memoriâ detinentur, collatis, qualia posthac futura sunt, prævidere.

Et modo.

Nec profectò defunt, in quibus omnes mentis facultates suprâ descriptas tam apertè vigere, quàm simplices illas videndi atque audiendi, observantibus cernere est. Idcirco ex modis tam variè sentiendi suum cuique genus propriè tribuere æquum videtur.

Et us.

Diversus præterea est organis usus ; sicut hisce, quæ vel inanitionis, repletionis aut satietatis sensu donantur ; cujusmodi sunt, quibus fames & sitis, aut fastidium nauseæ sentiuntur. Qui sanè sensus duplex notari potest ; primarius, qualem hi nervi
com-

communem cum omnibus cæteris obtinent; veluti, quando aliquid lædat, statim irritati illud à se excutere nituntur; & dein secundarius, qualis ipsis peculiaris videtur. Exemplum prioris in crapulâ cernitur, ubi etiamfi cibi potionésque non displiceant, nimia tamen copia ingesta oneris sensum apud hos ipsos parit, unde & rejicere conantur; posterioris verò, si quando medicamentum, quod repurget, assumatur; cujus stimulos, hosce licet nervos urant, reliqui vix sentiunt.

Diversitas porrò nascitur ex locis, ubi sita *Ex situ,* sunt organa, ipsaque partium fabricâ; quam cernere est in hisce, quæ pertinent ad oculos aurésque, cæteraque illiusmodi organa, quæ ex admirandâ complurium structurâ oriuntur. Idcirco plura sentiunt organa aliàs atque aliàs sita, quorum nonnunquam sensa sibi invicem contraria videntur: Qualem sæpe videre licet repugnantiam inter hæc, quæ palato, & quæ ventriculo grata sunt.

Ex hisce autem, utcunque quoad præ- *Contrarius*
missas rationes diversa fuerint, nonnulla eò- *sensus ijs-*
dem collineant; sicuti organis, quæ ad ol- *-dem orga-*
factum *-nis, & ali-*
-orum alijs.

factum pertinent, scopus propè idem est, atque eorum, quæ ad distinguendos sapes apta nata sunt. Siquidem quæ grata sunt alimenta dignoscere tum odore tum sapore licet. Quod ipsum & munus est, postquam ingesta fuerint, ventriculo inservientibus; quibus frequenter ingrata sunt, quæ odore ac sapore oblectârunt. Atque è contrario, qualia & odore insuavi & sapore minimè grato donantur, nervorum fibras ad ventriculum fitas demulcent; cujusmodi sunt absinthia parvulis, quæ Poëta ideo tetra nominat. In hunc modum organa sibi met opponi videntur, aliâque aliorum impetum inhibere. Quo fit, ut aliorum officium sit irritare, dum alia penes sit reprimere. Quemadmodum ex nimia voluptate languor sentitur, quoniam irritamenta voluptatum à naturâ appetitui explendo destinantur, quo dein satiato nil nisi vis postea infertur. Eo scilicet modo organa ad ventriculum sita, quæ voluptatem usque ad satietatem perceperant, exinde nauseant.

*Ratio a-
versatio-
nis.*

Atque ita dum hic nauseandi sensus in mentem revocatur, prohibetur abhinc appetitus. Quî frequenter evenit, ut à crapulâ idem alimenti genus, ex quo quivis incom-

incommodum fenferit, ingratum per longum temporis spatium videatur. Hinc fanè plura alimentorum genera, etiamsi causa data non explicitè in memoriâ teneatur, displicent. Quâ de re fieri solet, ut ea ciborum genera, quæ naturâ suâ dulcia sunt, quibus rarissimè homines crapulam contrahunt, fastidium sui ipsorum, quale quidem diutius duret, vix creent. Imò & alimenta bene multa, à quibus odio quasi naturali homines refugiunt, istiusmodi olim fuisse veri haud absimile videtur, tametsi jamjam in alteram eòusque abierint naturam, ut causa ejusdem fastidij nullum in memoriâ vestigium reliquerit.

Quoniam autem experienciâ seu nostri ipsorum sive alienâ, imò & consilijs monitisque innotuit, aliquid subesse mali, quod tamen appetitus non refugit, quale quidem affixum memoria vividè tenet; hinc oritur oppositus in eâdem mente sensus; unde sæpe appetit, quod sibi simul conscit esse incommodum aut ineptum, ac certamen quoddam in se concipit dum huc illuc distrahatur. Sic Ovidius (a) Me-

Lucta sensuum contrariorum.

(a) Metam. L. vii.

deam amantem describit secum talia reputantem,

————— *Video meliora proboque;*

Deteriora sequor —————.

Ejus remedium educatio.

Quod quum prudentes vidissent, nitentur homines studijs assuefacere appetitui contradicendi, & tanquam frænis cœrendi ope institutionis atque doctrinæ; quò felicîus mens habenas quasi tractando imperium corporis occuparet, ac sæpe in contrarias partes flecteret. Quo tandem pacto vehementiam appetitûs regeret, affectûsque animi instantis vim moderaretur. Id sanè constat, quòd in nonnullis hæ velut habenæ fortiores, in alijs laxiores adhiberi soleant. Cujus quidem celebris ea Socratis agnitio exemplum præbuit; qui quum à Zopyro ex Physiognomiâ omnium libidinosissimus judicatus fuisset, quem Physiognomum Athenienses tanquam falsa loquutum deridebant, minimè eum mentitum fuisse fatebatur, sed naturæ vim se animi virtute oppressisse.



C A P. IV.

*De varia organorum mentis con-
ditione.*



A mentis organorum conditio *Organo-
rum tri-
plex con-
ditio.* est, ut interdum voluptate, in-
terdum dolore afficiantur, ac
nonnunquam tertium illud inter
utrumque adsit, quod indolentia nomina-
tur. Postremum autem ad temperamen-
tum æquabile refertur, quod tranquillè se
habet, nullisque omnino affectibus pertur-
batur; & cujus appetitui ita satisfactum
fuerit, ut in præsens saltem tempus nihil
molestiam pariat. Quo quidem pacto
mens imperturbata corpore utitur sano, ne-
que ulteriora optat, quàm ut non malè sit
functionibus sive naturalibus, seu hisce quæ
placidè & sine dolore munia sua obeunt.

Tali

Indolentia. Tali proinde homini jejunus minimè latrat stomachus ; qui neque nimiam alimentorum copiam, eorumve quæ facultatibus prædita sunt valentibus, nedum inter sese litigantibus, humoresque in partes suas provocantibus sese replet. Qualis sanè medius, qui instituitur, vitæ decursus perpetuò ab omni appetentiâ moderandâ ita pendet, ut qui hujusce legibus obstringuntur, ut plurimum in ejusmodi inclinentur partes abstinentiæ, ubi parcè ac simpliciter, potius quàm saturitatis, in quâ lautè ac liberaliter variâ confectis materiâ, vivitur.

*Paucis
contingens,
diversa à
felici tran-
quillitate.*

Verùm isthac degere paucissimis forte datur, quibus nimirum doloris perinde atque voluptatis expertibus esse contingit. Quale quidem mortalium genus, quod irâ minimè nec amore tangitur, idipsum neque gaudijs frui potest : Siquidem animo frui tranquillo ac placido, dum perturbatione nullâ vehementi commovetur, quoniam secundâ utitur fortunâ, prosperaque favent omnia, non est indolentia ; sed tam procul ab eâdem abest, quantum cœlo fudo, leni aurâ & nullo surgente fluctu tranquillitas distat à malaciâ, ubi aquis stagnantibus
naves

naves omni vento destitutæ se ex loco movere non possunt. Enimverò illa felicitas est, quam Epicurus (a) Dijs tribui contendit; hæc doloris absentia quantumvis quietos, non tamen felices homines reddere potest est.

Si quando autem voluptatem per organa *Voluptas* diffusam mens percipiat, florem summæ *periculosa.* sanitatis in ipso temporis articulo carpit; ideóque in lubrico versatur secunda ejusdem valetudo. Hæc quippe voluptas, cui nimis indulgetur, dolorem certò paritura est. Neque sanè dulcem eum sensum frequenter fert natura, quem quidem rarior usus commendat: Nec itidem, modò intensus sit, diutius, quin mox in molestum abeat. Proinde ut in voluptatem ingenium mentis à rebus arduis asperisq̃ue proclive est, sedulò

(a) Apparet Divûm numen, sedesq̃ue quietæ:
 Quas neque concutiant venti, neque nubila nimbis
 Adspargunt, neque nix acri concreta pruina
 Cana cadens violat; semperq̃ue innubilis æther
 Integit, & largè diffuso lumine ridet.
 Omnia suppeditat porro natura, neque ulla
 Res animi pacem delibrat tempore in ullo.

Lucret. L. iiii.

Quare voluptas minus sincera est.

Quod ad priorem attinet, est ubi voluptas judici mentis facultati non probatur, veluti quæ solis subsellij inferioris organis jucunda est, verùm de quâ superior illa longè aliter censet. Unde nonnihil ingrati frequenter voluptatibus admisceri contingit. Dein verò ad potiones meraciores confugiunt, quibus dictata judicis negligere moris est. Attamen harum ope in aliud tempus differre licet judicis sententiam, non eandem irritam reddere; donec repetitis calicibus hæc quidem facultas tandem subacta cedat. In cujus locum subière peregrini isti spiritus, qui furiarum ad instar exagitant perturbantque mentem; interdum & aciem ipsius retundunt, vigorénique stupore demergunt; interdum quicquid humani reliquum est vi suâ adeò obruunt atque extinguunt, ut, nisi lethum occuparit, in vivo adhuc corpore mentem quasi sepe-
liant.

*Exemplum
mero continuentis
voluptatem.*

Siquidem quibuscumque naturis, ubi voluptas ope meri continuatur, metuendum, ne tale quiddam sibi eventurum sit, quale Socrates Anyti filio prædixit. Nimirum ille adolescens, animo quippe non remissus, in
arte

arte servili à patre eidem apparatus minime permansurus videbatur. Qui quidem, (a) *quum vino delectaretur, neque noctu neque interdiu bibendi finem faciebat ; ac tandem nec patriæ, nec amicis, nec sibi utilis fuit. Anytus ipse, propter educationem filij pravam, & amentiam suam, etiam post mortem infamis est.*

Propterea mentis ea altera conditio potius laudes meretur, quâ ipsius voluptates florent ; ubi idipsum eandem suaviter tangit utilia pulchritudine suâ atque delicijs non carentia cognoscere ; ubi ordinis virtus perspicitur, quatenus confusam re-

Qui voluptas animi commoda fiat.

(a) Apud Xenophontem in Apologiâ Socratis. Locum verò laudatum proximè præcedentia huc transferre alienum non videtur. Ἀλλὰ μὲν τοι φάναι αὐτόν [τὸν Σωκράτην], ἀνέθηκε μὲν καὶ Ὅμηρος, ἔστιν αἷς ἐν καταλύσει τῆ βίης προγιγνώσκειν τὰ μέλλοντα βάλωμαι δὲ καὶ ἐγὼ χρησιμώδησαι τί συνεχένομαι γάρ ποτε βραχέα τῷ Ἀνύτῃ υἱῷ, καὶ ἔδοξέ μοι ἐκ ἄρρωστος τὴν ψυχὴν εἶναι ὥςτε φιμῶ αὐτόν, ἐπὶ τῇ δαλοπρεπεῖ διατριβῇ, ἣν ὁ πατήρ αὐτοῦ παρεσκεύακεν, ὃ διαμενεῖν. Διὰ δὲ τὸ μηδένα ἔχειν σπαδαῖον ἐπιμέλητήν προσπεσεῖσθαι τινὶ αἰσχρῶ ἐπιθυμίᾳ, καὶ προβήσεσθαι μέντοι τόρῳ μοχθηρίας.

rum variarum & nonnunquam sibi invicem repugnantium in memoriâ molem eleganter disponit, & fulgorem ex fumo elicere amat. Verùm hæ præclaræ mentis dotes non sine exercitationibus assiduis vigent; at deficiunt, nisi quotidie exacuantur atque excolantur. Quin & easdem nimium exercitare licet, atque eòusque ejusmodi delicias adamare, ut imbecilla exinde evadant organa, ingeniique vis non interruptis operibus deteratur. Utilis ideo imaginationis opera, quæ severiores disciplinas lepore peculiarique sibi gratiâ condire novit: Utilis itidem propter mille amœnitates, quas perquirat & ad rudem naturæ speciem poliendam effingit; quales scilicet mirâ animum varietate oblectant, caventque interdum levia interponendo, ne mente gravi rerum momento nimis intensâ affixâque, flos egregiarum dotum depascatur; omniâque dein illustria earundem opera aut immatura pereant, aut tam ingrata propter asperitatem evadant, ut publicis inservire commodis nequeant.

Quâ ratione corpus voluptates animi commodè ferat. Neque profectò corpus facilè voluptates mentis exquisitas tolerat, quin minùs valeat,

at, siquando ad eandem excolendam totus homo vires suas dirigere nititur. Ad quam rem in universum feliciter gerendam Socratis consilium plurimum valet, qui hujusce instituti vim in sui ipsius imperio expertus est. Ille enim (a) *ex quo tempore intelligere, quæ dicebantur, cæperit, nunquam intermisit tum inquirere, tum discere, quicquid boni poterat.* Constat quippe Xenophontem scriptorem omnibus numeris absolutum exhibuisse Socratem tanquam exemplar ijs imitandum, quicumque quidem sapere, non verò suprâ quod hominibus par sit, velint. Quod ipsum in (b) nomine ejusdem viri signatè proditum est; quasi indicarent Attici imperio sui ipsius potitum, salvumque illud in ultimum tempus præstantem. Ille, (c) inquit autor laudatus,

D 4

primò

(a) Xenoph. Apol.

(b) Ἀπὸ τῆ σωζειν τὸ κράτος. Quod denotat etiam non modò *regnum*, sed & *victoriam obtinere*, ac *servare*.

(c) Idem ibidem. In quâ descriptione bis alius est ad posteriorem, quæ nominis compositionem ingreditur, vocem: Verba Xenophontis sunt, Ὅς πρῶτον μὲν Ἀφροδισίων καὶ γὰρ πᾶντων ἀνδρά-

primò rerum Venerearum ac gula supra omnes homines continentissimus erat; deinde hyemis, aestatis, laborum omnium tolerantissimus, atque etiam sic ad frugalitatem institutus, ut quum valde modicum possideret, facillimè contentus ijs esset, quæ habebat. Paulò post; Quia constabat eum talem esse, in spem erigebat illorum animos, qui consuetudine ipsius utebantur, futurum, ut si ipsum imitarentur & ipsi tales evaderent. Nec corpus quidem ipse suum negligenter curabat, ac si qui curarent negligenter, eos minimè laudabat. Itaque improbabat, si quis nimio cibo refertus labores immodicos susciperet; magisque probabat, (a) si quod animus lubenter admisisset, id laborando conficeretur. Nam ejusmodi habitum valetudini non parum conducere, ac animi studium haudquaquam impedire aiebat.

Exercitatio mentis commendata.

Post hæc Xenophon objectis respondens addit; Video, perinde atque corporis actiones ab ijs suscipi non possunt, qui corpora non ex-

ἀνθρώπων ἐγκρατέστατος ἦν εἶτα πρὸς χειμῶνα καὶ θέρος καὶ πάντας πόνας καρτερικώτατος, καὶ τὰ λοιπά.

(a) Verba Autoris sunt, Τὸ δὲ ὅσα ἡδέως ἡ ψυχὴ δέχεται, ταῦτα ἱκανῶς ἐκπονεῖν ἐδοκίμαζε.

ercent

ercent; sic etiam actiones animi non posse ab ijs perfici, qui animum non exercent. Dein postquam asseruerit, exercitatione omnia bona & honesta comparari, maxime verò modestiam, subjicit; In eodem corpore voluptates animo insitæ persuadent ei, ne temperanter ac modestè se gerat, sed quamprimum & ipsis & corpori gratificetur. Cujus rei exempla Alcibiadem & Critiam proponit; qui, quamdiu cum Socrate versabantur, cupiditates inhonestas vincere poterant; postea verò in omnia alia abierunt. Mens quippe varios induit mores pro diversâ organorum conditione; in quæ plurimum valet consuetudo: Hæc enim, quæ acerbæ antè videbantur, post toleratu facilia, & nonnunquam grata & jucunda tandem evadunt, taliæque sine quibus vix beatis esse licet. Quomodo profectò accidit, ut qui studijs literarum assidue per plures annos mentem exercere soliti fuerunt, iidem si ipsis incumbere omittunt tam ægrè apud animum ferant, quàm hi, qui laboribus corporeis quotidie assueti eosdem interrumpunt, ac proinde in morbos præcipientes ruunt. Imò & mens ipsa languidiùs in rebus cognoscendis versatur, neque cum tantâ alacritate

tate opera sua peragit, quum cogitandi labor in desuetudinem abierit, dulcémque saporem deposuerit; quanta ei adest, quem nulla sine lineâ dies præterijt, nec tamen cogitandi fastidium invasit.





CAP V.

De Voluptate.

VOLUPTAS singulis ætati-*Voluptas*
 bus accommodatur, quò suaviùs *Ætatis*
 alliciantur homines ad eadem *cujusque.*
 peragenda, sibíve concilianda,
 quæ natura expetit : Ideóque ad primarium
 hunc scopum per varia ævi nostri tempora
 dirigitur. Siquidem ita jugiter res habet,
 ut quò fortius urget appetitus, eò sincere-
 rior dum isthic ritè expletur, fluat volup-
 tas.

Præterea plura ex hominis, quam bruti *Et tempe-*
 cujusvis fabricâ oriuntur desideria, quibus *ramenti.*
 voluptates respondent ; nonnulla itidem
 temperamentis diversis singularia : Quibus
 superadduntur mores educatione intro-
 ducti usúque confirmati ; unde nova inter-
 dum nascuntur desideria, quæ peculiarem
 quan-

quandam gratiam voluptatibus conciliant,
ac vim ijs asciscunt.

*Infantia
prima.*

Nempe prima infantia motui violento inepta, novo lucis splendore blandâque nutricis loquelâ, lactis dulcedine ac leni gestatione gaudet, neque iisdem initio nisi parcè, atque eatenus ferè, ut repleta somnum capeffat. Molles quippe adhuc fibræ ad liquorum naturam tam propè accedunt, ut vix ulla vestigia memoriæ impressa teneant, quin citò, tanquam aquei divisi atque iterum nullo inhibente confluentes, unam ferè sine ullis apparentibus signis indiscretam præbeant faciem.

*Causa
ejusdem.*

Ideo verò pauca isthæc tunc temporis conducunt, quia nondum amplius vult natura, quàm ut vitæ sensûsque tenellæ agantur radices, ac ne vitalis lampas recens accensa idoneo ad sustentandum pabulo destituatur. Quî fit ut ad hoc operis utilia imprimis sola curet. Incipit ergo infans à vagitu auxilium necessarium deposcente, & risu dein blanditur, qui veluti hâc ratione parentibus rependit, quicquid curæ sibi infumtum est, charitatèque novas accendit. Unde gaudia hoc ævi tempore

pore sincera & profusa, absque quibus fanitas vix constat, attamen hæc ipsa sine éorundem perinde atque dolorum recordatione.

Proximo ævi stadio dentes se attollunt, *Proxima*
ætatis.
cæteraque vocis organa ad articulatè loquendum comparantur ; pedes ad ambulandum firmiores evadunt, totúmque corpus agilius redditur. Idonea igitur huic ætati voluptas est exercitatio levis summè varia, cùm organorum vocalium, tùm pedum corporisque artuum mollium mirèque flexilium. Quin & eduliorum potionumque dulci ferè sapore oblectatur. Quæ videt auditque imitari gestit, præsentibúsque lætatur, vix præteriti boni malive memor, futurive cauta. Recordatione tamen simplici rerum sonorumque singulorum præpollet ; quæ nondum tam fida, quàm mox insequenti tempore. Verùm plura nova cum voluptate indies experitur, ac lætitiâ propè perpetuâ, modò adsit fanitas, fruitur.

Deinde quando ad conficiendum alimēta valentiora ætas adhuc firmior comparata fuerit, scopus ad quem diriguntur
Puerilis.
volup-

voluptates is est, ut corpus in proceritatem evehatur, perinde atque robur adaugeatur. Hinc pueri ludis varijs ad fatigationem agitati lætantur, quos plurimum juvant quaquaversum jactationes. Quippe quibus tramites ad alimentorum facultates intromittendas adaperiuntur, tubulique minutissimi paulatim evolvuntur, atque extenduntur ut ad debitos usque terminos jucundè ampliuntur.

*Quales
tunc tem-
poris pan-
duntur do-
tes & vo-
luptatum
fontes.*

Durante hoc ævi spatio memoria maxime viget, & quæ complectitur, hæc usque ad feros eidem annos hærent. Quod igitur vitæ tempus singulis rerum generibus nominibûsque addiscendis dicari solet. Qualia quidem faciliùs ferè tenet, quò alacriùs ad ludendum se accingit, & voluptatem exinde vividiùs sentit, avidiùsque percipere studet. Nunc animi dotes superioris ordinis sese spectandas pandunt; imagines novæ ad similitudinem earum, quæ visibus objectæ sunt, effictæ conspiciuntur, æmulique eorum quos audit sonorum toni modulique tentantur, atque omnia, quæ coætanei aut potius sese paulò
maior-

maiores natu aggrediuntur, admiratur conaturque. Nunc & à falso verum fecernere cupit intellectus, ac rectum pravumque sibi conscire incipit : Solertiam ad puerilia tractanda dein adhibet, vimque indagatricem rerum celatarum eòusque ostendit, ut qualis futura sit posthac mentis potestas hâc ætate observantibus patefacere consuefcac. Et quid ni inter parvos hosce latentem requiramus scriptorem, quisquis ille fit, qui seculum ingenij fertilitate exculturus est ? Qui scilicet laudibus debitis quidem, sed à coætaneis ipsorum dum viverent propter invidiam negatis, majores aliquando cumulet ; ac dein eorundem æmulus inter clarissima orbis literati sidera resplendeat. Propterea illiusmodi teneris at fœcundis ingenijs optandum, ut exemplaribus non modò priscorum, verùm & nuperorum, imò & hodie aurâ æthereâ vescentium, quibus mens diviniore est atque os magna sonaturum, ne destituantur ; ut, quando ætas adoleverit, memoriâ cum voluptate tenentibus, quos ad vivum suaviter delineent, eorum omnium virtutes repræsentare æmularique libeat.

Nempe

*Eorum
summa.*

Nempe oportet pueris, qui ad tanta nati sunt, illiusmodi adesse studia ; quò feliciùs à voluptate maturiori ævo, quando robur corporis justo tempore ad summum perductum fuerit, destinatâ ijdem nec ingratè revocentur. Quæ autem ad hæc usque ævi tempora spectant, Paulus (a) paucis complectitur ; *Posteaquam lacte nutriti infantes desierint, liberiore eis modo & suo ingenio hilariter vivere permittemus ; exercitia autem & alimenta leviora. Ab anno sexto & septimo tum pueri tum puellæ, literatoribus blandis humanisque tradentur ; tales enim cum animi remissione & gratiâ docent. Animi autem relaxatio ad probam corporis educationem plurimum adfert momenti. Duodecimum annum egressi ad Grammaticos jam & Geometras mittendi sunt ; corpusque suum exercere oportet. A quarto decimo usque ad primum & vigesimum mathematicis disciplinis & sapientiæ studio incumbent : Exercitijs pluribus propter corporis robur credentur, ut & animo & corpore laborantes à libidinis impetu coërceantur. His etiam vinum circumcidendum est.*

(a) L. I. c. 14. Vertente Guinterio.

Adolescentiæ quippe sanguis postquam *Adolescentiæ dotes & nata inde voluptates.* accendatur, exinde eandem vim sibi occultè indies crescentem veluti novum quendam voluptate minimè carentem ardorem concipit; quem pari passu comitatur partium symmetria, nec non qui spectantibus laudatur color vividus, vultus ferrens, oculi amores jaculantes, venustas, ceteraque quæ jucunda intus omnia commostrarant. Quin & laudibus gaudet, & benevolè cuique merita retribuere æmula, nondum invida, quaritat; quâ ratione virtutum socialium fundamenta in eadem jaciuntur, atque ipsæ ibidem florent. Hic verò amicitiae exurgit fons, qualis per totum vitæ curriculum latos ferre solet fructus. Simplex interim amoris illecebris trahitur, eique imperanti libenter paret. Quâ in re quippe ad conservandum genus utilem voluptatem natura profundit; felicesque operarum conjugaliū dulcedine intensissimâ tangit: Adeo ut hæc à (a) vate, qui Epicuri placita caneret, nomine voluptatis speciatim signetur.

(a) Lucret. L. I. v. 1.

Æneadum genitrix, hominum Divomque voluptas.

E

Amori

*Amor et-
que subor-
dinata vo-
luptates.*

Amori ergo tanquam principi plures alia voluptates famulantur, quæcunque amœnitate suâ juvant, animos addunt menti, robur corpori impertiuntur, atque ad sanitatis summa perducunt juga. Huc faciunt quæ formam perpoliunt, mundus ille, ornatus, cæteræque omnes elegantia, quæ gratiores reddunt amantes. Proinde Veneris subridentis Gratias Poëtæ canunt comites, ministrantes quæ decent : Sunt verò eadem (a) splendor oculos pascens, morum animi suavitas, atque flos demum ille felicitatis sodalitiæ, qui in convivijis enitet.

(a) Hesiodus docet, Jovem genuisse ex Themide [quæ vox jus falsque denotat] Eurynomen [videlicet latè id ipsum distribuentem] : Dein ex Eurynome tres Gratias, quarum ex palpebris amor membra solvens contuentium destillat.

Τρεῖς δέ οἱ Εὐρυνόμη χάριτας τέκε καλλιπαρῆες
 Ὀπεανὴ κέρη πολυήρατον εἶδος ἔχουσα,
 Ἀγλαΐην, καὶ Εὐφροσύνην, Θαλίην τ' ἐρατεινήν.
 Τῶν καὶ ἀπὸ βλεφάρων ἔρος εἴβeto δερκομενῶν
 Λυσιμελῆς· καλὸν δὲ ὑπ' ὄφρουσι δερκιδόνται.

Theog. Hef.

Præte-

Præterea ex hoc tanquam fonte oritur ^{Amor com-}
 volupe illud, quod oculos aurisque & ani- ^{plurium}
 mum ipsum demulcet. Amoris quippe ^{causa.}
 est pulchritudinem undiquaque semet of-
 ferentem venari; nec finibus angustis con-
 tentum esse, verum omnia longè latèque
 diffusa ornare, ex quibus amœnitas ubivis
 visibus grata evadat, aurisque toni suavio-
 res alliciant. Ut taceam cæterorum sen-
 suum oblectamenta, quæ fomites huic ig-
 ni ne desint curant; ab eoque invicem su-
 am vim aciemque exquisitam mutuò ac-
 ciunt. Quò nimirum tendunt gustus
 delicie? Quò suaveolentium gratiæ?
 Quò tandem tactus delicata subtilitas?
 Quales quidem à sensibus perceptæ volu-
 ptates ad animum etiam assurgunt; ve-
 runtamen ab amoris officijs excitantur, at-
 que exinde apud homines tantum valent.
 Quemadmodum disertissimus ille (a) Ro-
 manorum, initio ab auribus sumto, quæ
 oratoris vim maximè sentiunt, ad animum
 prodidit; *Qualis est hæc aurium, tales sunt*
oculorum & tactionum, & odoracionum &
saporum, quæ sunt omnes unius generis ad

(a) Cicero Tusc. Quæst. L. 4.

perfundendum animum, tanquam illique factae voluptates.

*Voluptates
ab amore
pendentes.*

Proinde ab hâc voluptate pendent non solum modorum ex arte musicâ petitorum gratia & voluptas, ac eorundem ad animum irritandum mulcendûmve aptitudo ; sed & hinc suas facundia catenas ; sua (ut ita dicam) philtra mutuatur. Hinc & molles meditatur carminibus numeros Poëtica, quorum vis ex eodem jucundo sentiendi modo elicitur ; etiamsi idipsum, unde singula ejusmodi perplacent, mentem fascijs amoris devinctam prorsus fugiat. Sudet licet philosophia nobiliores voluptatis causas explorando, vix alias priores inveniet, quàm quod in amore insunt ea omnia, quæ tanti apud homines momenti æstimantur ; ex cujus celati pharetrâ isthæc infixæ animis audientium tela deprompta fuerint. Inde fit ut sermones salibus conditi, uti & ipsa sapientia severior, qualis cum amore non conjungitur, aures non modò captare, sed & fastidium parere soleant.

Propen-

Propensionem verò in hanc voluptatem à naturâ adeò valentem observârunt vetustissimi scriptores (a) Græci, ut Amorem inter primores Deorum recenserent, ejusque potestatem in cunctorum animum ac providum mentis consilium celebrarent. Unde & omnia primò in pulcherrimum prodijisse ordinem, ac eodem etiam amore cohærere ; aut si vi fortè divellantur partes, iterum cæco ejusdem impetu ad se mutuò trahi. Amorem quippe senserunt

*Amore
mundus
continetur
ex mente
veterum ;
ejusque po-
testas.*

(a) Nempe addiscimus ex Philosophis Poëtarum interpretibus, mundi fabricam ex confuso Chao in telluris solum substratum tanquam basin Jovis imperio, seu Aëri atque Atmosphæra, ubi venti nubésque colluctantur, expansam fuisse, Tartarâque Ditis regna inferiùs depressa ; dein verò per amorem constare, partésque ejusdem simul ac universi mundi, alteram in alterius amplexus perpetuò tendentem, contineri : Non secus ac recentiores easdem attrahi monuerunt. In antiquissimo illo Hesiodi opere, ubi Deorum generationem, mundi scilicet fabricationem, complectitur, Chaos, Tellurémque & Tartara proximè insequitur Amor ;

Ἦδ' ἔρος, ὃς κάλλιστος ἐν ἀθανάτοισι θεοῖσι,
Λυσιμελής, πάντων τε θεῶν πάντωντ' ἀνθρώπων
Δάμναται ἐν γήθεσσι νόον καὶ ἐπίφρονα βελήν.

ad primariam pertinere mentis ipsius sedem, stirpémque esse, unde cæteræ voluptates fructus quæque suos collegerunt. Eundem itidem pariter valere opinati sunt ad universi partes conjungendas, atque ad homines in societatem congregandos; ideóque hunc Deum

———*Ire per omnes*

*Terrasque, tractusque maris, cælumque
profundum.*

*Honor ei
conjunctus.*

Quidnam autem est Patria? Nónne cognatorum, eorúmve, qui in similes consentiunt amores, sedes? Cujus causâ dulce & decorum esse mori honor edicit. Qualis quidem ingenui est animi voluptas, quem nobilis ille ardor dulcedine eatenus tangit, ut labores nullos non perferre, nulla pericula non adire gestiat. Honorem ergo semper comitatur amor, neque sine ipso intelligi potest; maximè verò is, qui militari nascitur gloriâ; unde non abs re Poëta (a) rerum naturam pandens, Veneri

(a) Lucret.

Mavortem æterno devinctum esse amoris vulnere, cecinit.

Nil miri igitur si eodem ævi tempore, ubi amor æstuat, & ad summum effertur, omnia civilis vitæ officia præcipuè coli, & cum ejus refluxu negligi consueverunt. Idem & in disciplinis usu venit. Unde quoque per hoc ipsum spatium messis colligitur, & vitæ fruges reponuntur, quæ ad senectutem alendam conquiruntur. Interim omnes hæ voluptates cum recordatione conjunctæ augentur pro gratâ memoriæ impressione, adeò ut desiderium sui relinquere soleant. Reverà bona voluptatum pars, quas sapiens optat, de eo genere sunt, ut se fruiturum repetitis speret, quasque animo revolventi nulla poenitentia detur causa. Tales verò habentur, quæ ad sanitatem utiles deprehenduntur; nempe quales natura ut sibi bene sit deposcit. Siquando enim modo peccent, vires pristinae amissæ monent; idque dein sentientibus præstolandi causa est, usque dum eadem restitutæ fuerint. Quibus profectò accedunt animi ipsius voluptates, gaudiâque non immista sensuum externorum officijs, quæ prudens quisque

*Quomodo
volupta-
tum com-
moda de-
cerpenda.*

sibi conciliat, quam primum satis diu in vitâ manserit; quas quidem tanquam mentis opes recondit in provectioris ætatis solatia.

*Voluptas
seræ æta-
tis.*

Voluptas quippe seræ ætatis illiusmodi propè videtur, quam Poëta (a) depingit; qualis cernenti magnos juniorum labores, affectusque indomitos reprimen-

(a) Suave mari magno turbantibus æquora ventis,
E terrâ magnum alterius spectare laborem;
Non quia vexari quenquam est jucunda voluptas,
Sed, quibus ipse malis careas, quia cernere suave est.
Suave etiam belli certamina magna tueri,
Per campos instructa tuâ sine parte pericli.
Sed nil dulcius est, bene quàm munita tenere
Edita doctrinâ sapientum templa serena;
Despicere unde queas alios, passimque videre
Errare, atque viam palantes quærere vitæ,
Certare ingenio, contendere nobilitate,
Noctes atque dies niti præstante labore,
Ad summas emergere opes, rerumque potiri.

Lucan.

Libri secundi initio.

Quæ sanè certamina ad mediam ætatem præcipue spectant. At profectò suavissimum futurum est, juvare pariter posse quos ita laborantes cernis: Nec citra idipsum naturæ bonitas sincere fruitur voluptate; quippe cui alienis malis, si non lædi, tamen asperius tangi contingat.

tium,

tium, quibus tanquam fluctibus jaçantur, ideo suavis est, quoniam ipsa olim experta istiusmodi mala, miseris succurrere didicit. Siquidem juvat, non solum sese extra isthæc tela positum nôsse, sed & consilijs auctoritatèque sapientiæ, laborantes, si non à difficilibus omnino tutos, incolumes tamen eripere, salvósque demum officijs sibi devinctos præstare. Ideoque nil senectuti mente bene sanâ præditæ dulcius est, quàm literas eòusque excoluisse, prudentiámque sibi omnimodâ experientiâ acquisivisse, ut non planè otiosus spectator aut inconsultus in serotinis vitæ scenis appareat.

Quâ re motus Socrates, postquam ad senium devenisset, accusatus nullâ defensione uti voluit, uti testatur Xenophon, qui Hermogenem Socratis familiarem laudat asserentem talia ab ipso fuisse dicta ;

Illustratur exemplo Socratis.

An nescis nulli me hominum ad hunc usque diem vitæ integrius ætæ laudem concessisse ? Nam quod jucundissimum est sciebam, mihi vitam omnem sanctè ac justè transactam. Quo fiebat, ut & ipse magnam ex me voluptatem caperem, & animadverterem familiares meos idem de me sentire. At si nunc

etas

etas mea progrediatur ulterius, scio necessarium esse, ut quæ senectutis sunt mihi quoque contingant ; nimirum ut pejus videam, minus audiam, ad discendum minus idoneus sum ; eorum verò, quæ didicerim, facilius obliviscar. Jam si animadvertam deteriorem me fieri, gravitèrque hoc feram, quì dicere possim, me jucundè victurum ? Fortassis etiam, inquit, Deus hoc mihi ex benignitate præstat, ut non solum opportuno ætatis tempore vivendi finem faciam, sed etiam ratione longè facillimâ. Nam si modò condemnatus fuero, manifestum est, posse me uti mortis genere, quod lenissimum esse judicatum sit ab ijs, quibus hoc cognoscere curæ fuit, minimumque negotij sit exhibiturum amicis, quod denique in moriente maximum desiderium excitat. Quippe quum nihil indecori neque offensionis in animis eorum qui adsunt relinquitur, & ita quispiam extinguitur, ut & sanum habeat corpus & animum, qui comiter agere cum alijs queat ; quì fieri potest, ut hoc non sit optabile ?

*Qui & in
Prytaneo,
locum sibi
debitum
censebat.*

Propterea mos apud Civitates sapienter
& feliciter constitutas invaluit, sedes hono-
rificas senibus, qui bono publico per
vitam anteaçtam consuluerant, tribuen-
das

das curare ; ubi metu egestatis semoti cum dignitate alerentur ; ita tamen ut eorum interesset, tanquam patriæ suæ parentes haberi, & nequid in publica pecetur commoda, à quibus sua etiamnum pendent, prospicere ; atque experientiæ suæ auxilijs quodocumque tractatu difficilia rempublicam administrantibus occurrerent, perpetuò adesse. Hujusmodi locus erat Prytanéum Athenis in arce dignissimus, ubi judices & magistratus habere consilium solebant. Ibi etiam alebantur publicè, qui bene meriti erant de Republicâ ; qui honos apud Athenienses maximus habebatur. Ac proinde Socrates, postquam sibi rectè factorum coram judicibus meminisset, *Eorum, inquit, gratiâ, quæ à me gesta sunt, censeo me in Prytanéo ali debere,*


Nempe ea suprema est ultimæ ætati voluptas, ut dignitate apud suos emineat, postquam cæterarum rerum usus eidem vix suppetit. Hoc quippe novum quiddam, quale in vitâ nondum attigerint, fastigium videtur, ideóque velut aliquid ijs ultrà expetendum proponitur. Cujus sanè vice ad opes cumulandas tanquam fidum

Ratio ejusdem.

dum honoris fulcrum ac tutum sibi perfugium, frequenter animum seniores adjungunt. Quod quidem rarò ijs laudi cedit; verùm sæpe odium ac contemptum devocat; utpote qui ea sibi acquirere magnopere nituntur, quibus juniores indigent, dum ipsi jam detinentes uti nequeunt. Quicquid sanè eò tendit, ut (a) alacritatem animo addat, neque dolorem pariat, hoc quidem senibus curæ esse par est; & quodcunque de genere hoc experiuntur, idipsum sibi conciliare prudentiæ esse haud vulgaris videtur.

(a) Verbis videlicet Lucretianis, — *Ut cùm Corpore sejunctus dolor absit, mente fruatur. Jucundo sensu, curâ semotâ, metuque.*





C A P. VI.

De Dolor.



D alteram istam organorum mentis conditionem, quæ cum dolore conjungitur, hinc transeundum. Is autem perpetuò index fit mali alicujus, quod nervæ fibræ patiuntur, utrùm hoc à corpore ipso læso, vel à primarijs mentis facultatibus integro prius corpore ipsis inferatur. Siquidem molestiâ suâ veluti apertè declarat sublevando opus esse, dum ad locum ipsum quasi digitum intendat, ubi aliquid adest vitij; unde malè habentes nervi id ipsum principi mentis facultati denunciant. Duplici proinde fonte exoritur dolor, ubi aut mens ipsa corpus, aut corpus mentem afficit. Utroque interim nomine læditur corpus; verùm nisi facultatum mentis primariorum organa patiuntur, mens integra manere solet. Quæritur ergo de dolore, quænam

*Qualis &
quosuplex
dolor.*

quam sit sedes ; utrùm ab initio eidem affixus fuerit, vel omnino moveatur ; dein quodnam illius genus, qualisque gradus sit.

Sedes diffusa per uniuersum.

Quod ad sedem doloris attinet ambitus diversimodè porrigitur ; ac interdum dolorem per uniuersum corpus, interdum per quasdam partes distributum æger sentit : Nonnunquam etiam ubi totum occupavit, vehementia non ubique eadem est. Id quod febricitantibus accidere non inusitatum est, qui nullam non partem laborare, at interdum hæc partes leuius quàm illas pati queruntur. Est itidem ubi externæ gravius quàm internæ dolent ; qualiter nonnunquam se habent Rheumatismo laborantes.

Vel partes.

Interdum autem ubi plures patiuntur partes, aliquid ejusmodi ipsis datur commune, ut, dum dolor hisce ingravescat, illæ subleventur. Quod si fiat, verisimile est itinera inter ipsas, quantumvis celata, servari aperta, per quæ vitiosa subitus labuntur.

At

At si unica pars afficiatur, aut fines *Intra la-*
 sedis latiores sunt, aut in unum aliquod *tos vel an-*
 quasi punctum dolor desinit. Quòd si *gustos cas-*
 parti alicui latius insidet, quamvis inibi *cellos.*
materia peccans vasa plura premat dis-
 tendátque, paucioribus tamen leniri sæpe-
 numero potest, quàm alter iste, ubi an-
 gustis loci terminis vitiosum altè infixum
 & coarctatum hæret, quòdque ideo non
 nisi magno negotio divelli queat.

Hæ interim partes vel nobiliore donan- *In nobili-*
 tur sorte, aut saltem eâ quæ utilem tali- *bus vel mi-*
 bus operam præstet; vel quales in honore *noris mo-*
 eò usque non sunt. Prioris generis sunt *menti par-*
 capitis pectorisque vel lateris dolores, quí- *tibus.*
 que siti sunt in sedibus emunctoriorum, quæ
 ipsis inserviunt: Qui utpote majoris mo-
 menti curam exquisitiorem desiderant, quàm
 ubi à visceribus nobilioribus remotæ partes,
 cæteris nimirum paribus, afficiuntur.

Fabrica autem sedis vel eâ ratione con- *Fabrica*
 stituitur, quæ citò id quod dolet dimittat, *sedis.*
 vel quæ detineat, & quali hære hoc ip-
 sum diu consuevit. In hunc modum ven-
 triculus brevi viscosa ægritudinem parien-
 tia

tia rejicere solet, sed qualia saepe nonnullis non nisi majore nisu pelluntur.

*Ex sede
diagnoscun-
tur dolores
animi &
corporis.*

Quinetiam ex sede proficiscitur, quòd dolor, quem ægrotus corpore læso patitur, diagnoscendus sit ab hoc quo animus afficitur, ex mœrore vel gravi aliquâ mentis perturbatione, ex amore, odio, iræ aut metu ; ex spe vel desperatione, omnibusque qui atræ bili imputantur doloribus, quique pectora affectibus istiusmodi obnoxia sæviùs torquent. Qui sanè tam multiplicem varietatem sortiuntur, quantà facultas imaginatrix vi prædita sit aliena pro veris fingendi, ipsèdemque, veluti malis re ipsâ undique urgentibus, principes mentis facultates occupandi.

*Ut & do-
lores sin-
gulares.*

Ex sede quoque oritur maximè inquietudo atque ægritudo, & vertigo ubi omnia circumacta apparent ; sicut itidem symptoma illud, quum arcto quodam vinculo colligatus esse sibi æger videtur. Hinc similiter evenit, ut hic torpore laboret, utque ille animum labascentem ejusve deliquium sentiat ; ut alij motus involuntarius accidat, qualiter ubi pars se contrahit vel convellitur ; alij verò motus impediatur,
ut

ut si quando pars nutui mentis aut ægrè aut non omnino obediat. Nec profectò o-mittenda est gravis ac perpetua in soporem proclivitas, vel è contrà, quando in vigilijs pertinacibus rigidæ aut distentæ sint nervorum fibræ.

Ad calcem horum subnectendum mentis ipsius ab officio amotionem, quæ per *Defectus mentis.* exacerbationes remissionesque dolorum in proprijs locis cernitur; quæ & aliquando eò usque obtinet, ut nulla integritas revertatur. Interdum etiam ad mentis defectum deventum est; qualis fit in morosi, ubi facultas princeps interdum aboletur, aut è medio tollitur vitâ adhuc durante. Quæ quidem ad usum partium, à quarum integritate nobiles mentis functiones pendent, referenda videantur.

Porrò ad sedem præsertim pertinet, *Dolores erratici.* quòd dolor huic affigatur loco, vel in alia atque alia digredi, aliquando etiam per errorem quasi viam quæritans, videatur. Videndum igitur an erraticus dolor huc illuc divagetur, adeò tamen ut in veterem subinde locum remeet: Ubi advertere est sedem, quam nunc obtinet,
F pariter

pariter atque illam, quò deferri solet. Qualia quidem Arthriticis itinera notantur, per quæ ab articulis hisce in illos discurrit, revertiturque ad eosdem dolor.

Doloris genus ex sede varium.

Priusquam verò varia doloris genera recenscantur, observare non alienum erit, eadem itidem diversa esse pro singulis sedibus ; quale est parturientium, ac straguriâ laborantium ; uti & reliquorum ejusmodi, de quibus suprâ mentio facta fuit, dum de fede agebatur.

Doloris genus.

Deveniendum hinc ad doloris genus ; siquidem alius continuatur, qualis neque se omnino remittit ; alius intermittit : De quo rursus dispiciendum, an brevi recurrat ictibus veluti repentinis verberans pulsansve, an per circuitus quasi præstituto & præcognito revivendi tempore : Denique, utrùm corpore quiescente non afficiat, at, dum movetur, urgeat.

Secundùm sentiendi modum.

Præterea autem doloris genus notare est secundùm sentiendi modum, veluti hic, qui ægrum, quasi grave aliquid sustineatur, premit ; vel ille, qui perinde lædit, ac si quis obtusâ & durâ quâdam materiâ percussus

cussus esset, vel itidem acutâ quâvis, sitne hæc pungens, cædênsve aut lancinans, mordens aut etiam rodens; aut demum urens more frigoris, aut etiam æstûs ardentis. Huc pertinet id genus dolor, qualis compressis aut ligatis accidit, aut qualis distentis aut vellicatis; qualis etiam ulcerosis adest.

Quinetiam genus doloris distinguendum pro ejusdem origine, utrûm hæc ducatur, eò quòd id deficiat, vel exuperet, quod natura optat: Quemadmodum fames fitisque habent, quales à morbo non proveniunt, ac lassitudo à nimio labore ortum trahens; *ut è contrario, dolor, qui ex alimentis largiore copîa ingessis oritur.* *Et originem.*

Postremò doloris gradum advertere licet, juxta quem intensior aut remissior, levior vel gravior est. Ubi sanè utilissima est doloris consideranda diversitas, quæ nascitur ex collatione cum viribus ægri institutâ, atque accuratâ observatione non modò quò usque ipse sentiat, verùm & quàm facîle ferat, vel quantâ cum anxietate eundem toleret. Nec minori illa attentione digna est, ubi notatur, quatenus

Doloris gradus.

superiores mentis facultates aut vegetiores manent aut læduntur ; & si posterius isthoc accadat, quanto majori vel minori earundem languentium aut deficientium angori conjungitur. Siquidem ex istiusmodi indicijs discere par est, hinc quidem ad quàm fortia statim remedia confugiendum sit, illinc verò, malùmne minùs efficacibus paulatim exterere præstet.





C A P. VII.

Quæ menti bona augent aut minuant.



T facultates mentis debito munia sua modo peragant, temperamentum motûsque circumfluatorum laticum ad naturas singulas accommodentur necesse est. Siquidem natura alia aliam eorundem temperiem, aliûmque motum exigit, quales ad amussim sibi conveniant. Quin & natura ipsa varios pro ætatibus singulis induit habitus, qui faciunt ut latices calidiores vel frigidiores, tenuiores vel spissiores evadant, utque celerius ipsi vel lentiùs moveantur. Quo nomine vehementes, exempli gratiâ, liquores aliam nimium naturam acuunt, atque ad insaniam propè adigunt, aliam verò ad acutè satis sentiendum duntaxat excitant. Quod ipsum de iisdem similiter naturis in varijs ætatibus spectatis liquidò constat.

*Qualibus
opus est ad
rite senti-
endum.*

Quali ratione sensus immittitur.

Ubi igitur temperamentum motûve laticum eo modo habent, qui naturæ minimè congruit, eadem faciunt, ut sentiendi facultas imminuatur. Nempe isthoc dupliciter fieri consuevit, seu alimentorum talium ingestione, atque exercitatione accommodâ, qualia robur corporis ad summum adaugent, sive penes quorum facultates non est latices evehere ad eum gradum, qui temperie suâ motûque cuius naturæ respondeat. Ab utroque ideo hebetior redditur sensus, quanquam à priori facultas locomotrix simul atque corporis totius vires promoveantur : A posteriore verò vigor potius sentiendi imminuitur, quàm acies facultatis retunditur. Enimvero in hunc ferè modum evenit, ut dum locomotrix facultas assiduâ rapidâque exercitatione robur sibi conciliat, & mobilitate viget, sentiendi facultas ea pati discat & adsuefiat, quæ sensu priùs acutiore omnino non potuisset. Exinde itidem fit ut nervi sensum illum acutissimum exuentes magis magisque indies velut callum quendam contrahant ; iisque non nisi hebetiores reddantur.

Sen-

Sensus interim dolore acuitur aut voluptate ; ille ut valentiùs sic & acerbìus elaborat, hæc aciem ejusdem subtiliorem reddit. Proinde quod dolore acuitur ingenium, rarò asperitate ; quod verò voluptate, rarò elegantia caret : Prius ferè cum robore, posterius cum ornatu conjungitur. Ad duras igitur res secundum, adversasque vi suâ perrumpendum prioris, ad vitæ civilis studia artesque excolendas posterioris opera utilior fit. Et priori quidem ratione rudes asperæque ac laborum patientes naturæ veluti exasciantur, quæ tamen morum suavitatis sublimiùmque animi cogitatorum expertes manent, quæque florum qui in mente rident cultiori infœcundæ esse consuêrunt, nisi voluptatis dulcedine poliri contigerit.

Sensus augetur dolore & voluptate.

Itaque inedia, qualis dolorem pariat, sollicitam porrò curam adipiscendi alimentum exuscitat : Ea verò, quò pressius urget, palatum minùs delicatum esse, nec vulgaria spernere propè jubet. Ac tametsi, modò appetitui satisfactum fuerit, dolor iste in præsens non ultra exacuat, memoriæ tamen impressum doloris

Dolor ex inedia accutur, & asperum reddit.

vestigium relinquit. Unde quisquis præmetuit ejusdem reditum ad laborem summo opere incitatur, cujus fructu famem in posterum etiam depellat. Interim acriter ac vehementer urgent eos curarum stimuli, quibus instat rerum summè ad vitam conservandam utilium egestas. Qui autem tam sævâ utitur magistrâ, qualis est ejus experientia, qui quotidie vel fame ipsâ, aut istius mox invasuræ metu torquetur, quantumvis roboris ex improbis laboribus ei accedat, non minus tamen asperitatis mores contrahant oportet. Quo fit, ut stomachus frequenter jejuniio depressus mentem vix ad alia quàm crassæ minervæ opera exacuat, neque eandem altiorum capacem reddat; nisi fortè secus se habeat in claris quibusdam exemplis, ubi vis insita, quam doctrina promovit, aliquos supra hominum sortem evexit.

*Exemplum
Epicteti &
Stoicorum.*

Cujusmodi exemplum dedisse Epictetus ille servus philosophus perhibetur, qui interdum victum labore quæritans, nocturnis lucubrationibus nobilem sibi mentem exercitavit, acutamque redditam servavit. Veruntamen ipsius philosophia uti

&

& Stoicorum omnium huic tanquam fundamento ut plurimum innixa est, ut sese abstinendo, dolorémque sustinendo à perturbationibus animi caverent, atque ut tandem ipsi earundem immunes perstarent. De quo philosophandi genere historici observârunt, id ipsum esse temporibus Neronis idoneum, similibusque iniquorum principum moribus ferendis : Nescio verò an ipsius Neronis ingenium hujusmodi disciplinâ non exasperatum fuerit, adeò ut mores Senecæ præceptoris severiores refugeret, atque ab iisdem tandem abhorreret.

Proinde licet dolori ex appetentiâ naturali orto primaria illa mentis sagacitas debeat, quæ ad talia conquirenda, qualia vitam simpliciter conservent, utilis videtur ; acies tamen ejusdem hoc pacto obtusior subtiliora vix pervidet, nec mala, quæ velut Vulcani retia laqueive graciles circumtexta sunt, vulgusque ferè latent, persentiscere consuevit. Idipsum igitur in causâ est, cur res domi angusta tantum impedimenti hisce objicit, qui curiosius in rerum fontes variâque earum naturam inspicere valent. Ut
pote

Actus inde non subtilis.

te quibus otia non dentur, molliâque vitæ, quæ tales decent, munia ; ubi de iisdem digna proferre, & cortices armatos, quibus disciplinarum ferè thesauri integuntur, perrumpere liceat : Qui nec athletico more victûve educi laterum pulmonisque labores exantlare queunt, neque cerebri adeò felices sunt, ut apud literarum rudes audacter tumultuari & seipsos impudentiâ humo tollere possint.

*Exempla
Aristotelis
& Horatii.*

Hinc ingens illud, quod in Aristotele eminet, ingenium ab Alexandro politum fuit, qui eidem copiam satis largam ex opibus suis suffecit, ut per otium literis cultioribus mentem ornaret, disciplinâsque ex naturæ dictatis nitidioris stylo exaratas traderet. Nec aliud planè Horatio, qui sæpe Aristotelis interpretis est, accidit ; cui otia, quæ voluit, data esse notissimum est. Nempe ingenia hominum morésque aulicos probè novit, & mirâ puritate omnia perscripsit, non tanquam victu solo simplici expletus, qui stomachum latrantem bene leniret, sed quasi à mensis secundis Divi conviva animi sensa verbis disertis exponeret.

Desi-

Desideria quidem à naturâ proficiscentia finibus angustis clauduntur, neque ultra hosce mentem exacuere consuérunt ; at quæ ex ijs procreantur, nec numero, gradu modove finiuntur. Quoniam verò non insolitum est propria cuius desideria modulo aliorum metiri, neque metas ipsis statuere alias ab hisce, quas noti atque æquales coram erigunt, hinc novum exoritur æmulandi desiderium. Nihil sanè humanas mentes, postquam in arctiorem societatem deventum fuit, vehementiùs suscitât, quàm æmulatio ; nihil æquè ad ingenia eliminanda prodesse solitum est. Ac propterea videmus communem seculi cuiusque sensum exaltari vel deprimi pro exemplaribus, qualia æmulari tunc temporis in more positum erat, utrùm hæc ipsa claro germanæ gloriæ splendore enituerint, vel qualia barbaries in locum eorum suffecerit. Nil igitur miri, si scriptores ævi apud Latinos purissimi, qui inter ipsorum classicos celeberrimi fuere habiti, propè convictores essent : Qui sanè, dum recentes Ciceronis in mente laudes tenebant, atque in Cæsaris succedentisque eidem aulâ versabantur, eò usque

*Desideria
naturalia
ex acqui-
sita ac-
cunt.*

que saperent. Imperatores dein sequentes pro variâ ac vitiosâ cujusque naturâ ejusmodi ingenia obtundere conati sunt usque ad Trajani ortum. Quo tempore tametsi puritas elegantiaque nunquam reverterentur, attamen libertas Romanos respexit, ac Tacito nobili asperitate suâ brevi licuit perstringere eorum famam, qui patriæ suæ dedecus vixerant, foedissimâque exemplorum spurcitie nomen Romanum dehonestabant.

*Quomodo
emulatio
acuit.*

Quicumque reverâ æmulus est laudis alienæ virtutes, propter quas alius laudatur, suspicit, & ex animo sibi æquales optat : Unde hujusmodi æmulatio ab amoris affectu tela sua, stimulos, flammâsque accipit. Itaque vicissitudo quædam doloris ac voluptatis in æmulatione probâ recurrit : Adeò ut nunc ille asperitate suâ incitet ; nunc hæc suaviter polire studeat, naturæque germanam amœnitatem superinducat. Quapropter ingenij cultura vix feliciter cedit, ubi exemplaria desunt, qualia ob oculos perpetuum laudata intueri licet. Ideoque simul ac artes eò provectæ fuerint, ut nihil insuper ex earum professione cultu dignum speretur, eadem citò deficiunt ; quoniam eæ languent

guent in pectoribus curæ, dum non perpetuò cotes suppetunt recentes, quales novorum ævi sequentis hominum mentem acutam reddere vāleant. (a)

Ad

(a) Velleius hoc Argumentum Libro primo fusiùs tractavit ; & postquam de Græcis scriptoribus ac dein Romanis idem observârît ad oratores ita progreditur. *At oratio ac vis forensis, perfectumque prosæ eloquentiæ decus, ut idem separetur Cato (pace Crassi & cæterorum dixerim) ita universa sub principe operis sui erupit Tullio ; ut delectariante eum paucissimis, mirari verò neminem possis, nisi aut ab illo visum, aut qui illum viderit. Hoc idem evenisse Grammaticis, Plastis, Pictoribus Scalptoribusque, siquis temporum institerit notis reperiet, & eminentia cujusque operis artissimis temporum claustris circumdata. Hujus ergo præcedentisque, inquam, seculi ingeniorum similitudinis causas cùm semper requiro, nunquam reperio, quas esse veras confidam, sed fortasse veris similes : Inter quas has maximè. Alit æmulatio ingenia ; & nunc invidia, nunc admiratio incitationem accendit ; naturæque quod summo studio petiturum est, ascendit in summum ; difficilisque in perfecto mora est ; naturalitèrque, quod procedere non potest, recedit. Et ut primò ad consequendos, quos priores ducimus, accendimur : Ita ubi aut præteriri aut æquari eos posse desperavimus, studium eum spe senescit ; & quod adsequi non potest, sequi definit ; & velut occupatam relinquens materiam quærit novam ; præteritòque eo, in quo eminere non possumus*
aliquid

*Sanguine
puro opus
est.*

Ad acuendum autem pro cuiusque naturâ sensum requiritur, ut sanguineus latex liberè canaliculos permeet ; ideóque ut à lentâ quâvis materiâ purgetur. Huc spectat cibi potionisque usus, qualia alimentum non nimis crassum suppeditant. Nec sanè adhibenda sunt ea victûs genera, quæ ex materiâ constantur valentissimâ, quæque ad robur præsertim corporis conducunt.

*Cœli aëris-
que tem-
peries, so-
lique salu-
britas.*

Quinetiam huc faciunt cœlum (b) ferrenum, & aër minimè crassus, non calore torridus, nec frigore inhorrescens ; non desiccatus, nec humore multo liquecens. Prodest etiam regionis salubritas, ubi solum propter stagna palustria minimè grave fit ; ubi quoque nec terra pinguis, aut quæ agricolas abunde beare solet. Siqui-

aliquid in quo nitamur conquirimus ; sequiturque ut frequens ac mobilis transitus maximum perfecti operis impedimentum sit.

(b) Etenim licet videre acutiora ingenia, & ad intelligendum aptiora eorum, qui terras incolunt eas, in quibus aër sit purus ac tenuis, quàm illorum qui utantur crasso cœlo atque concreto. Cicer. de nat. Deorum.

dem

dem in agro divite, qui alimentorum copiam profundit, ubi tantâ indigenis solertiâ non opus est, adinveniendi pariter facultas sopiri consuevit ; dum egestas non tam potenter à tergo urget, quin labore minus improbo assiduóque depelli queat.

Quanquam autem ex observatione constat, solum paludosum, crassumque inde aërem menti bona imminuere, atque è contrario egestatem eadem adaugere solitam esse ; posterior tamen plus ad acuendum quàm prius ad hebetandum valet. Cujus rei exemplum non è longinquo petendum, quum Batavorum ager pinguis & paludosus & inferiùs situs sit, qui victum incolis necessarium non præbet ; Atqui nullibi gentium artes magis excoluntur, quæ naturæ incommodis subveniunt. Hinc piscatorum quondam oppidula inter celeberrimas Europæ urbes caput extulerunt, & viri eruditione clarissimi hanc sibi patriam ornârunt.

Collatio eorum cum egestate.

Nec omittenda quidem inter ea, quæ menti bona augent, libertas ; uti etiam, inter hæc, quæ minuunt, servitium : Quorum

Et Libertatis cum servitio

rum prior nobiles eidem dotes alit ; alterum verò egregium illius partum plerumque extinguit, aut incrementum prohibet, atque inutilem sordidumve reddit.

*Vis mentis
promove-
tur educa-
tione.*

Quoniam verò initio nihil in mente comparet, nisi vis ei insita, quæ doctrinâ promovetur, atque in bonam frugem ritè culta maturescit, aut neglecta herbas noxias parturit ; proventus bonorum ac malorum educationi ut plurimum debetur. De quâ proinde agere par est, quatenus ad hoc argumentum illustrandum & absolvendum isthæc spectat.





C A P. VIII.

De Educatione.



RIMUM in educandis liberis videtur, ut bona innascentia serventur atque excolantur, malaque succidantur; nisi ea sint, quæ utcunque pravi insimulentur, radices tamen esse queant, unde virtutes maximæ emittantur. Tale scilicet quidam in animosis conspicitur, qui audaciâ pectorisque fortitudine sese frequenter in infortunia proripiunt, atque pericula adire coeperunt, quæ licet mala tunc temporis habeantur, postea tamen cognita sunt fuisse initia præclararum rerum à se gestarum, quales patriæ suæ utiles prædicantur; atque, ut nomen suum laudibus efferratur, tandem faciunt. Qui igitur prudens hisce ingenijs medetur, non animos frangit, sed eosdem in usus proprios vertit.

Discriminatio bonorum à malis.

*Educatio
diversa
pro vitæ
genere.*

Discrimen autem præcipuum advertere non alienum erit inter vitæ genera, ad quæ diversa dein educatio adhibenda est; prout hunc vel illum habitum adaptare juvenibus par est. Nempe duo genera sunt, sub quorum vexillis singula reliqua militant; rusticum ac sylvestre, vel urbanum & civile: Quibus accedit militare ex utroque mistum. Hisce igitur adaptare est educandi modum, ita ut animi dotes, quæ in utrovis eminere inter alias possint, in eo genere, quod ratione vel sorte datum est, ne desiderentur.

Sylvestre.

Sylvestre autem vitæ genus antiquius fuisse ex veterum monumentis discimus; quippe quod se habet naturæ more rude ac incultum; at non tam bonorum mentis fœcundum. Non enim in eo genere varietas tanta est rerum, circa quas cum laude mens versari potest; neque sane eadem difficiles & impeditæ sunt, quales ejusdem facultates exercendo ad summum acumen & peritiam perducunt, omnesque ipsam vires exerere, ac quæcunque in abdito jacent bona in lucem edere cogant. Siquidem hæc vitæ ratio robori corporis sanitatiquæ summæ conducit, potius

potius quam intelligendi præstantiæ. Alius propterea erat istiusmodi olim hominibus victus; qualis (a) ex terrâ nascentibus constabat. Is verò victus robustus ac ferinus in alium tandem mutatus est; quoniam multa & gravia ex istius usu homines patiebantur plurimi; quique naturâ debiliore præditi erant. Hi autem urbani ferè erant, apud quos (b) *major studio literarum disciplina agitari cæpit, quæ ut animo præcipuè omnium necessaria, sic corpori inimica est.*

Proinde ad imbecillas huiusmodi naturas opitulandas si non excogitata saltem exculta fuit medicîna. Quibus sanè educatio accommodare debet quæcunque remedia postea usui fore experienciâ cognitum fuit. Principio autem victus ex materiâ

Urbana.

(a) Οἶον τὰ ἐν τῇς γῆς φύμενα, καρπὸς τε καὶ ὕλην καὶ χόρτον. — Ὡς γὰρ ἔπασχον πολλῶτε καὶ δεινὰ ἀπὸ ἰσχυρῆς τε καὶ θηριώδους διαίτης σώματα, καὶ ἄκριτα καὶ μεγάλας δυνάμεις ἔχοντα ἐσφερόμενα. Περὶ Ἀρχῆς Ἰητρικῆς.

(b) Cels. in Præfatione.

mediâ convenit, non verò valentissimâ, quæ rarò tuta hisce naturis exhibetur : Exercitationes dein assiduè lenes, ambulatio præsertim ac gestatio ante cibum. Hisce consulendum etiam, ut primas vias perpetuò repurgatas habeant, útque id curarent maximè ne latices puri per minutissimos corporis tramites circulum non absolvant. Atque ita immodica omnia fugere par est, modò hisce cordi sit corpus menti adaptare, idque comparatum habere, expeditum ac prorsus idoneum ad illius principis ministeria alacriter & cum debitâ fide obeunda.

Milavis. Alterum vitæ genus est militare, ad quod educatio accommodare debet nonnulla ex utroque, ut dum in castris militet, valentissimis utatur juvenis cibo potúque, ac quando in urbe degat, transeat in ea, quæ urbanæ vitæ magis idoneæ sunt. Huc autem spectat ratio Heroës educandi Homero & Pindaro decantata ; scilicet apud Chironem in campis Thessalîs ; ubi eos non nisi equis insidentes è longinquo speculati incolæ Centauros, quasi ex humano cum equino corpore conjuncto constantes crederent. In scopuli
nempe

nempe antro ibi habitabat Chiron, qui & juventutem disciplinis ornaret, exercitiisque ac diætâ idoneâ roboraret. Medicus interim ille Chiron juxta ejus seculi sapientiam corpus mentemque excoluit, virosque per omnia sanos præstare, dignosque qui postea regnaturi essent, reddere studebat. Pindarus elegantissimo carmine illius modum naturæ convenientem descripsit; ubi tradit, qualis Jasonis educatio esset, antequam regnum Iolci paternum à Peliâ usurpatum peteret: Ea verò ex omnibus conflatur, quæ mentem feritate horrentem in mitem placidamque ac benignam emolliant, & quæ imperatorem bellicâ regemque civili virtute instruant imbuantque.

Hic autem operæ pretium videtur Jasonem Pindari atque celeberrimum illud Xenophontis Cyrum unâ sistere, ut ambo in eâdem quasi tabulâ delineati conspiciantur. Quorum quidem priori Chiron (Divinus appellatus) nomen ab arte medendi imposuit, quâ sanum fuisse eum redditum indicavit. Eductus quippe fuerat à primâ usque infantiâ per viginti in ejusdem antro annos, ac postea in urbem

*Exempla
Jasonis
& Cyri.*

bem Iolcum ab excelsâ illâ regione descendit ; ubi semet patri ostendit, qui eodem virorum jam pulcherrimo gavisus est. Itaque Jason in Thessaliâ, ubi & campi patentes jacent, atque equi alebantur optimi, nutritus erat ; ubi & herbe viribus valentissimis præditæ vigeant. Ex alterâ verò parte Cyrus in Perside primum vitæ tempus transegit, regione (a) montanâ, ubi quòd equi ægrè alerentur, atque equitatio incommoda esset, etiam equum conspici perquam rarum esset : Ubi itidem multò tum vestitus vilior, tum victus tenuior quàm apud Medos. Postea verò apud Medos, dum puer adhuc esset, solâ Medicâ delectabatur, & equitationis exercitio nimium quantum gaudebat. Quinetiam apud Pindarum (b) Jason redijt ex antro à Chariclo & Philyrâ, ubi à castis

(a) Ἐν Πέρσῃς, διὰ τὸ χαλεπὸν εἶναι καὶ τρέφειν ἵππους καὶ ἵππεύειν, ἐν ὀρεινῇ ὄσῃ τῇ χώρᾳ, καὶ ἰδεῖν ἵππον πάνυ σπάνιον ἦν. Κύρ. Παιδ.

(b) Τὸν δὲ θαρσύνσας ἀγανοῖσι λόγοις
 Ὡδ' ἀμείψῃ Φαμὶ διδασκαλίαν
 Χείρωνος βίσειν Ἄντροθε γὰρ νέομαι
 Πὰρ Χαριμλοῖς καὶ Φιλύρας ἵνα Κεν-
 ταύρος με κῆραι θρέψαν ἀγνοῖ.

Ubi notat Scholiastes, Ἡ διδασκαλία Χείρωνος, ἀλήθεια. Πυθ. Δ'.

Сен-

Centaury filii educatus fuit : Quorum mulierum fama eatenus inclaruit, ut ipse apud Peliam hanc sibi tanquam gloriam vendicaret. Ibi dum totum temporis spatium decurrebat, neque (a) sibi conscivit factum aut verbum illiberale. Interim hinc apud optimas illustrissimasque foeminas Jasonem educandi modus speciatim observatur, statim post factam mentionem Chironis disciplinæ, ex qua verbis suis Jason fidem astruit. Nihil sane magis asperitatem morum perpolire aptum videtur, quam apud foeminas illiusmodi cultissimas versatum fuisse. Qualis autem apparuit Jason ex quaesitis populi Iolci discimus, ad quem pleno jam foro adiit ; Utrum ipse Apollo, an verò Mars esset ; quorum prior sempiternum juventæ florem formamque præ se ferebat ; posterior verò, quicquid in militis personâ admirari homines solent. Negabant interim illi cives

(a) Εἴησι δὲ ἐκτελέσαις

Ἐνιαυτῶς, ἅ τε ἔργον

Οὐ τ' ἔπος ἐντράπελον

Κείνοισιν εἰπών.

ibid.

Otum esse vel audacem Epialtam, qui robore suo freti montes montibus imposuere; Diisque adversi fuere; Negabant esse Tityum raptorem magno & invenuto corpore: Verecundus quippe, non ferox aut immanis Jasonis vultus. Qualiter dein mens habebat ex responso ipsius patet, qui aperit omnia ad se pertinentia minimè verbis gloriam jactans, utpote qui patrimonium solum sibi vendicet, neque illud quidem omne à Peliâ occupatum postulet: Quippe qui potius cognitionem inter se Peliâque agnoscens eandem sacram præstare velit, nec armis aut vi quærere, quamvis jure posset. Habeas, inquit magnanimitas viri, Pelia, facultates quas à patre meo abstulisti, neque angunt animi opes tuæ: Quin tu sceptrum Monarchicum soliûmque majorum mihi sine molestiâ redde. Quum verò Pelias exponeret eam expeditionem, quæ ætati honorique conveniret, ostendit se tam arduis tractandis parem, conciliando sibi fortissimos quosque avi illius heroës unâ cum Orpheo poetâ. Unde demum Medeâ juvante, quam amore sibi devinxit, eandem regis Colchorum filiam conjugem, ac thesauros unâ domum
advex-

advexit. Quod quidem ut certius fieret, (a) Venerem introducit Poëta, primùm dono hominibus avem suam dantem ; qualis, simulac amantis persona pulcritudine ab omni parte absoluta est, eum retia tendere, fabellâ quasi amoris actâ, com- monet. Dein pietatem morúmque suavitatem exhibet obiter Poëta, dum Pelix primùm occurrenti, & quisnam esset quærenti imperturbatus responderet ; at Patrem priùs invisere cuperet, inque domo paternâ per dies quinque continuos, regalis more hospitij, consanguineos exciperet.

Jam verò, ut finem hisce exemplis faciam, Cyrus ille laudatus ex legibus Persarum duriter & temperanter (b) se pueri-

(a) Πότνια δ' ὀξυτάτων βελέων

Ποικίλῃν ἵγῃγα, τε-
τρακνάμον' Οὐλυμπόθεν,
Ἐν ἀλύτῳ ζεύξασα κύκλῳ
Μαινάδ' ὄρνιν Κυπρογένεια φέρειν

Πρῶτον ἀνθρώποισιν.

Ibid.

(b) Καὶ νῦν δέ ἐτι ἐμμένει μαρτυρία καὶ τῆς με-
τρίας διὰ τῆς αὐτῆς, καὶ τῆς ἐκπονεῖσθαι τὴν δίαίταν.

Αἰσ-

puerilibus annis habuit ; ubi, cùm pacis jura forensibus judicijs, tùm dein belli, exercitijs venatorijs cognovit ; unde artes varias homines capiendi discere confuevit. Adeò ut populos tandem Orientis volentes subjugum suum mitteret, omnesque iidem tanquam Patri obtemperarent.

*Officium
educantis.*

Denique educantis est illiusmodi omnia, quæ inter bona mentis augmentia priùs recensita fuerunt, eâ ratione adhibere, quâ mentibus singulis profutura sunt ; nempe eadem, quibus hæc vel illa eget, auxilia subministrando, corpusque perpetuò curando, quò jucundiùs cogitandi labores perferat, atque iisdem lætum potiùs frui, quàm ægrè ipsos pati videatur. Quale sanè accidere ijs sperandum est, qui ad talia apti nati sunt, si rite ad amuf-

Αἰσχρὸν μὲν γὰρ καὶ νῦν ἐστὶ Πέρσαις καὶ τὸ ἀποκτείνειν,
καὶ τὸ ἀπομύττεσθαι, καὶ τὸ φύσιν μετὰς φαίνεσθαι·
αἰσχρὸν δὲ ἔστι καὶ τὸ ἰόντα πρὸ φανερόν γενέσθαι, ἢ τῷ
ἔρῃσαι ἔνεκα, ἢ καὶ ἄλλῃ τινὸς τοιούτου· Ταῦτα δὲ οἱ
ἐν ἐδύναντο ποιεῖν, εἰ μὴ καὶ δικαίᾳ μετρίῃ ἐχρῶντο,
καὶ τὸ ὑγρὸν ἐκπονῶντες ἀνῆλυσκον, ὥστε ἄλλῃ ποι ἀπο-
χωρεῖν.

Κύρ. Παιδ.

sim habeat corpus, & si hoc quod dolet
haud imperitè tollatur, verùm jucundi
subsequentis sensûs quasi reciproco fluctu
absorbeat. Neque interim negandum,
quin naturæ quædam stimulis æmulationis
incitatur optimè agantur, aliæ itidem
frænis doloris acrioribus feliciùs interdum
cohibeantur, quæ dein à tristi malorum
experientiâ edoctæ ad illustrissima rerum
humanarum gubernacula non rarò evehuntur.





C A P. IX.

De percipiendi facultate.

*Mutatio
quævis in
percipien-
di modo
notanda.*



ACTENUS mentis cultus in universum ; jam de ijs agendum, quæ ad facultates singulas peculiari modo spectant. Ex illis autem prima est percipiendi facultas, quæ integra quidem constat, dum rebus singulis haud aliter mens afficitur, quàm sanis usu venit. At si modo, huic planè dissimili, quo sani solent, hæc apprehendit, fortiùsve vel languidiùs percipit, quærere æquum est, laborétne eadem vitio quopiam, aut quâ saltem ratione immutari contigerit. Siquidem mutatio quævis, quamdiu res menti subiectæ eadem manent, considerationem meretur, etiamsi facultas ipsa potius vigere quàm languescere videatur. Interdum enim fit, ut vitiosum quiddam, quod

quod organum aliquod percipiendi obfidebat, aliò transferatur; quale ijs accidit, quibus hâc quidem parte levatâ, alia dein gravetur : Interdum etiam ut, quicquid perceptioni obfiterat, penitus tollatur; id quod ex habitu morbo in sanum tranfeuntibus frequenter contingit. Qualis proinde mutatio licet aliena huic videatur, qui diurnâ perceptionis læsione affectus fuerit, non tamen diverfa est à more fanefcentibus ufitato.

Malum interea ducendum est, fortiùs *Malum interdum fortiùs percipere ac torpidius.* quàm par est res percipi, perinde ac si torpidius : Utrumque quippe materiam peccantem indicare solet, quæ nisi amoveatur, in hoc vel illud vitium curritur. Quemadmodum fibrarum tonus, seu nimis intendatur vel remittatur, naturæ munijs fungendis impar exinde evadit : Quale in vigilijs pertinacibus cernere est, æquè ac in soporem proclivitate. Atque ita quando ad fastigium sanitatis perventum fuerit, neque ultrâ progredi detur, attoniti homines fiunt, (a) *quorum & corpus &*

(a) Cels. L. III. c. 26.

mens super. Ac si stupor iste sublatus fuerit, læpenumero nervorum resolutio insequitur.

*Diversitas
juxta subtilitatem
vel celeritatem.*

Quod attinet autem ad percipiendi potentiam, magna hominum diversitas notatur, qualis à naturis ipsorum abunde provenit. Inde fit ut leves fugacēque percipiendi causæ nonnullas raro præterire soleant, quin unico mentis obtutu res integras, cujusmodi sunt, apertè concipiant; alias interdum eadem vix tangant, aut prosus fugiant; utque alijs itidem species rerum quantumvis adumbratæ, nulla tamen vestigiâ imprimant. Enimvero singulis debitus subtilitatis gradus præstitum videtur; supra quem transcendentes res minime percipiuntur; gradusque celeritatis, ultra quem ipsæ properantes copiam sui ipsarum ad satis diu intuendum non faciunt. Nempe hæc facultas exornatur non subtilitate modò verum & celeritate: Atque exadversum pariter peccato non caret, si ad crassitiem aut tarditatem spectes. Unde sanè diversitatem, quantacunque ex naturis hominum oritur, duplici hoc genere complecti licet.

Eòdem

Eòdem profectò recidit pleniori, quo nonnulli solent, modo concipere, ac subtilitate & celeritate, quibus idoneè ad res apprehendendas mens comparetur, vigere : Quoniam alij non ita vividè percipienti subtilitas deest ; dum alij cui eadem adest, hoc ipso temporis spatio rem citò nimis prætereuntem apprehendere incassum conari quidem licet, non verò eam assequi penès erit. In hunc modum aut incompleta atque evanida umbrarum ritu vestigia mens percipit, qualia haud altè imprimuntur, aut tanquam indiscreta vel confusa obijciuntur ; unde pingui duntaxat minervâ delineantur.

Sic intelligitur ferè stupor, qui huic facultati vitio nonnunquam vertitur ; scilicet non quasi apprehensio deficiat ; verùm quòd mens aut aliud agens quod adest negligat ; vel quòd non subtiliter res ipsas inter se distinguat ; ideòque aliam pro aliâ apprehendens monstra frequenter concipiat à rerum naturâ hominùmve consuetudine aliena, iisque inhians, atque talium admiratione occupata, stupore ut plurimum

*Nec ab his
alius est
plenior conceptus.*

*Vitium
stupor.*

munum notetur. Ad hunc modum Phædrus (a) historiolum tradit mali cujusdam futoris, quem rex urbis ad confessionem adegit, se non artis prudentiâ esse medicum, verum vulgi stupore factum nobilem : Ubi prius docuerat, quo ritu stuporem vulgo injiceret ; venditavit scilicet antidotum falso nomine, & verbosis famam strophis sibi adquisivit. Hic quippe tumido quodam scenæ inservienti eloquio miras antidoti vires prædicans admirationem sui

(a) Malus quum futor inopiâ deperditus,
 Medicinam ignoto facere cœpisset loco,
 Et venditaret falso antidotum nomine,
 Verbosis adquisivit sibi famam strophis.
 Hic, quum jaceret morbo confectus gravi
 Rex urbis, ejus experiendi gratiâ,
 Scyphum poposcit ; fusâ dein simulans aquâ,
 Antidoto miscere illius se toxicum,
 Hoc bibere jussit ipsum, posito præmio.
 Timore mortis ille tum confessus est
 Non artis ullâ medicam se prudentiâ,
 Verum stupore vulgi factum nobilem.
 Rex advocatâ concione hæc addidit ;
 Quantæ putatis esse vos dementiæ,
 Qui capita vestra non dubitatis credere,
 Cui calceandos nemo commisit pedes ?

L. 1. Fab. 14.

exci-

excitavit, quæ mentis luminibus officeret, utque ea obstupesceret in causâ esset. Et laudatus ille (a) autor præmissâ proximè fabulâ ostendit, quo pacto adulatoriæ laudes stuporem itidem creant; in quâ corvi à collaudante vulpe stupor deceptus est. Interim percipiendi facultas munus suum tam fideliter obijt vulgo descripto, quàm regi inibi laudato; sed vulgus hanc rem, qualis apparebat, simplex concepit, astutiam verò medicastri non calluit. Uti etiam in posteriore exemplo, quodnam blandientis vulpis esset consilium corvus ignoravit; at nisi probè vim laudationis

(a) Quum de fenestrâ Corvus [raprum caseum
Comesse vellet celsa residens arbore,
Hunc vidit Vulpes, deinde sic cæpit loqui:
O qui tuarum, Corvè, pennarum est nitor!
Quantum decoris corpore & vultu geris!
Si vocem haberes, nullâ prior ales foret.
At ille stultus, dum vult vocem ostendere
Emisit ore caseum, quem celeriter
Dolosa Vulpes avidis rapuit dentibus.
Tum demum ingemuit Corvi deceptus stupor.

Ibid. Fab. 13.

H

sensu

senſiſſet, eſcam ore minimè miſiſſet. Neque enim ſtupet hæc facultas, dum ſpeciem rerum veram atque ſinceram reddit, magis quàm viſus, qui rerum faciem, qualifcunque ſit, exhibet. Ac propterea obſervandum, ſtuporem huiusmodi, quatenus ad ſimplicem pertinet apprehenſionem, ex fortiori perceptione creari, non verò debiliori ; id quod oculis accidit, quum iſſis nimio fulgore perſtriſtis res ſubjectæ non diſcernuntur ; quâ dein ratione eorundem acies ſtupeat.

*Qualis is
eſt.*

Quatenus verò ad conſilium intelligendum, & quem in finem res ita efficitæ fuerunt, ut talem exhibeant ſpeciem, hoc cernere non eſt huiusce facultatis ; atque ideo neque talis huc pertinet ſtupor, verùm ad eam facultatem, quæ memoriæ fidei antea commiſſis utitur, atque ex iſſdem collatis cum præſentibus indiſijs nova ſibi ſenſa elicit ; ſententiàmque dein ſuam de iſſis latam aut confirmat, aut errores irrepentes corrigere nititur. Quod interim huc ſpectat ſtuporis genus eſt, qui impedit ne mens res capiat ; utrùm id accidat ſimiles confundendo ; vel in unam coëun-

coëuntes tanquam à se invicem diversas percipiat ; utpote quod subtilitatis defectum in se complectatur. Exempli gratiâ ; qui agri limites nôrit, universum illum velut integram quandam rem concipit ; ager verò in se jugera forsan plura complectitur ; quo fit ut opus sit singula secernere, & seorsum quæque cognoscere. Quibus iterum singulatim nomina imponuntur, ceu signa agellos denotantia. Et horum quævis discernere, numerum videlicet eorûmque notas vel indicia, hujusce facultatis. Posthæc quoque & agrorum possessores dominósve, & id genus plurima nôsse, quatenus simplicia sunt, eòdem pari jure pertinent. Qualia sanè ipsissima ferè fundamenta sunt, quibus ut plurimum disciplinæ innituntur.

Subtilitatis itaque defectus fit, quum *Subtilitatis defectus.* acies mentis aut non acuitur aut obtunditur : Illud accidit vel naturæ, vel educationis pravaeque inde consuetudinis vitio ; hoc verò aut animi quovis affectu, organove malè habente, aut corporis (a) mor-

(a) Multa enim è corpore existunt, quæ acuant mentem, multa quæ obtundant. *Cicer. Tuscul. 1.*

bo. Ad priorem autem acuendam mentis hebetudinem ea profunt, quorum suprà mentio facta est, quando de hâc re consulebatur; prodest itidem educatio accommoda ad animum regendum, perturbationesque, quales mentem obcæcant, defendendas. Quinetiam organi vitium ex corporis morbo sæpe pendet; quo dein sanato, mens ad subtilitatem pristinam revertitur.

*Defectus
celeritatis.*

Celeritatis verò defectus notatur, quum diuturnius temporis spatium ab hisce requiratur, in quo singula percipiuntur, quàm à plerisque alijs, qui eadem apprehendunt; vel quàm ab iisdem valetudine priùs commodiore utentibus desideraretur. Duplex itaque videtur hujus facultatis tarditas, vel quatenus eadem conferatur cum communi aliorum, vel etiam cum propriâ alicujus commodiùs tunc temporis valentis perceptione. Quod attinet ad priorem tarditatem, ea frequenter adeò à naturâ pendere solet, ut subsidijs post maturitatem vix eandem adjuves, antehac verò culturâ, ijs quæ acuunt adhibitis, ad festinationem commodam non rarò incitare licet.

licet. Contrà autem si tarditate nunc magis quàm antea percipiendi facultas laboraret, morbus sanè is est, qui dein remedijs arcendus.

Neque certè percipiendi celeritas vitio *Celeritas nimia.* semper caret, verùm sæpe malum ex nimia festinatione oboritur ; qualis junioribus frequenter accidit : Ea interim frænâ cohibenda ; studiisq; ubi properare non datur, impedienda ; quò lentiori & firmiori pede in argumentis diutius perpendendis iisque incumbendis moram trahentes progrediantur. Nempe ex celeritate isthâc præproperâ sæpenumero oritur habitus ille ex rerum conspectâ facie ea, quæ subter latent, quasi aperta opinandi. Cujusmodi quidem mentes, nisi institutione emendentur, viros postea non nisi puerorum dotibus ornatos commonstrant ; qui dein in seniores levi suâ garrulitate notatos transire consuêrunt. Etenim quando ætas majora ab ijs deposcat, ipsi ad ludendum ac circumvolitandum per sementis tempestatem soliti virilis participes messis fieri nequeunt, ac propter otiosam inanitatem à consortio dignorum pelluntur. Horum sa-

nè hominum mentes æquis passibus profectum corporis non comitantur ; ac, quando hoc annosum evaserit, illæ ex ephebis minimè excefferunt.

*Perceptio
eorum quæ
extra vel
intra men-
tem fiunt.*

Perceptio autem vel eorum est, quæ extrinsecus afficiunt, vel quæ intra mentem fiunt. Prioribus nimirum accensentur, quæ non modò corporis exteriora, verùm & interiora tangunt sentiendi organa, præter illa à quibus mentis superiores pendent facultates. Enimvero omnem sive externorum sensuum seu interiorum perceptionem ritè habere par est, ubi mens feliciter opus suum transigere poterit. Dispiciendum igitur utrùm aliud pro alio sentiant ; ac utrùm qualiter unumquodque habet, id ipsum percipiant. Quòd si in rebus tritis & maxime vulgaribus dignoscendis apprehensio vacillet, adeò ut hæc pro illâ sine hæsitatione percipiatur, aliter ac fieri solitum est, hæc facultas gravissimè lædi exinde patet ; quâ quidem ratione funditus non rarò evertitur, ita ut spes eam redintegrandi nullatenus concipi queat. Hinc igitur evenit, ut ad morborum exitum salutarem vel infausum præcognoscendum perceptionis integri-

tegritas plurimùm valeat, atque ut notissimas usu res minimè dignoscere gravior mentis alienatio jure habeatur, eoque deterior, quò propiùs earum notitia ad ipsa apprehensionis initia accedat.

Eòdem etiam spectat, ubicunque erratur in percipiendis rebus intra mentem *Erratum in ijs, quæ intra mentem sunt.* gestis; veluti quando imagines inibi reconditæ pro rebus ipsis apprehendantur, aut mens hæc efflictim depereat, memoriæque præteritarum repræsentatâ desiderio earundem flagret. Quippe prout sanis quandoque accidit, ut quiddam valde optatum desideratùmque menti per somnium tanquam præsens objiciatur, imò & quibusdam haud ita peritis sed tamen spe plenis, ut facilè credant, quicquid adesse sibi volunt; sic etiam ægris nonnunquam evenit, ut ipsi quoque eadem quæ volunt & ardentè cupiunt, se tanquam videre, ac sentire per delirium opinentur. Nec diri istius symptomatis alia videtur causa, quod febri laborantes non rarò urget, qui viridaria umbrosa lymphâ scatentia delirantes sibi in conspectu adesse putant. Siquidem talia propter æstum, quem sentiunt, ijs exoptantur,

tantur, qualia Agesipolidi Spartanorum regi, narrante Historiographo (a) ; qui, *adultâ jam æstate ardore quodam ignis instar urente corripitur. Et quia non ita pridem Bacchi fanum apud Aphytem viderat, mirificè opacorum illorum tentoriorum, limpidarumque ac frigidarum aquarum desiderio teneri cœpit. Quamobrem virvus quidem eò delatus est, sed die à quo cœpisset septimo, extra fanum vivendi finem fecit. Quo sanè ritu hâc febri correpti in hujusmodi loca, qualia coràm intueri sibi videntur, etiam in lecto jacentes se proripere nî prohibeantur, student.*


*Quæ affe-
ctus vim
deponant.*

Nec profectò percipiendi facultas leviùs læditur ab ijs, quæ metus obijcit, uti in morbis, qui nervos afficiunt : Qualia nonnunquam totos ferè exercitus occupârunt. Quum verò eadem horúmve similia morbos consequantur, inter pessimæ notæ signa meritò recensentur. Quóque longiùs à vero rerum sensu hanc facultatem abducant, eò plus periculi imminet. Idque etiam aggravatur, quando nullæ metûs causæ extra morbos ipsos dentur. Hoc quippe

(a) Xenophonte.

morbi vehementiam declarat, eúmque altè
mentis arci insidere, quòd istud vitij inti-
mis naturæ penetralibus hæret, neque
propter injuriam ab extraneo quopiam fo-
mite illatam, sed à mentis ipsius organis
gravius aliquid passis procreatur.





C A P. X.

De Memoria.

*Memoria
conditio in
etatibus
singulis.*



OSTEAQUAM mens singula perceperit, quæcunque attentionem mereantur, ea memoriæ dein custodienda committit. Siquidem nulla datur recordatio, ubi attentio prius non excitata fuit. Id quod crebrâ repetitione primâ ætate fieri consuevit. In hunc quippe modum infantes, qui recens nati vix quidquam, quod ijs occurrit, in memoriâ tenent, paulatim eorum, quibuscum assiduè versantur, faciem vocemque subinde intuendo atque audiendo memoriæ affigunt. Recordandi enim facultas in sequenti ætate se pandit, ac sensim augetur usque ad adolescentiæ vigorem. Proinde ut experientia rerumque usus plura advertere monet, qualia juvenes fugiunt, isthæc sanè postea homines memoriæ tradunt quæ utilia esse observârunt, qualiâve præcipuè
sibi

sibi curæ sunt. Ac procedente tempore eorum ferè senes meminerunt, quæ ipsi curant; cæteraque vix aut leviter mentem tangere, aut vestigia non altè eidem imprimere consuêrunt.

Hinc igitur constat attendere priùs ac fortiter apprehendere eum oportere, quàm memoriæ committere; siquis, ut fidem hæc præstitura sit, optet. Ideoque qui memoriam fidam fore sperat, curabit antea ut rem prorsus intelligat, quàm custodiæ memoriali tradere annitetur. Frequenter quippe evenit, ut qui se rei cujuscvis oblitos queruntur, nunquam hanc satis calluisse deprehendantur. Et nil dein miri si eadem superficie tenus impressa, nec sanè admodum intellecta, ex custodiâ pariter negligenti dilabatur. Enimvero plenioris rerum perceptionis opera talis videtur, qualis eas ordinatim ac propriè secundum classes, vel genera ad quæ referuntur, disponat. Quo quidem pacto vix memoriæ oneri sunt, præ illis quæ singulatim & seorsum ab alijs loca sibi vendicant, neque connexæ hærent, aut aliquatenus ad eas pertinent, in quantum saltem cognitæ fuerunt. Pari dein jure si momentum earum

non

Assensio & apprehensio ad recordandum utiles.

non perpendatur, custodia curâ ac vigilantia destituetur, prout ejusmodi notitia consideratur.

Et exercitatio.

Quapropter curiosius attendere atque perspicere oportet, dein usu assiduo memoriam exercitare ; quæ exinde vires colligit veluti quævis alia facultas : Cui si digna duntaxat mandentur, quæ opus erit sapius in mentem revocare fida magis indices futura est.

Angustia memoria.

Veruntamen nimis sollicita de paucis cura angustam reddit memoriam, utpote quæ totam mentis attentionem occupent. Adeò ut si quis paucis retinendis assueverit, vix ille plurium postea meminisse valeat. Vis quippe memoriæ in complectendis rerum simul plurimarum vestigijs cernitur : Hæc tamen non tantâ semper tenacitate gaudet, quantâ ea quæ angustior est,

Memoria juniorum, maturorum.

Aliud enim videtur res bene multas comprehendere ; aliud diutius non nisi selectas retinere : Illud quidem genus junioribus tribuitur ; hoc verò illis, quibus facultas judex maturuit : Qui nimirum
sum-

summa rerum mente agitantes, ea sola decerpunt servanda, quæ majoris sunt momenti, qualiæve distinctiùs habere expedit. Unde talium memoria tanquam pretiosorum thesaurus apparet; quando secùs nugarum rerùmque vilium farrago cum cæteris indiscreta expersque examinis videatur.

Quanquam igitur posse plurima haud *Ipſus in-*
 ægrè in memoriâ unâ recondere ostendat *tegritas.*
 robur vigentemque ætatem, vitio tamen hæc ipsa caret, quæ ea sola tenet, quibus opus sit ut sententia ritè de iisdem feratur. Inanis siquidem spes est, quæ vigorem in ætate jam vergenti velit; ubi optima ea ducenda est memoria, ex quâ nulla apprimè utilia ejus fidei credita, modò eorum numerus vires non exceſſerit, elabuntur.

Itaque modò memoria pro viribus tenax *Vigor.*
 fit, integram eam censere licet, quamvis tot tamque à se invicem diversa, quot juvenis addiscere valebat, jam senior tenere nequeat. Notandum interim memoriæ vires non esse æstimandas ex rerum numero, nisi ipsæ singulatim reponantur, inter quas nulla intercedit menti agnita affinitas cognitione,

natióne, & ubi nulla alia datur causaj quare ad hoc vel illud genus referuntur, aut ad aliam aliámve classẽ pertinent. Nempe ex eo quædam oritur reminiscendi ars, quòd varia in unum aliquid collecta in memoriâ dein, quasi singulare hoc ipsum esset, recondantur: Verùm quod artis est, id naturæ licèt opituletur, non tamen hujusce vim auctam esse demonstrat.

*Memoria
senilis.*

Quod attinet autem ad memoriæ tenacitatem, alia est senilis ab eâ, quæ priori ævo competit: Hæc quippe res eidem recenter impressas vividius habet; illa verò se quondam vigente peractas potiùs recordari consuevit: Imò & grandævus, quæ intermediæ sunt, frequenter ex memoriâ excidunt; dum earum, quæ primo vitæ tempore fierent, accuratè reminisci queant. Cujus rei ratio videtur, quòd dum validius attentio sibi excitaretur affectuum animi vehementiorum ope, qui tunc temporis corripuerunt quando in fortunæ palæstrâ exercebantur, res ab alijs gestæ insigniùs in se designatæ ac quasi collimatæ pectus intimiùs tangerent, atque amariùs urerent. Hæ dein eosdem quiete jam fruentes neque negotijs divexatos, verùm extra tela ejusmodi

ejusmodi positos non tam vivide percutiunt; idque quoniam ad studia, quæ virorum ingenia incendunt, senes eorundem minimè æmuli vix postea animum adjungunt. Quibus vita quidem producta sæpius scenam eandem apparavit; qualem proinde nonnunquam ad extremum usque fastidium spectare sibi forsân inauspicatò contigerit. Quemadmodum illud, quod mirâ novitate ferit, animum fortiùs irritat, mentémque ad advertendum atque apprehendendum allicit, altiùsque memoriæ hærentia sui vestigia relinquit.

Animi porrò affectus, à quibus præfer- *Amor & ira ad reminiscendum conducunt.*
tim res impressas memoria tenet, amor iraque sunt; quorum prior si quid amplectatur, vix unquam idipsum à pectore divelli sine acerrimo dolore potest: Utpote qui tanquam amantis partem admisit, quodcunque in mentem illius auspicijs irreperit. Posterior verò ipsâ vi suâ in memoriam radices hujusce rei agere solet, quæ ad irascendum commovit; cujus causâ nisi tollatur, at in irritatione persistat, tum demum iræ iste furor in obfirmatum exire odium consuevit.

Nihil

*Minæ ini-
micorum
affiguntur
memoriæ.*

Nihil ergo memores valentiùs reddit, quàm inimicorum minæ, quas quidem tota mens advertit, quippe metu sibi infensissimorum excitata ; quocirca omnes in subsidium facultates cientur. Nempe hæc, quæ imagines fabricatur, metu ac interdum terrore occupata personam quamvis formidandam exhibet, quæ rarò, qualiter reverà habet, appareat, at potius tanquam mille mala complectens ; quæ graviora scilicet vel leviora æstimantur pro inimicitiarum gradu modòve, quem hostis ingenio congruere, non incredibile eo ritu affectis videtur. Illa, quæ judicis partes sustinet, quando hostem esse decreverit, quodcunque ab ipso dein provenit, etiamsi sub commodi specie offeratur, damnat. De verbis mox innoxijs venenum elicitur ; laudèsque tanquam illecebræ hamum obducentes creduntur. Sententiam dein profert, cavendum esse ab omnimodâ in posterum injuriâ, quæcunque ex istius parte inferri possit. Nimirum id ipsum curat præfagiendi facultas, quæ per vigil singula non sine maleficij formidine lustrat, atque itidem ex eodem petitis fonte aggravat. Atque ita qualia isthæc intelligit, talia memoriæ princeps demum facultas

cultas altiùs imprimenda atque arctiùs custodienda tradit.

Propterea pericula undiquâque imminentia tenacitatem memoriæ præsertim tumentur; adeò ut iisdem, ultra quàm facile credi potest, fida esse observetur, qui per rerum discrimina victum quæsierint, quique auxilijs destituti fuerint, qualia ex arte reminiscendi alijs adfunt. Quod sanè patet ex illis, qui artem numeros scriptis designandi minimè addidicerunt, attamen accuratiùs eosdem memoriâ tenent, imò & rationes insigni rerum varietate redditas difficiles atque implicatas, distinctè quasi descriptas calluisse deprehensi fuerunt. Quorum enim reminisci nequit quispiam necessitate adactus? Quantum illius memoriæ viribustribuendum est, qui nullam aliam aut vitæ sustentandæ aut etiam ipsius tristicitiæ demulcendæ rationem novit, quàm quæ exinde proficiscatur, aut ex eo pendeat, ut memoria minimè fallat? Quod quidem videre est in hisce, quibus natura visus negavit; qui tamen non semper tenaciori supra cæteros memoriâ dotati sint, subinde tamen admiratione dignissimam ejusdem potentiam ostendunt;

Et pericula & ego stas.

quæ sanè utilissimi sensûs, quo carent, vicem ijs præstat.

Mens no-
ta.

Quæcunque interim de solitudine superius dicta sunt atque anxietate, quâ mens ad res custodiâ continendas exuscitatur, eadem ad metum non ulterius referuntur, quàm prout aliquis ejusdem gradus homines magis attentos, cautos ac vigilantes reddit. Idem quippe nimius memoriæ officit; propter quem plura mox excidunt, quæ eidem mandata fuerint, aut præstò non sunt evocanda, quotiescunque eorum præsentia utilissima habetur. Siquidem iste affectus (*a*) mentem ab advertendo reliqua abducit, omnesque ejus facultates eòusque occupat, ut, quasi alienæ non suæ parerent menti, illius non hujus mandata exequantur. Unde id solum, quicquid præcipitur, frequenter objectum manet menti, qualis gradu metûs intenso corripitur; quamdiu saltem hic ipsi imperat.

(*a*) Pavor omnem sapientiam ex animo expectorat. *Ennius apud Ciceronem.*

Propte-

Propterea ne meticulosi fiant homines, *Ideo pra-*
 idipsum per educationem non ita mol- *cavendus.*
 lem (a) curare æquum est : Ubi labor
 necnon dolor, cæteraque qualia à natu-
 ra proficisci solent, neque vitari omnino
 possunt, tanquam extimescenda teneris pro-
 poni non debent ; ideoque talis laudanda
 est, quæ potius contra timiditatem pectus
 muniat, quàm eidem obnoxium reddat.
 Indigna enim viro ea perturbatio flam-
 mam indies crescentem extinguet, sine quâ
 ad maturum evehi vigorem non licet.
 Imò nec sine eadem nervorum systema fir-
 mum futurum est, nedum inconcussum
 manere poterit ; à quo memoriæ tenaci-
 tas in primis pendet. Enimverò ea, quæ
 ut mens sui sit juris faciunt, memoriam
 juvant roborantque, adeò ut inibi distincta
 varijs ac proprijs quæque notis colluceant.
 Ex quâ imaginum memorialium propriâ
 claritate fit, ut jussu facultatis principis in
 promptu suppetant, quâsque ipsa velit,

(a) Mollis illa educatio, quam indulgenti-
 am vocamus nervos omnes & mentis & corpo-
 ris frangit. *Quintil.*

hæ inter alias emineant ; planè quasi animo præfenti obsequium præstarent.

*Alacritas
bona.*

Adhibentur autem utiliter ad memoriam firmandam ejusmodi auxilia, quæ animi alacritatem pariunt, nec tamen corpus prægravant. Inde fit ut meraciorum usus perpetuus nimiùsque memoriam debilitet ; non solùm eo quòd efficiat ut mens leviùs singula advertat, sed quia facultates ipsius lædit, tonùmque ipsum nervorum resolvit : Quum tamen modicus ac tempestivus eorundem usus recordandi facultatem non minùs vegetam, nec tenacitatem ejus magis infidam reddit.

*Methodus
auxilium
memoria.*

Nec siluisse itidem hîc loci est artem, quæ plurimum ad reminiscendum valet, qualis sanè maximè ab analogiâ pendet ; ubi singula, licèt ferè numero carentia, quæ coacervata aut confusa nunquam recordari posse speres, à primarijs iisque paucis fontibus deducendo, & in ordines naturæ eorum proprios redigendo, affinitatèque & cognationem servando, memoriâ haud ægrè teneri queunt. Libet certè digitum ad analogicam methodum potissimum intendere, quia ope ejusdem mens
perci-

percipit disciplinarum fructus ; ideóque naturæ magis consentaneum videtur eisdem pari ratione in memoriâ asservare, ac eâ per quam primùm collecti ac traditi fuerint. Qualis quidem methodus non multùm ab isthâc ablūdit, quæ in gentium deducendis prosapijs à generum singulorum capitibus obtinet ; ubi eâdem stirpe oriundæ ad generis autorem referuntur, atque ita quasi colligatæ tanquam unum aliquid memoriæ mandantur. Hâc profectò artē quispiam ad discendum idoneus non modò voces linguarum, quibus clarissimi autores vetustis temporibus æquè ac recentioribus opera sua ditârunt, adornâruntque, tenere potest, sed & res ipsas, quas denotant, quatenus in rerum naturâ plerumque conspiciuntur, mente simul complecti. Idque laboris intra eisdem temporis terminos conficere ferè licet, qui adolescentiæ literarum studiosæ præstitui consuêrunt. Quo more solenniter nec non usu repetito in consuetudinem tandem abeunte, potestas quædam, prout experientiâ ac discernendi facultate quisque floruerit, ex arte nascitur, & quæ veluti occulto & incredibili modo in immensum nonnunquam crescit.

*Et car-
men.*

Quinetiam inter artis hujus adminicula fuere carmina, quæ memoriter vix ullo labore recensentur. Etenim inventa ejusmodi non modò ad docendum conducunt, verùm etiam ad animos mulcendos oblectandosque; eoque tendunt ut alliciant persuadeantque; ac demum ut quicquid disciplinæ, instituti aut consilij traditum est, illud memoriæ affigatur. Ubi certè numerorum modorumque ex Musicâ petitorum ope plura utilia scitumque digna memoriæ mandari possent. Hujusmodi erat priscum illud Hesiodi carmen, in quo tanquam perpetuo anni temporum rationario variam cœli faciem, quatenus ea ad rustica spectat opera, tradit. Simili consilio idem Senex historiam naturæ, quatenus in sacris gentilitijs adumbraretur, Deorum Generationis nomine descripsit.

*Fit discipli-
na artifi-
cium.*

Prout autem antiqui Musicam excolentes, ut ita dicam, memorialem, sapientiæque monita & consilia prius grata reddentes, quasi hanc arte condita asservare aggressi sunt; sic philosophi sequentibus seculis ad idem præstandum artificio quodam in disciplinis usi sunt, quas polito ac soluto sermone tradiderunt. Inibi quidem artificio

ore formâ & intra angustiores cancellos molem materiæ copiosiore coagere, & in peculiares sibi met thesauros recondere potuerunt : Quæ etiam in usus varios nullo negotio depromenda, sicuti quoque imbecillissimæ cuiusvis memoriæ, utpote elaboratè pressèque & concinnè disposita, custodienda foret. Nempe omnia illic vel unico pendebant filo, vel saltem ita inter se cæteris devincta, ut uno aliquo disciplinæ velut ramo moto reliqui connexi inter sese motibus quique suis trepidarent.

Exinde itidem aliæ in auxilium venere *Artem auxilium* artes, quales dum depingerent res ipsas vividius adjecto ornatu proprio, variisque qui singulas decerent loco & habitu, memoriæ ad retinenda, quæ jam addidicerat, vires suppeditarent. Sic illi aures, sic oculos in memoriæ subsidium conduxerunt, atque utile jucundo miscuerunt, ut quicquid amœnum, quicquid singulis volupe esset, isthoc ut simul non modò fortem conceptionem, sed & distinctam recordationem adjuvaret. Siquidem omnes istiusmodi artes non nisi varij videbantur ostendendi atque attentionem excitandi modi ;

utrū ijdem fierent per singulorum sensuum peculiares ac unā conjunctas voluptates, vel per rationum similitudinem, à quarum unā cognitā prolixæ rerum series ordinatim ita dispositæ essent, ut & mens diversitatem ex juxtâ collatis, ac similitudinem propter res ipsas cognatas eādem aut pari ratione se habentes pervideat teneatque. In hunc modum salubres mentidapes, aliā atque aliā formā subministratas non exsatiare visum est, sed perpetuò tanquam de novo apparatus eidem placere.

Modus repetendi jucundus.

In quantum proinde modus quivis novus res easdem exhibendi in se complectitur præcognitarum repetitionem; ubi & hæc recolere, ipsasque denuo, quæ in memoriæ tabulas relatæ sunt, concinnare frequentius oportet; in tantum is ad earum reminiscentiam utilis est. Quo in negotio qui tūm peculiarem sibi cogitandi methodum, tūm animum suum fortius ferientia aut pectus blandius tangentia advertunt, hi talia rectius ad amussim suam disponere poterunt, qualia memoriter calere optant. Eoque tandem pacto hisce studijs ad memoriam adhibitis, quâ ratione
com-

commodissimè juvent, tenacem ejusdem firmitatem, quatenus per naturam licet, ipsi adipiscantur, fruïque valeant.

Quò clariùs autem liqueat, quomodo ex *Historia* memoriâ res delentur, atque iterum ibi *viri ex cu-* renovantur, historiam cujusdam ex nostrati- *jus memo-* bus hîc describere fas sit; qui postquam ad *riâ desue-* maturam ætatem pervenerat, vernaculæ lin- *tudine om-* guæ oblitus est, ac dein eandem addidicit. *nia exci-* *derunt.* Hic quippe vir peregrè profectus est in regionem, ubi rex legibus solutus tunc temporis rerum potiretur, ibique suspicione nescio quâ obortâ huncine nuditatem publicam ac solitudinem illic factam explorare, in carcerem causâ indictâ repentè coniectus est. Situs carceris insularis erat, semotus interfluente undâ ab hominum sedibus; atque intus ita factæ ædes, ut seorsum ab aliis custodiri posset: Ubi neque facies cujusvis conspecta est, nisi ipsius, qui victum eidem quotidie afferre solitus est, homuncionis clavibus onerati, quem neque vocem unquam edentem audivit. In editissimo carceris cubili subter tigna stratus est lectus; & per parietem pedes aliquot crassum dubiam lucem interdium rima angusta intromittebat. Illic concluso neque legere neque

neque scribere licebat, neque intueri aliquid ultra cameræ hujus angustias; ubi neque quendam loquentem exaudierat, nec ipse loqui per sex ferè menses ausus fuerat. Absumto dein hoc tempore penitus libertatis oblitus fuerat, neque gravis tandem arcta ibi custodia, cui jam assueverit, videbatur : Adeò ut desiderio nullo aut diei splendoris aut humani consortij in posterum tangeretur. Et hæc quidem fortunâ vir ille plures pòst annos utebatur, donec oblivione prorsus obrutus fuisset. Postea inertem demum respexit libertas, quo tempore hic jam prorsus alieni juris factus, neque pedibus ad incedendum nec linguâ ad eloquendum uti potuit : Verùm paulatim ad se rediens atque in patriam navigans verba sermonis olim sui apud nostrates iterum didicit ; in primis quidem hæsitanter velut infans conatus aliorum dicta retulit, gestivitque mirè quædam recognoscere, ac reminisci. Attamen biennium circiter excurrit, priusquam loqui promptè & expeditè, quomodo antehac valeret.

*Memoriam
valere
bonum.*

Nil proinde miri, si medici ad memoriæ ægrorum firmitatem spectant, antequam de morborum difficilium exitu sententias suas
pro-

proferant ; nisi causa aliqua subsit, cur memoria deficiat, qualis hæc ipsa suprà tradita, qualisque desuetudini non ægrotationi debetur. Accuratæ interim recordationi præteritorum à se gestorum temporumque ac locorum plurimum tribuendum est ; tametsi non modo perceprix, verùm & imaginatrix atque ipsa facultas judex à verò rerum sensu aberrant. Senilem tamen imbecillitatem æstimare par est ex eorum oblivione, quæ in priori vitæ parte jam juvenes didicerant, potius quàm ex hisce, quæ nuper fuere menti subjecta : In junioribus verò ad oblivionem potius recenter exhibitum spectandum.

Interea dum memoriam intuemur, quanti scilicet momenti sit ad res cognitassenti subjiciendas, utpote sine cujus o-^{Memoria apud insipientes quandoque valet.} perâ præsentia sola eidem sese sistunt, ob-
servare non abs re erit, eos, qui memoriæ felicitate gaudent, haud perpetuò ingenij acuminè dotari, imò & memoriam fidelem insipientiæ comitem non rarò inveniri. Qualis sanè rei causa esse potest, quòd memoria hominum vulgarium singulis indiscriminatim collectis referciatur, ex quâ farragine quum trita nemini non
nota

nota abunde depromant, hæc statim evilescant, atque ut ipsi pariter autores tanti non habeantur, faciant. Nec quidem mirum videri potest, si qui sine delectu cumulârunt, eadem etiam sine ipso proferant. Neque enim sapientiæ esse censetur, memoriam ostendere vilium ac nullius pretij rerum onere cumulatam. Quòd si, ut non rarò evenit, hæc vilia apud ipsorum possessorem valent longè suprâ quàm apud cæteros, qui istiusmodi rerum pretij iudices agniti sunt, deridendum sæpe talem propinant. Nec illud profectò tacendum, quod nonnunquam eveniat, ut memoriæ bonorum pauperrimi laudatos propter eadem invidiâ prosequantur ; ideòque talia depretient, ubicunque tot tantorumque copiam memoria florens suppe-
ditat, opibúsque suis affluit, quibus æmuli indigent. Nempe tales sæpe thesauros ipsi per totam forsan vitam sedulam ac negotijs deditam conquissiverunt, tanquam hosce quos attentione atque recordatione dignissimos existimârunt : Alij verò, quibus occasio eosdem nanciscendi non data, aut quibus elapsa fuit, nunc quasi despectui habentes videri volunt. Ac hisce quidem modis dotes naturæ sæpe sordent aut
contem-

contemnuntur, scilicet vel usu eorundem imperito, ac non ritè excolendo aut propriam ipsis dignitatem conciliando ; vel etiam eo quòd tantum valeant, invidiam apud istos, qui desiderant, pariunt ; qui dein, quicquid ars diligentiaque efficere possunt, eodem omnino utuntur, ut minoris æstimentur, útque naturæ largitio fructu careat ; quæ tamen dotes omne pretium excedere æquis æstimatoribus videri possunt.

Veruntamen larga opum memoria tantum requirit culturæ, attentionem tam strictam tamque exquisitam perspicacitatem, *Angusta memoria commodior quàm lar-* *ga.* cujus ope res nauci ac sordentes re-
dundantésve penitus expungantur ; ut talem vix tam probè custoditam atque tam pulchrè commodèque ordinatam invenias, quàm quæ angustis finibus contenta est : Ubi scilicet pauca, quâ licet arte quòve ingenij studio, disponuntur, ornantur, & ad omne opus comparantur, quodcunque à recordatione sperari potest. In hunc modum sententias non ita multas ad normam sensûs communis prudentiæque prolatas, probè intellectas atque in memoriâ repositas plerisque ad fructus scientiæ

entia decerpandos utiles fieri : Qui quidem, earundem virtute atque operâ ad se se regendos per vitæ suæ stadia adhibita, successibus minimè carent ; dum illi qui dotibus longè superioribus ornantur, tametsi laboribus assiduis mentis facultates ad torturam usque fatigent, vix æquis passibus hosce comitari ad altiora assurgentes queant.

*Memoria
angusta
cum infida
consuetudine*

Neque etiam pauca, quæ angustæ tali memoriæ mandantur, evadere solent, nec inibi manentia confundi ; quoniam ea sunt quotidiani apud negotiantes usus, ideoque frequentius repetita denuo experientiâ confirmantur. Interim præter hoc ipsam memoriæ aliud genus est, quod rarò itidem rerum illic conditarum ingenti numero laborat ; idque vulgè infidelitatis arguitur, quod & cum ingenij acumine ferè conjunctum observatur. Itaque eas mentes quæ vividè sentiunt, quâ ratione res ad se invicem habent, & quâ conveniunt, quâve dissident, neque ulterius ad naturam earum advertunt, quàm quotiens hæc uno eodémque momento animum percellit, citò easdem dimittunt nec tempore satis longo detinere solent, quo alti-

us

us memoriz infideant hæreantque. Enimvero talibus nova ocyus enascuntur, quæ tanquam tenues quædam flammæ repentè oculos perstringunt, & repentè sine indicijs in auras evanescent. Qualia quidem sensa sicut haud segniter mentes alienas irritant, ita etiam abijs memoriæ idque non per incuriam traduntur : Quoniam meteororum ad instar ex improvviso oborta lumenque suum insuetum jaculantia mentes præsentium & nil tale opinantium mirum in modum occupant ; neque profectò post enarrata minus audientes capiunt. Hinc igitur ingenij exitur potentia, quod facultates tardiores aut dormitantes argumentis raptim adisventis, confectio separatis vel connexis expergefacerit ; quæ quidem vulgi opinione nihil ejusmodi referrent. Qualia sanè quò fortius excitent atque acrius irritent, eò vividius sentiuntur, eò facilius tenentur : Quum tamen mentem, unde proveniunt, non insolita & non assua prætereant, quæ deim ad nova statim creanda se convertit, potius quàm ad prius edita accuranda animum adjungat. Atque ita ad recenter nascentia protinus se conferendo, nec præterita recolligendo, nil miri si tali accidit ut sæpe foetus suos quasi

quasi expositos derelinquat, atque in alios leviter amores transeat. Quod subito enim in mentem venit, idipsum neque diu ibi manere solet ; atque ita prompta atque ad novos semper excipiendos hospites parata ingenia, cum voluptate eos amplexantur, at non diu cum ijsdem versari cupiunt. Unde demum memoria tanquam nimium lubrica talibus objicitur.

Quæ ratione immutatur memoria.

Observandum præterea quòd memoriæ vires magis à corporis robore pendeant, quàm quæ ad aliam quamvis mentis facultatem pertinent : Quod quidem in causâ est, cur isthæc augetur, atque deflorescit, prout corporis vigor increscit, aut flacceffit. Ad hunc modum infantium recens natorum memoria vix quicquam retinet ; nec ab eodem ritu longè defleat ejusdem in senectute extremâ conditio : Hæc quidem rerum quarundam gestarum primum eidem affixarum tempus ferè in ultimum recordatur, sed recenter impressarum obliviscitur ; illi verò eadem excidunt postquam fuere impressa, nisi perpetuò renoventur : Sicut ipsa ad nova discendum apta est, priorum immemor ; dum altera ab immutatione ac novitate abhorret, quia magis ea tenet

tenet, quæ primùm didicerat. Hæc autem diversitas nasci videtur ex organis primùm humidis ac mollibus, dein exiccatis ac rigescentibus ; unde demum flecti vix queant, planè quasi ad postremum quoddam memoriæ sceleton referrent ; ubi stamina ad primi toni normam diriguerunt, & parum admodum, quod tempore intermedio accesserat, jam residuum est. Mediâ interim ætate utraque retinet memoria, prout recentius vel superiùs singula gesta fuerint ; quando sanè hæc facultas, perinde atque corpus vegetum, arctè quæque comprimit, ostenditque eadem, prout priori vel posteriori tempore in ipsam relata atque signata fuerint.

Hinc itidem constare potest, quâ de re *Quâ ratione memoria insignis non semper declarat reliquarum mentis facultatum præstantiam ;* quin, quod subinde notatur, intelligentiâ *one memoria fidelitas non declarat aliarum mentis facultatum præstantiam.* minimè clari dotentur memoriâ fidâ ac tenaci : Idque quoniam juniores sæpe eâdem fruuntur, nec eò prudentiores aut saniori mente præditi inde deprehendantur ; neque sanè ij perpetuò sunt, quibus imaginatio magis vegeta observatur. Mens quippe florente jam corpore minùs excolitur, nec pariter atque illud augetur,

K neque

neque pleniùs percipere aut aptiùs decernere, aut sensa vividiori aut utiliori modo proferre atque enarrare potest. Atque ita quantumvis viro qualis puerorum est indoles prævaleat, & quamvis memoriâ teneat more forti, distincto atque diutius durante res in eandem relatas; hæ tamen inutiles evadunt inopiâ virium cæterarum mentis facultatum; quæ quidem hæc seu notas sive indicia testimoniâve in usus varios dextrè ad animum perspicuèque adhibeant. Enimvero memoria optimè habens bibliothecæ aut mentis armamentarii virtutes complectitur; ita ut prior, perinde ac posterior, sæpe inutilis domino maneat, qualis ad memoriæ vel bibliothecæ instructissimæ usum indoctus imperitùsve accedit. Quandoquidem autem memoria intra mentem armamentarium est, ad eandem homines meritò spectant tanquam commodam futuram cæteris facultatibus opitulandis atque augendis: Quamprimùm verò aliud constiterit, defectus istiusmodi mentis citiùs retegitur, ejusque infirmitas apud vulgus proditur, quæ capacis memoriæ operâ uti nescit. Neque alia videtur causa cur imaginandi
facul-

facultas aliquando memoriæ viribus impeditur ; veluti cùm fructibus alienorum operum in memoriam affatim translatis, obruta multitudine eorum variâ jacet imaginatio, neque sua edere potest, verùm forti recordatione sermonum atque apud autores descriptorum ab operibus suis abducitur ; mens quippe nec alia concipere aut advertere didicit, nisi qualia ab alijs prolata novit. Hic proinde mentis morbus ex tali ortus memoriâ, non dissimilis illi corporeo videtur, quo alimenta facie haud immutatâ apparent, postquam per intestina effluerunt. Novi sanè adolescentem, qui quamvis amaret, amasiâmq; sibi devincire poësi studeret, sic tamen memoriæ viribus subactus est, ut nullos pangere posset versus, nisi ex hemistichijs poëtarum compilatos, quæque omnibus ferè primis labijs Poëtas salutationibus notissima essent. Querebatur sibi eodem ritu dum cætera componeret accidere, atque se posse autorem colligere locutionum, omniumque ferè, dum scriberet, sententiarum, quales sibi in mentem venirent.

Illud siquidem patet, quòd memoriæ do-

*Eadem re-
media &
memoria
& corpori
his prosunt.*

ris valetudine pendeant, quódque eadem in universum remedia adhibenda sint ad ipsam restituendam, quodocunque aut imbecillitate aut defectu quovis laboret, atque hæc ipsa, quæ corpus juvant. Exinde verò fit, ut firmitas atque promptitudo memoriæ certius evadat sani corporis ac vitalium functionum integritatis indicium, quàm cujusvis aliûs ex mentis facultatibus vigor ; tametsi etiam pro concessio habeatur, quòd ex istâc mentis sanitas non semper pariter declaratur.





C A P. XI.

De imaginandi facultate.

TRIQUE facultati percipien- *Imaginandi ratio.*
 di ac reminiscendi jam crescenti
 accedit imaginatrix, quæ velut
 in speculo imagines concepto-
 rum menti exhibet, juvâtque ut alijs fa-
 cilè concipienda prodat. Cujus quidem
 operam cùm ad percipiendum tùm ad re-
 cordandum subinde mens adhibet; ast
 quæ tota pendet à rebus jamjam percep-
 tis, quas memoria eidem suppeditat. Quî
 fit ut errores perceptionis ac memoriæ
 lapsus in imaginationem pertranseant, eam-
 que à verâ rerum facie depingendâ abdu-
 cant, haud secus ac propria ipsius faculta-
 tis inepta indoles imbecillitâsve, aut orga-
 norum ejusdem intemperies. Dein verò
 quò feliciùs imaginandi vis partes sibi pe-

culiaries agit, ac imagines ijs quæ percipiuntur similiores effingit, eò plus periculi ab errore menti imminet, ne imaginem pro re ipsâ amplectatur.

Colores desumpti ex rebus perceptis & memoriâ retentis variè componuntur.

Paucis interim perceptis hæc facultas variè utitur ad opera sua formanda, non aliter quàm pictor ex coloribus haud ita multis diversimodè commistis imagines innumeras reddere potis est. Quin & quæ ex maximè communibus notissimisque desumuntur, hæc fortissimè mentem movent. Proinde quò longiùs ab hisce deflectit imaginatrix, eò minus vigoris ostendit; utpote quæ non ita palàm res facit, quum non sit cuiusvis eas intelligere per similitudines ab hisce desumptas, quæ in conspectum omnium minimè veniunt, sed in abdito paucis nota jacent. Vera proinde imaginandi vis in delectu eorum cernitur, quæ in naturâ rerum sita aut vulgari usu, aut etiam hominum opinione celebria jam facta frequenter attentionem excitant; unde ipsa scilicet satis ubique cognita, ad alia aperienda atque illustranda quæ obscura sunt, dextrè transferri queant. In hunc modum imaginandi potentia colores figurâsque, sonos, sapores, odores ac facultates cæteras corporibus

poribus quibusdam à naturâ vel arte peculiarens sensibus perceptas secernit, utiturque ijs separatim ad depingenda quæ opus sunt; planè quasi pictores coloratorum corporum genera singulatim comparant, quibus juxta artis suæ leges ritè commistis, in tabulis speciem formæ cujusvis similem delineant. Ubi sanè accidit ut, si colorata ejusmodi corpora non in tantum appropinquant ad rei ipsius colorem, quantum ad dignoscendum ab alijs omnibus satis est, hæcce dein corpora minùs utilia ad pingendi consilium futura sint; unde si hæc sola artifex apparavit, imago saltem ratione coloris deficiet, quamvis ars aliter pictori non desit. Eadem prorsus ratione si res perceptæ nimis raræ sint, aut si quæ aptæ sunt ex memoriâ dilabantur, etiamsi imaginandi facultas munere suo præclare fungi valeat; attamen inter alias haud faciliè eminebit, utpote quæ idoneorum indiget. Verùm non modò coloribus destituta facultas muneri defutura est, sed & si exemplaria optima non suppetunt, qualia æmuletur. Hujusce siquidem facultatis peculiaris dos est imitari quæcunque proponantur, idque utrùm æmulationem mereantur, necne; ideoque

pro exemplaribus vel pulchris & consummatis, vel deformibus, aut ineptis atque imperfectis isthæc plus minúsve valebit.

Imaginatio sana.

Itaque hæc facultas bene habere censenda est, quando ad similitudinem rerum ipsarum imagines exprimit, neque ab ipsis, nisi causa detur, divagatur. Quòd si nullis astricta regulis longè latèque effrænis expatietur, talis certè imaginationis conditio vix sanitatis secura esse potest. Hujus quippe facultatis est principis jussis parere, seque secundum naturæ ordinem inferiorem gerere; adeò ut si quando rationis dictatis aliena ex imaginatione prodantur, verendum jure merito sit, ne ex parte saltem aut ad tempus mens solio deturbetur. Et quidem cuivis videre est, intelligendi potentiam magis minúsve firmam esse pro pleniori vel exiliori modo, quo imaginationi ratio dominatur. Cujus rei causa videtur, quòd totum mentis bene sanæ imperium eâ facultatum ordinatione consistat, ut quævis inferior supremæ obtemperet; quæ quòd severiùs servatur, eò tutiori mentis sanitate hominem beat.

Felix

Felix nimirum mentis ille est, qui in *Ac felix.* imaginationis speculum inspicere potest ideo solummodo ut apertiùs rem cognoscat, aliisq; depictam exhibeat; felix interim si quòusque imaginandi vi utitur clarè nò-rit, quique ejusdem operâ carere, ubicun-que velit, potest. Nempe soli germanâ dotantur mentis fortitudine, quâ discipli-
nas superat, atque scientijs utilioribus pe-
nitiùs imbuitur, qui imaginationis auxilio,
si quando opus sit, fruuntur; at verò ima-
gines illius à rebus ipsis prorsus discernunt.
Siquidem illud omne, quod ex imagina-
tionis operibus discere licet, ad summum
terminos similitudinis minimè excedit :
Atque ubi res similes internoscere oportet,
speculum hujusmodi minoris momenti
est; ac illic sedulò cavendum, nequis eo-
dem abutatur.

Ad res itaque ipsas ceu exemplaria re- *Ratio pro-*
spicere fas est, quandocunque de hujusce *bandi.*
facultatis operibus sententia feratur; qui-
bus sanè, modò hæc per omnia respon-
dent, præstantissima est ejus conditio. Non
rarò tamen accidit ut, qui adhibentur
judices ad dignoscenda rerum simulacra,
ipsi

ipſi errent, & figmenta, quæ imitandi vis edit, rebus ipſis anteferant; qualis judicij exemplum extat in hiftoriolâ (a) Phædrianâ;

*Facturus ludos quidam dives nobilis
Propoſito cunctos invitavit præmio,
Quam quiſque poſſit ut novitatem oſtenderet.
Venère artiſices laudis ad certamina,
Quos inter ſcurra notus urbano ſale,
Habere genus ſe dixit ſpectaculi,
Quod in theatro nunquam prolatum foret.
Diſperſus rumor civitatem concitat:
Paulò antè vacua turbam deficiunt loca,
In ſcenâ verò poſtquam ſolus conſtitit,
Sine apparatu, nullis adjutoribus,
Silentium ipſa fecit expectatio.
Ille in ſinum repente demiſit caput,
Et ſic porcelli vocem eſt imitatus ſuâ,
Verum ut ſubefſe pallio contenderent,*

(a) Lib. V. Fab. 5.

*Et excuti juberent : quo factō simul
Nihil est repertum, multis onerant laudibus,
Hominēmque plausu prosequuntur maximo.
Hoc vidit fieri Rusticus : Non mebercule
Me vincet, inquit ; & statim professus est
Idem facturum meliùs se postridie.
Fit turba major : jam favor mentes tenet,
Et derisuri non spectaturi sedent.
Uterque prodit. Scurra digrunnit prior,
Movēque plausus, & clamores suscitāt.
Tunc simulans sese vestimentis Rusticus
Porcellum obtegere, (quod faciebat scilicet,
Sed in priore quia nil compererat, latens)
Pervellit aurem vero quem celaverat,
Et cum dolore vocem naturæ exprimit.
Adclamat populus : scurram multò similiùs
Imitatum, & cogit Rusticum trudi foras.
At ille profert ipsum porcellum è sinu,
Turpēmque aperto pignore errorem probans,
En, hic declarat, quales sitis judices.*

Totam

Totam hanc rem pleniùs observationem præmissam illustrantem huc transferre visum est, eoque magis quoniam tam bellè narratur : Quod sanè autorem non nescisse constat ex præfatio ad calcem hujus fabulæ, more Poëtarum qui carmina elegantia ediderunt, addito ; chartas hæc in honore futuras dum Latinis pretium literis manebit.

*Opera
imagina-
tionis.*

Inter opera imaginandi facultatis utilia eminent signa, qualium ope mens sensa sua cum alijs communicat ; quæ quidem imitantur ipsas naturæ voces ; quemadmodum vocabula artificialia finguntur animantium peculiaribus simile quiddam sonantia ; qualia ideo omnes ferè Linguæ complectuntur, ut balare, grunnire, & reliqua ejusmodi. Ex eodem etiam fonte oritur, quòd carmina ad similitudinem rerum descriptarum conduntur ; quale notissimum est illud Maronis,

*Quadrupedante putrem sonitu quatit ungula
campum ;*

ad quorum modulum passim apud clarissimos Poëtas versus invenias. Nec alius sanè est totus ille Analogiæ Grammaticæ labor,

labor, qui subsidium utilissimum memoriæ afferre suprâ dictus fuit. Inde deveniendum ad ornatè dicendi modos, qui apud Rhetores traduntur: Ubi sanè voces tratitix ex similitudine desumuntur, atque eadem nonnunquam catenatæ in allegorias deducuntur. Hæ interim permeant omnia illa scriptorum genera, quorum auctores veritatem sinceram ac nudam exponere verentur, eò quòd, si apertè prodatur, ingrata, vel propter rudem simplicitatem neglectui aut contemptui futura sit; aut propter asperitatem odium iramque enarranti conciliatura. Hujusce generis sunt fabulæ, quarum argumenta desumuntur ex alienis ab hominibus naturis, utrùm ex ferinâ vel arboreâ idipsum ortum ducat. Neque ab hisce multum abludunt imagines hominum in historijs descriptæ, cæteraque ejusmodi opera, unde imaginandi dexteritas similia effingere valeat.

Verum quidem est opera imaginationis præstantissima speciem eandem ferè ac res ipsas referre, ideòque non rarò in earum locum suffecta esse. Quod certè, quandoque accidit, errorem proinde facultatis judicis evincit, non autem imaginationis; quippe

*Fortissima
cavenda.*

quippe quæ munere suo ritè fungitur, dum imagines ad naturam rerum proximè accedentes exhibet. Quapropter perpetuò suspicionem ejusmodi vis illusoriæ fovere ijs æquum est, qui ne mente capti sint metuunt. Etenim judex ipse causâ istiusmodi corrumpi solet, ubi in imaginandi facultatem culpa ferè rejicitur. Interea liquet vim imaginandi ab animi affectibus sæpe adaugeri, atque eosdem in causâ esse, quare & specie veri rectivé isthæc decipere, & judex simul in partes trahi possit. Quò usque igitur pertinet imaginandi potestas, hoc semper animo objici par est, nempe eam ad fidem argumentis faciendam minimè idoneam esse; quoniam nihil eò magis veritati rationivé consentaneum est, quòd illius species in imaginatione vividè depingatur, ubi semper de errore periclitaris. Verùm si fortissimè hujusmodi imagines mentem percellant, inclinèntque eam ad fidem ipsis tanquam clarè depictis adhibendam, næ illæ in dubium vocandæ sunt, utpote quas affectuum vehementiæ potius quàm decretis judicis, qui verum cautè examinat, deberi verisimile est.

Quòd

Quòd si tandem imaginationis usus intra *Imaginationis usus.*
fines debitos coërceatur, ut nec ad eruendas rerum origines causásve stabiliendas imagines ejusdem adhibeantur, neque ad res ipsas, qualis nimirum natura rationésque sint, investigandas; verùm solummodo ad tradenda alijs animi sensà, eadèmqe memoriæ affigenda, hæc ipsa inter nobiles mentis facultates eminere videbitur. Hæc quippe lumina orationi aliter obscuræ & intellectu difficili interjicit; eandèmqe horrentiorem cultioribus dictionum elegantijs perpolit. Quin & decenti habitu mentis conceptus vestit, utrùm in sublime tollantur, vel mediocri & gratâ jucunditate conditi æquabili proferri stylo gaudeant.

Totus profectò dictorum scriptorùmque *Ornatus.*
ornatus hujus munere enitet; gestus ipse, toni, numerorùmque delectus ab hac pendent; & quicquid de veri facie exterius apparet hinc depromitur, ostenditur, elucetque. Quod quidem ex Poësi constat, ubi simplex rerum natura magnificentius Musarum ore decoratur illustraturque; ubi terror animo incutitur, vel desperatio sublevatur;

levatur ; odium amorē novo deletur, amorē
 irritus in iræ acerbitem asperatur, at
 voti compos in suavitatem blandam mitescit.
 Quemadmodum Pindarus (a) gaudiorum
 vires in malorum vestigijs exterendis descri-
 bit, qualia tempus non abolevit : Quod
 quidem carmen vertente Sudorio ita habet ;

Quod semel factum est bene perperāinve

Nescit infectum fieri, retrōque

Irritum : at tempus tacitā recondit

Plurima nocte.

Sæpe & exhaustos abolet dolores

Gaudium præsens, ubi nos ab astris

Respicit vultu facili Deorum

Æqua potestas.

(a) Ὀλυμπ. Β'. Τῶν δὲ πεπραγμένων

Ἐν δίκῃ τε καὶ παρὰ δίκην

Ἀποήτην εἰδ' αὖ

Χρόνος δ' πάντων κατὰ

Δύνατο θέμεν, ἔργων τέλος.

Λάβῃ δὲ πότμος σὺν εὐδαιμονι γένετ' αὖ.

Ἑσλῶν γὰρ ὑπὸ χαρμάτων

Πῆμα θνάσκει καλῶκοτον, δαμασθὲν,

Ὅταν θεῶ μοῖρα πέμπει

Ἀνεκὰς ὄλβον ὑψηλόν.

atque

Atque ita humani pectoris affectus imaginibus à naturâ translatis ad vivum delineantur, tanquam turbines & procellæ aut lenes favonii auræ; tanquam tonitrua fulgurâque, & solis æstivi ardentes, vel placidè coruscantes verni ejusdem radij; tanquam nimirum omnia urentes torrentesve, vel calore geniali foventes, atque in seminibus ovisque tenella recondita elicientes.

Ut Poësis primùm in subsidium facultatis recordandi præcipuum fuit excogitata, sic & memoratu dignissima complectitur. Præclarâ quippe imaginationis operâ ea memoriæ affigenda sapientes curârunt, quæ æternùm vivere ipsis mereri viderentur. Itaque carmina huic facultati sunt instar horreorum sive gazophylaciorum, unde copia imaginationi suppeditatur, ejusque opes repetuntur. Si quidem Poësis omnes in se imaginationis artes unâ complectitur, & quæ hîc vel illic per partes sparsæ singulatim continentur, easdem simul apud Poëtas reperire licet: Videlicet unum vel pauca saltem sidera alibi lustrare est; Poëtica verò uni-

Poësis ejus opera præcipua complectitur.

L

versa

versa cœlorum astra comprehendit. Ars propterea illa est, ubi ingenia celeberrima imaginatione præsertim florentia, nobilissima reposuerunt inventa, qualia ad rerum naturam spectarent, qualiave ad humani generis mores excolendos utilia essent: Ideoque non modò scientiæ promptuarium, sed & sæpenumero armarium representat, ubi veterum ac recentium sagittæ ac tela machinæque asservantur; utrum hæc sint, quibus publici isti generis humani hostes legibus soluti fuerunt debellati, qui Satyris transfiguntur; vel illæ quibus optima naturæ nostræ exemplaria laudibus evehuntur, atque æternitate donantur. Quæ sanè eximio fulgore nec ætate immutato radiantia in vatum operibus ab antiquissimis in nostra usque tempora durarunt; dum æra marmoræque, nec soli pictorum evanidi colores, edaci tempore consumta, dudum sine nomine aut insigni quovis monumento disparuerint, & penitus interierint.

*Exemplum
abusus operum
imaginationis.*

Fabulas quidem inter opera imaginationis utiliora recensere par est, atque ita ubique Poëtarum adornantur: Attamen non rarò mentem decipiunt, dum (uti prius

prius dictum fuit) nugis & perniciosissimis erroribus fidem addunt & pondus. Sic Pindarus fabulam Pelopis decantatissimam enarrantes reprehensione dignissimos censuit: Nec sanè pigeat celeberrimam Poëtæ sententiam huc transferre ex Versione Sudorianâ;

(α) *Vana sed hæc memorans vetustas
Impune gentes decipit, & Venus
Antiqua vatium callida, musico
Condire sermones lepore
Dat nebulis aliquando pondus,
Fidemque falsi arrogat : at dies
Seris recludit cuncta nepotibus.*

(α) Ἡ θαύματα πολλὰ,
Καί τ' αὖτις καὶ βροτῶν φρένας,
Ἵπὲρ τὸν ἀληθῆ λόγον
Δεδαυδαλμένοι ψεύδεσι ποικίλοις
Ἐξαιπατῶντι μῦθοι.
Χάρις δ', ἅπερ ἅπαντα τέυ-
χει τὰ μέλιχα θνατοῖς
Ἐπιφέροισα τιμὴν,
Καὶ ἄπιστον ἐμήσατο τις φῶν,
Ἐμμεναι τὸ πολλὰκις.
Ἀμέραι δ' ἐπὶ σλοιοὶ
Μάρτυρες σοφώτατοι.

Ὀλυμπ. Α'.

Ac postea, (a)

*Verum voraces religio est mihi
Cantare Divos, sæpe linguas
Pæna gravis ferit insolentes.*

Nempe canit, tanta prodigia nunquam fidem habitura, nisi, ut hæ placerent fabulæ, carminis gratiâ factum fuerat; cujus quidem vires notando obiter celebrat. Atqui, dicat aliquis, quidnam sensisset Pindari ingenium, modò fabula sic fuisset efficta, ut Pelops unum ex convivis Tantali patris, qui nimirum Dij habebantur, devoraret? Exinde profectò patet, quantum imaginationis operâ & auctoritas apud judicem facultatem valent.

*Opus
quorundam
dam di-
stinctio.*

Inter varia imaginationis opera personæ imprimis spectandæ sunt. Ut autem imaginatio facultatem percipiendi imitatur, imagines illius in hoc genere aut ad for-

(a) Ἐμοὶ δ' ἄπορα, γαστρίμαργον

Μακάρων τιν' εἰπεῖν.

Ἀφίσταμαι. Ἀκέρδεια λόλογχεν

Θαμινὰ κακαγόρας.

Ibid.

mam

nam rerum singularum, aut in sodalitijs consociatarum finguntur: Prioris generis sunt Cyclopes; posterioris, fabulæ; ac rursus hæ vel ex fictis vel veris constant personis, atque etiam nonnunquam ex utroque fuerunt genere desumptæ, qualis conjunctio Polyphemi cum Ulyssæ apud Homerum ostenditur. Hujusmodi autem fabulæ ad historiam proximè accedunt, quatenus res gestæ ibi narrantur. Quin etiam personæ sunt vel eæ quas nosmet sustinemus, aut quales ad nos ipsos referuntur per cognationem seu affinitatem vel amicitiam aut etiam similitudinem; vel è contrà quales ad nos nullatenus spectant. Quod ad proprias nostri ipsorum personas attinet, imaginatio deludit, quandocunque hinc veris grandiores effingat, illinc vero, non quantæ reverâ eadem sunt delineet: E priori quippe tumor vanitatis gloriæque ostentationis exurgit; sicuti è posteriori tenuitas quædam morum qualis ingenuum dedecet, ac inepta verecundia quæ ingenitam vim prodere, & viro digna profari atque agere prohibet. Et quidem eximiæ imaginationis est eas semper offerre imagines quæ omnino congruant; quales sanè amplitudinem natu-

ralem neque auctam nec imminutam exhibent: Attamen eò quòd sui ipsorum amor apud plerosque plurimum valere solet, à vanitatis partibus præcipuè cavendum, utpote in quas imaginatio sæpissime proclivis est.

Vitia imaginationis.

Itaque imaginatio duplici nomine à veritate recedit, si vel auget vel imminuit conceptuum vim, dum opera eorum similia effingit. Idipsum igitur quod in exemplari non invenitur, vanum est; quoniam eidem nihil extra imaginationem respondet. Vidi egomet quendam (a) vanum omnes omnium personas in suâ complecti studentem, quotquot aliquatenus ad se referri novit: Dum adhuc puer esset, condiscipulos in ludo literario tanquam ad se unum spectantes habebat; atque ipse iisdem os linguâque atque etiam mens erat. Quum ex ephebis excesserat, statim sodalitium juvenum sortitus, personam totius sibi sodalitij induit, nec aliam à suâ cuiusvis sodalis sententiam agnovit. In hunc

(a) Thraso ille Terentianus ab hoc ipso non multum diversus exhibetur.

modum per hominum ordines vitæ iter fecit, ac perpetuò integri ad quem accessit ordinis communem quasi sensum sibi arrogavit. Nempe tale hominibus infortunium esse solet, ut ejusmodi arrogantes juvare assuescant: Unde haud ægrè plerumque evehuntur, nec, usque dum res progredientibus repagulo sint ne ad summa rerum perveniant, prohibentur. Nil itaque miri si vanitas robusto potius pectori insideat, atque adolescentiam virilemque magis ætatem infestet; ac vitium sit animi inexperti, qui, quanti ipse sit, ex usu non satis didicit. Hinc itidem liquet, cur ibi superbia radices agit, & quare effrænâs licentia, injuriâque inferendi ac dominandi libido eandem sæpe comitantur. Et quoniam se opponit alteri illi pauperis bonorum imaginationis vitio, constat quamobrem hujusce indolis homines vix humo tolluntur. Ad hunc ideo modum Hesiodus (a) Jovi id operis tribuit, qui facile & humi jacentem exaltat, exaltatûmque deprimit, tanquam numini optimo maximo proprium; accingit verò seipsum ad mu-

(a) "Εργ. καὶ Ἡμῆθ.

nus sibi (a) accommodum, nempe ad pro-
dendam veritatem fabulis obductam, quâ
ratione Perses sanaretur. Ac tale quidem
imaginationis opus adhibet tanquam præ-
sidium adversus isthoc vitij genys utilissi-
mum. Fabulam autem eam exponit de
duplici contentionis genere, hoc scilicet,
quod in bello cernitur, quale vituperan-
dum; altero verò, quale multò meliùs
hominibus cedit, nimirum quod in æmu-
latione ut plurimum situm est: Prius va-
nitati debetur; posterius verò, quanti ho-
mines valent, probat. Nec alia ferè ab
hisce inveniuntur apud antiquissimos quos-
vis vates, qui fabulis laudatissimis, quibus
certè tunc temporis tanquam sacræ histo-
riæ fidem adhibebant, pro remedij utrius-
que in imaginatione vitij uterentur.

*Vitiorum
remedia
duplicia.*

Remedium igitur ejusmodi duplex est,
aut acre atque invectivum, aut ridiculum:
Utrumque verò adhibitum plerumque fuit
ad mores castigandos; nec minùs utile ad
tollenda imaginationis vitia compertum.

(a) Κλυθι ἰδὼν αἰῶντε δίκη δ' ἔθνε θεμισὰς
Τύνη' ἐγὼ δέ κε Πέρση ἐτήτυμα μυθησάμην. Ib.
Prisci

Prisci autem remedia tam asperè fortiterque adhibuerunt, & eòusque tandem malè feriatì ac pravi abusi fuerunt, ut ab iisdem hominum mores abhorrerent; quæ dein artificibus itidem dedecori futura essent. Enimverò postquam Socrates licentiâ veteris comœdiæ petitus fuerat, huic prorsus neglectæ atque invisæ politum illud genus successit, quod Menandrum cultorem agnovit, in quâ famâ intactâ vitium emendari potuit. At talis quidem fabula, ubi exempla desumuntur à personis longissimè remotis, efficacissimè ac felicissimè adhibita fuit; quâ in methodo consuevit, curatioque peragitur non sine eodem fructu ac ubi tota res apertè traditur. Quin & parallelæ hominum historiæ, qui quondam vitijs hujusmodi deformati fuerint, non sine pari utilitate adhibentur. Nimirum id perpetuum est, opera imaginationis accurata totidem esse specula, in quibus simulacra sua intuentes discant, quâ ratione se redigant ad justam hanc amplitudinem, quam forma necnon firmitas comitantur, suâque omnia ad eandem eâ lege effectam accommodent.

Quam-

*Quâ rati-
one eadem
juvant.*

Quamprimum igitur imaginatio inania effingit, optima corrigendi ratio videtur imagines opponere ab alijs rectè delineatas atque castigatas; ubi sanè deformitas clarissimè demonstratur. Hic quippe imaginatio, quæ in imitationem proclivis est, effigiem operis sui minimè congruam ac ingratham, atque ex adverso formam alieni pulchriorem respiciens, habitu sensum pravo seipsam exuit, & ad exemplaria isthæc nobiliora deinceps suum configurare amat & assuescit. Hæc utique methodus vanitatis consumendæ inservit, necnon opposito eidem vitio emendando; nempe si liber hujusce facultatis usus non negligatur, operibusque illius laus tribuatur; initio licet eadem ad claritatem exemplarium minimè ascendant. Siquidem tenuis ea imaginationis indoles commodè exercitata viribus augetur & capacior redditur, prout cuiusvis alij contigit facultati; tametsi fatendum sit, quorundam imaginationem tam præclara præstare à naturâ posse, quanta ut alij assequantur, ars efficere nescit.

Ex

Ex unâ interim vel alterâ vitiorum indole oritur malè sana imaginatricis conditio; adeò ut hinc ex vanitate supra modum intumefcente frequenter furor nascatur; illinc verò in alterum insanix genus curratur, quod dein imaginationem falsis implet terroribus. Quòusque igitur sanitatis pomœria pertinent ejúsque fines statuendum, priusquam ea, quæ malè sanam esse hanc facultatem evincunt, internoscere licet. Ut integerrimam verò ejus conditionem hanc esse patet, sub quâ judici perpetuò auscultat; sic etiam non malè sanam dici, siquando animi affectus corripiant, ipsamque integram, postquam posuerunt, relinquant; quales tamen sæpe recurrentes, diùque durantes eandem valde perturbant, & non rarò in insaniam desinunt. Quocunque autem modo imagines formantur, si judici offerantur tanquam confictæ, quantumvis veris sint similes, attamen non eidem obtrudantur veluti res ipsæ perceptæ, hoc quidem imaginationem malè sanam non indicat, tametsi abunde errorum illinc deducatur. Ac propterea tum solùm imaginatio haud bene valere censenda est, quando judicis partes sustinere audeat, vel
res

Imaginatio malè sana.

res perceptas atque in memoriâ asservatas pro suis venditare ; suâve opera in locum eorum, quæ ipsæ prodidêre, sufficiat. Quoniam naturæ ordo in hunc modum subversus, facit ut omnia in mente confundantur : Etenim animi affectus ex sui ipsius amore vires suas depromentes nullum dehinc rectorem agnoscunt ; at species mille rerum illudentes huc illuc mentem distrahunt conturbântque. Itaque in utroque genere ægrescit imaginatio, utrûm ex parte vanitatis vel timiditatis peccetur : Et in priore quidem persona, quam sustinet, grandior ; in posteriore verò tenuior, quàm par est, effingitur. Exemplo sit ille, qui in nosocomio rogatus, quânam ratione quidam inibi hospitans (nempe ad virum eundem digitum intendendo) insaniverat, respondit ; Hunccine opinari, se Jesum Dei filium esse : Verûm hisce prolatis mox erupit respondentis similiter infania, Atqui ego met, inquentis, illius Pater Deus sum. Nimirum omnes iidem omnia magna dicere, omnes principes esse, vel apud eodem plurimum valentes ; ac, si gradum superiorem nôrint, illuc conscendere. Ab alterâ verò partē exempla ubique jacent avarorum

avarorum, (a) qui, ne inopiâ deperdantur, etiam dum divitijs affluunt, verentes, ad miserrimum istud insanix genus deprimuntur. Aliquando etiam de priore in posterius transitur. Memini enim virum mediæ ætatis mercaturam tunc temporis facientem, quem vanitate abunde laborantem ante sex menses nôram, & quem audiivi Londinum advectum, curæque medici commissum veluti posteriore morbi genere jam affectum; ubi tandem supremum diem obit, morsque divitem eum fatetur. Imò & varietas dudum in utroque genere observata, non alia est, nisi qualis ex naturâ atque temperamento ægrorum proficiscitur, prout scilicet ingenium eorum mite & benignum, sive audax & efferum atque immanè antea cognitum fuerit. Novi equidem à pueritiâ tres civis filios, quorum sanè pater imaginationis potentiâ, quantam sodales experi-

(a) Umidius quidam (non longa est fabula) dives
Ut metiretur nummos; ita fordidus, ut se
Non unquam servo melius vestiret; ad usque
Supremum tempus, ne se penuria victus
Opprimeret, metuebat; at hunc liberta securi
Divisit medium fortissima Tyndaridarum.

Hor.

entiâ

entiâ probè cognitam habuerunt, præpollebat. Nempe hi hæreditariam exinde imaginationem sortiti sunt, adeò ut natu maximus eandem penè simplicem obtineret, ac feliciter eorum gestus, quoscunque viderat, imitari posset; qui tamen ingenio bonorum tam paupere laborabat, ut insipidi stolidive infamiâ notaretur. Fratri intermediæ ætatis imaginatio eòusque vigebat, ut se humo attolleret in sodalitium illusterrimorum, qui gentis nostræ decora fuere, & quorum memoriam Britannia etiamnum reveretur. Et hisce quidem cooptatus horis negotiorum vacuis jucundum se comitem exhibebat; nec vanitate omnino affectum audiui. Minimus verò natu studijs literarum incubuit, vanusque adulescens erat, omnibus tamen dulcis propter imaginationis suavitatem, quæ facetijs ac gestu se prodidit, quibus tristitiam curasque depellebat. Verùm Musæ ipsius comes erat indivisus Bacchus; magis verò Pomonam adamavit. Eidem etiam pocula, apud nostrates vitea fermento imitantia, in delicijs fuere. Unde primò Hydrops minuitur; verùm postea adultâ ætate occupatus infantiâ nunquàm ad integritatem reversus est.

Ad

Ad sublevandum itaque prius illud imaginationis malum ea profunt, quæ veri rationes inculcant, mentemque ab inanibus ad rerum momenta revocant; ut, quanti sint res extra posita, innotescat; neque ijs solis, quæ intus hærent, affigatur. Ex hoc quippe fonte imaginandi ægrotudo, cujus mentio jam fit, ut plurimum oritur, nempe interna magis quam externa advertendo. Hinc ed tendunt studia, quæ mentem suis potius quam aliorum bonis occupatam detinent. Hinc sui ipsorum ea admiratio, quæ reprehensionem sæpe mereatur; eadem quippe initium subinde fit hujusce à vero rerum sensu aberrationis. Exinde enim facultas judex firmior evadit, quòd res oblatas intuens secundum hæc exempla perpetuò decernat, non verò secundum conceptus apud mentem larentes, & quos minimè cum alijs collatos olim amplexa fuit. Id ipsum profectò constat, quicquid judici facultati vires subministrat, hoc imaginatricis audacitatem castigare, atque impudentiam ejusdem effrænem reprimere atque coercere. Pertinet porrò hoc consilij pari jure ad alteram illam imaginationis intemperiem, ubi infirmitate laborantes qua-

Auxilia.
fi

si ex inopiâ deperdi solent : Quoniam tametsi usus eorum, quæ animos addunt, hisce ægris proficiuus sit, atque hi ad fiduciam gradatim manuducendi ac hortatibus incitandi sint, ut, qualia sibi ardua videntur, ipsi tentent, nec vereantur ne vires animique deficiant, modò, qui suppetunt, exerere nituntur ; cavendum nihilominus, ne in contrarias partes abripiantur. Memoriâ quippe tenendum, hunc imaginationis morbum facilè in prædictum transire, præsertim in naturis quæ affectibus nerveis obnoxia sunt ; ideoque fortioribus parcere stimulis providi est consilij.

*Tempora
ac regimen
operibus
imaginatio-
nis idonea.*

Quinetiam ad imaginationis sanitatem tuendam ejusque opera auspicius peragenda conducit, anni tempora ac regimen nôsse, ideoque de illis pariter atque hoc ipso agendum. Quod ad priora attinet, imaginationem ad ardua ejusdem negotia non adhibendum, nisi illo temporis spatio, quod ætatem præcesserit. Idque sanè monendum non sine exemplo celeberrimi nostratis Poëtæ, Autorem volo *Paradisi Amissæ* ; qui scribere vere jam novo cœpit, ac eodem in ætatem mox transituro id operis per reliquos anni menses imperfectum reliquit,

quit, nullatenus progressurus, ulque dum
sol ad Arietem reverteretur, novumque
imaginandi vigorem redeuntem persentiscere-
ret. Hinc ex antiquorum ac recentiorum
monumentis seligere optimas quasque Poë-
tarum & Philosophorum imagines atque sa-
cro suo argumento eas adaptare, sibi &
patriæ suæ ingens illud tropæum erigere se-
curus potuit. Verum & tempus satis lon-
gum intermittere oportet, siqui imagina-
tionis labores perferre eadem illæsa ve-
lint; quanto scilicet opus est, ut ad justam
temperiem ab ardore redigatur. Hinc qui
Poëma illud laudatum Latinè reddere co-
natus est, & per triduum eidem sine inter-
missione operi incubuit, insaniâ demum
correptus fuit. Neque profectò silendum,
quòd meraciora omnia hisce fugienda sunt;
neque quòd omnes corporis vias reſeratas,
potiùs quàm clauſas atque conſtrictas ha-
bere tutius est.

Ex præmiſſis quidem liquet, hanc facul-
tatem cæteras illuſtrare, ac quàm habiles
ſint plerique oſtendere; atque ita ex ejus
operibus fama mentis vulgo innotescit:
Quoniam eadem non ex interiore huiusce
reſtitutione aut bonitate, non ex ſententijs

*Fama
mentis ab
imagina-
tione pen-
det.*

accuratissimè latis, neque ex eo quòd sapi-
enter omnia intus regat instituátque, cre-
scit, qualia quidem vix apud vulgus appa-
rent; nec sanè infamia ex dotibus oppositis,
quamdiu palàm non fiant, notatur; verùm
ex habitu ornato aut vili, atque ex amore
odióve, quo alios prosequuntur, semet
adeò germanis coloribus patefaciente, ut
alij persentiant: Illud verò unicè ab ima-
ginatione pendet. Veruntamen ut mens
laude digna jure merito sit, majus adhuc
quidquam considerandum venit; **altiusque**
illius dignitatis fontes investigandi; **quam**
non unius solùm ævi judicia declarent, **non**
amicorum modò linguæ enarrent; sed &
sapientia, re in universum cognitâ, probet
mandétque æternitati. Hoc scilicet jus,
norma atque arbitrium penes superiores
sunt mentis facultates.





C A P. XII.

De Judicandi facultate.

POSTQUAM res singulæ per- *Quâ rati-*
 spectæ fuerint, mens de alijs se- *one judi-*
 parandis, alijs verò conjungen- *catur.*
 dis sententiam ferre solet; pro-
 ut in universum aut ex parte solummodo
 discretas, aut omnino vel quadantenus
 duntaxat connexas cernit. In hunc ferè
 modum si assensum mens non cohibet, at-
 que in neutram propendens partem nullas
 videt causas cur neget vel asserat, progredi
 consuevit; etiamsi hæc sæpe tam brevè in-
 tra mentem fiant, ut spatium temporis vix
 notetur.

Quum iudex facultas decernat aliquid *Unde er-*
 ex collatis duobus, id decreti clariùs vel *ror.*
 obscuriùs se habet, prout ambo cognita fu-
 erunt;

erunt; ubi frequenter evenit, ut alterum perspectum sit, alterum verò non nisi de facie notum. Quali modo vix cuiquam nisi casu vera proferre contingit. Atqui illud omne, quod non satis apertè in utrovis intelligitur, errori natalitia dat. Quòd si memoria in re quavis fallat, error exinde in sententiam irrepit; perinde enim est, non accuratè in memoriâ situm esse, ac non probè perceptum fuisse. Denique si imagines pravè formentur rerum ipsarum dissimiles, quæque coloribus alienis inficiuntur, atque affectus animi potius redolent quàm causæ ipsius integritatem, hæ sanè in partes suas frequenter judicem abducunt, & blanditijs suis ac utilium forsan specie corrumpunt.

*Ex tribus
prioribus
facultati-
bus veni-
ens error
castigatur.*

Igitur per tres nominatas facultates error in hanc ipsam labitur, nisi ab aliâ aliquà re præcognitâ lucem foenerari, eundemque ab ipsis transmissum castigare liceat. In quo quidem corrigendi negotio sapientium antiquorum studia literis consignata, atque à sequentibus eruditis, per quorum manus ad nos devenerunt, probata insigniter juvant. Ut autem exemplo ex Astronomicis
petito

petito utar; *Epicurus* (a) docuit solis ceterorumque siderum magnitudinem eam esse, quæ videtur: Unde fortè *Philosophia* incœpit. At longè prior illo *Anaxagoras* (b) dixerat, Solem esse majorem *Peloponneso*, & (c) *Lunam Peloponneso* esse æqualem. In quantam verò magnitudinem (d) tantulus *Epicureorum Sol* crevit, omnibus notum est, qui *Astronomiam* primis labris degustârunt. Ab hoc ipso tamen *Epicuro*, qui sensibus tantum defert, *Imaginatio* abunde castigari solet, dum figmenta (e) ejusdem rideat, qualia sunt *Centauri*, *Scyllæ* ac *Chimæra*. Quæ sanè ratiocinio à naturis eorum varijs desumto, nunquam extra imaginationem extitisse evincit. Unde patet *Lucretio* faciente, judicandi facultatem potuisse auxilium à ratione petere, præsertim si quando

(a) Τὸ δὲ μέγεθος ἡλίου τε καὶ τῶν λοιπῶν ἀστρων κατὰ μέντοι πρὸς ἡμᾶς, τηλικῆτόν ἐστιν ἡλίον ὅποιον φαίνεται. Ἐπικύρου Ἐπιστολ. Πυθοκλεῖ.

(b) Laërt. in vitâ *Anaxagoræ*.

(c) *Plutarcho* referente.

(d) Illud item non est mirandum, quâ ratione *Tantulus* ille queat tantum *Sol* mittere lumen. *Lucret.* L. V.

(e) *Ibid.*

mortalium corda à metu hujusmodi prodigiorum liberanda essent.

*Scribendi
ars errores
memoriales
corrigis.*

Quinetiam totum scribendi artificium, eidemque innixa ars typographica memoriae erroribus corrigendis inservit; unde iudex depromere potest, quæ sibi in subsidium ducenda sunt. Permagni itaque momenti est ad hanc facultatem dirigendam æquè ac firmandam literis innutriri, nec ijs solis, quæ ad nostra spectant tempora, verùm quæ clarissimi veteres prodiderunt, non secus ac hi qui eorum vestigijs insistentes veritatem, quæ secundum naturam est, non sua solummodo commenta aperire studuerunt. De hisce enim, qui ea sola nō runt quæ ipsi experti fuerunt, quantumvis in longum vitæ scena producta sit, illud Pindari (a) non sine sale laudandum est; *Ephemeris sunt. Quidnam est aliquis? Quid vero nullus? Umbra somnium sunt homines.*

(a) Ἐν δ' ἀλγῶν
Βροτῶν τὸ τεργνὸν αὐξεται ἄνω
Δὴ καὶ πιτνεῖ χαμαί, ἀποτρόπῳ
Γνώμα σεσεισμένον.
Ἐπάμεροι τί δέ τις; τί δ' ἔτις;
Σκιάς ὄναρ ἄνθρωποι. Πυθ. Η'.

Cujus

Cujus diſterij cauſam proximè antecedentia declarant; *Ut enim brevi mortalium voluptas adaugetur, ita ſanè humi præceps decidit propter rebus ipſis malè conſonum judicium, mentisſque quandam alienationem.* Ex hiſce proinde tribus facultatibus error naſcitur; qui, niſi judex corrigat, per ratiocinia ducitur, omniâque ejuſmodi conturbat.

Non enim in ratiocinandi facultatem alius error incidit, quàm qui à judice eòſque pervenit: Eâque mens utitur ad inferenda, qualia in judicijs rectis pravè ſive ſola continentur. Cujus rei cauſa videtur, quod nihil aliud ſit ratiocinari, quàm multiplici ratione judicare; ubi nimirum mens tertij alicujus interventu inter alia duo, diſſimilitudinem aut diſparitatem eorum, illius ope notat; aut è contrariò, iſthæc analogiam quandam ad ſe invicem, vel etiam eòdem planè modo habere advertit. Propterea verò facultas expendendi rationum momenta haud alia videtur, quàm quæ judex nominatur; præterquam quòd circum plura verſetur, & judicia ſemper præmiſſa agnoſcat; unde habitus quidam ſuperinducitur, per quem ad ſumma rerum

Error à judice venit in ratiocinandi facultatem.

scandit, retegítque earum fontes, ad quos
adire nisi mente solâ nullatenus licet.

*Eadem
utrique fa-
cultati or-
gana.*

Interim non diversa videntur organa ad
hoc operis comparata; quoniam ratiocinan-
di iisdem ac judicandi facultas afficitur.
Quod quidem in amentibus patet; quorum
duos probè nòsse contigit, qui mathemati-
cis imbuti erant disciplinis; & qui, tametsi
postulata non semper à sanâ mente proficif-
cerentur, ex hisce tamen concessis per men-
tis alienationem juxta leges ibi traditas rec-
ta inferre pariter atque sani soliti fuerunt.
Unde sanè vix alia ambabus hisce faculta-
tibus organa crederem, aut saltem arctissi-
mam inter gemellas connexionem hinc pro-
di: Quippe quibus errores ijdem; & id
omne quicquid pravi haud secus ac recti in
judicijs haberetur, quasi progredientibus
eodem pariter modo in ratiocinijs obser-
varentur.

*Mentis ve-
ritas.*

Ad hunc itaque modum mens res vel
rationes inter ipsas complexa ex contentis
in iisdem sententiam elicit; quæ si hisce
congruit, neque plus minúsve quàm inibi
situm est colligit, recta & vera est; sin su-
pra vel infrà cadit, aliquid falsi compre-
hendere

hendere potest. Sicuti menti à scopo aberrare licet, quodcumque à normâ recedit. Hæc verò nulla est præter rem ipsam, ad quam per omnia quadrare mentis conceptus atque judicia oportet. Ideoque Grammatici nonnulli nomen *veri* ab intensivâ particulâ *ve rei* præpositâ deduxerunt; & scriptores Romani usi fuerunt *vero*, tanquam oppositum esset ei, quod opinione receptum est; & siquando verum latere quemvis nequit, tum demum opposuerunt huic, quod solum prætexitur, neque ex sincerâ mentis sententiâ oritur, sed fictum quiddam est; & sic contrarium eidem stat mendacium. Et Græci quidem verum, quod ad rem ipsam quadrat, *επείν* vel *ετήτυμον* dicunt; sicut integrum apertumque mentis sensum denotant voce *ἀληθείας*, quod nihili oblita mens totum prodat, vel quod nihil rei proprium ipsam fugiat. Quod autem non longè ab hâc normâ recedere videtur, veri simile hoc ipsum dicitur; ubi ad modulum minùs accuratè respicitur.

Quinetiam gradus plures subinde apparent, quibus sententiæ judicis ad veritatem propius accedunt, non tamen ad ipsam penitus pertingunt. Alia quippe res aliâ ve-

Veri similitudinis gradus.

ri similior apparet, prout suam ipsius naturam apertius præ se fert, & clariori luce judici offertur; ubi tamen eadem non adeò disertè exprimitur, ut tanquam veram securè amplectaris. In hisce versatus iudex acutùm cernere debet, quòusque fides adhibenda est, & quatenus speciem rei non ipsius naturam induit. Deceptio enim ex his oriri consuevit, quæ proxima esse veris monstrantur. Neque sanè circa prorsus dissimilia falli quispiam solet, nec sine causâ datâ quare aliud pro alio haberi queat. Quapropter hallucinatio contingit in rebus subtilibus, quæ solis curiosius inspicientibus diversæ à se invicem secernuntur.

*Erratur
per præcipi-
tationem.*

Quoniam autem naturam rerum pressius insequitur iudex, ut qualis sit dignoscat, faciliùs ab eadem abducitur, nisi, quâ ipsæ tempestate veniunt, nôrit; & quando ad maturitatem exurgunt, & quàm citò hæc tempestas transitura est, si intra debitos temporis terminos non apprehendatur. Hæc quippe tempestatum cognitio idipsum est, quod agendi facultatem regit, singulæque opera tractandi, in quibus sententiam præcipitando frequenter occasio errandi datur. Quanquam enim in negotijs sit aliquis temporis

temporis articulus, quando maturitas adest, & quando optimè eadem tractantur ; quis tamen ille sit non perpetuò statui potest, nisi usu repetito, unde experienciâ judicis decretum stabiliatur. In errores quippe ab hâc parte proclivior videtur hæcce facultas, quàm in eos qui diutiùs morando nascuntur. Errores siquidem ex nimîa festinatione ij sunt, quorum sæpissime homines poenitet. Quod quidem ex prolixo rerum usu seniores discunt, dum junioribus rarò hoc nòsse contingit. Cujus rei causa palàm est ; quoniam intus hisce rerum species accelerantur, ocyùsque pertranseunt, nec satis diu ad sententiam ferendam cognoscendæ apud judicem manent,

Ad errores propterea hujusmodi præcavendos utile videtur præsertim parallelas *Periculum ejusdem.* tenere causas ; & ferè ad exitus respicere, non verò ad illas spectare duntaxat quomodo in præsens habent, nisi quatenus ex præsentî statu quid futurum est colligere liceat. Id quod rationi magis consentaneum videtur, quia animi affectus nostris in præsens conatibus alas addunt & quasi calcaria admovent, urgentque fortiùs adeò ut juniores non videant, quàm insignis ut plurimum

num fractorum opera sit supra eam, quæ ex stimulatione proficiscitur. Siquidem omni festinationi, omni celeritatis gradui periculum eo ipso nomine accedit, quòd non datur perpendendi tempus, quodnam ex singulis eventurum sit. Imò & idem ferme accidit iudice inconsulto agere, atque ipsum in consilia non sua proripere. Quòd si in periculis versatus ex iisdem effugere conetur, nonne itidem huic opus est consilio instantaneo; ubi momentum temporis amissum nunquam revocari potest? Qualia nimirum viris ad summos evectis honores contingunt, ea sæpe ad hanc facultatem non pertinent; verùm à vi externâ reguntur, ac consilij expertia minimè nisi adversis rebus repentè intellectum dantibus debentur. Talis scilicet facultas ex largâ experientiâ per ævum rebus difficilibus probato nonnunquam conceditur; quæ proinde felix & auspicata potiùs quàm consilijs nobilis meritò æstimatur.

*Unde hæc
facultas
consum-
matur.*

Ad consummandam proinde facultatem iudicem requiritur non modò præsentium cognitio, verùm & præteritorum similium recordatio, simul ac futurorum prævisio:
sicuti

sicuti ad proferendum sententias, aliisque
usui futuras tradendum imaginandi vigor,
qui delineare conceptus ac dein dictionum
propriarum delectum instituere valeat. Et
præsentium quidem cognitio tam imper-
fecta ferè est neque fidenda, nisi cætera
duo in subsidium adhibeantur, ut meritò
incerta audiat. Nam ex usu rerum errores
abunde patent, & non nisi respectu ad
eundem habito, ex quo veri species ab
ipso dignoscitur, corrigi queunt. Hoc
quippe facultas iudex exercitatur, quòd
decipi sese olim agnoscat, notètque eadem
recurrentia, quando sibi oblata sunt. Hæ
verò notæ reconduntur tanquam signa pe-
culiaria in posterum cognoscendi; unde
& firma redduntur decreta; & mens pro-
gredi potest nova indies accumulando,
quibus fidem præstet. Itaque certitudo
ejus quòd adest ferè ex præcognitis con-
stat; quemadmodum in vitæ itinere idem
propè experimur, ac illi qui peregre pro-
ficiscuntur, ubi, quum primum loca vi-
sant, nomina perquirunt, & quæcunque
ad eadem pertinent sciscitantes hanc cog-
nitione contenti sunt; postea verò repe-
tentes quæ fuere dicta, aut vera falsave
esse tandem decernunt. Quæ sanè nor-

tate utentes lactant, quàm præconceptæ rerum opiniones quatenus per hypothefin exponuntur; cui quidem priùs addicti fuerunt.

*Non ex
hypothefibus.*

Tota enim hujusmodi hypothefios vis ratio alijs, quàm facultati imaginandi debetur; ideoque tametsi effingatur tanquam rationi conveniens, non tamen plus evincit, quàm quòd simile quiddam concipiatur, aut quòd talis sit ratio, quâ res fingi potest, non verò omnino quòd ita reverâ se habeat. In quo quidem negotio frequenter peculiarium quarundam dotum nomina traduntur, quales nunquam cuivis mentis facultati innotescere possunt, etiamsi in rerum naturâ jam tum existerè crederentur. Hâc de causâ ejusmodi commenta unâ cum autoribus sæpe ipsis commoriuntur; quoniam inter naturæ opera locum nondum obtinent, sed tanquam placita arbitraria propugnatore carentia in posterum negliguntur. Ac proinde quæcunque seculorum plurium examen passa, clariora dein potius quàm obscuriora evaserunt, talia sanè opera fidem merentur attentionemque eorum, qui ad verum sincerè exquirendum animum appellant.

Inter

Inter hæc scriptores classici laudantur, *Laus scri-*
 faltem quod ad dictionum rebus congru-^{ptorum}
 arum proprietatem, sensumque commu-^{classico-}
 nem interpretandi modos elegantes perspi-^{rum.}
 cuosque: Quibus igitur moris est pueriles
 imbuere mentes, & in sententijs pulcherri-
 mè ibi prolatis teneros occupare animos,
 ut aptata sibi veluti exemplaria imitentur.
 Quâ in re cernere est hosce, qui eorum sty-
 los sibi æmulandos proposuerunt, vix un-
 quam confusa aut vaga, ne dicam futilia
 aut inepta, literis mandare: Et tametsi ve-
 ra, quæ in arcano naturæ sinu & intimo il-
 lius penu reconduntur, minimè depromant,
 à communi tamen sensu rarò procul absce-
 dunt; verùm qualia bonæ menti proban-
 tur plerumque reperiunt, & ejusmodi re-
 perta præsentibus cum Gratijs tradunt.

Ad hoc argumentum plenius elucidan-^{Præstantia}
 dum non inutile videtur advertere, quod ^{judicis}
 laus hujusce facultatis, quatenus in scriptis ^{dum in}
 versatur, consistat in complexione & veluti ^{scriptis}
 constrictione eorum, quæ in re quâvis ad ^{versatur.}
 scopum pertinent; sicuti etiam postea eo-
 rundem per dictiones proprias expositione,
 Cui interim operi non satisfit, conceptum

rebus congruum reddendo ; quoniam licèt exinde rem quivis clarè tenere possèt, plus tamen requiritur ut alijs distinctè atque explicitè tradat. Unde scriptorem oportet non modò omnes argumenti partes calere, verùm itidem singula ea lumina, quibus opus est, ut commodè lectoribus proponat ; secùs vim suam ipsâ forsan transmissione deponat, ac debili languidòque modo mentes alienas agitet. Enimvero clarè ac perspicuè res singulæ singularùmque proprietates prævidendæ sunt, ut mens idoneè sensa sua alijs per scripta pandat. Ac proinde inter rationes utilissimas iudicem castigandi atque incorruptum servandi recenserì meretur sententias ab ipso latas plenè verbis describere, ac dein experiri quàm leviter alienam mentem isthæc edita in lucem tangunt, quæ tam vividè suam feriunt. Quinetiam ut singula iudicia literis prodendo clariùs concepturus est, ita hæc ipsa recognoscendo postquam diu asservata fuerint, atque ardor, quem meditandi labor suscitârat, restinguatur, evadet demum iudicandi peritior, perinde atque in scriptis suis emendandis oculatior. Quòd si ita res quoad scripta sua habeat, quum jam animi vehementia resederit, quidnam de aliorum judi-

judicijs circa hæc statuendum; quos non semper nobismet æquos, non semper præjudicijs vacuos habere par est? Hæc de causâ nunquam satis laudanda est imaginatio-
nis opera, quodocunque nutui mentis promptè pareat; sine quâ facultas judicandi exquisitissima intra fines angustos coarctabitur; quæ tamen adjuta imaginationis elegantia latè lumina disjicit, splendorémque suum aliorum mentibus collucentem videt. Istæ scilicet, quæ flammæ ejusmodi non concipiunt, frequenter lumen alienum referre, radiosque licet vi propriâ gloriâque minùs claros remittere poterunt. In hunc modum siquando argumenta esse arida judici videantur, diffuere docet imaginatio; quæ jejunis itidem copiam sufficit, frigida calfacit, & calentia refrigerat; tenuia incrassat, vel crassiora attenuat; humilia tollit, vel in altum præter fas rectumque & quasi per tumorem elata ad æquabilem naturæ sortem deprimit coarctatque.

Ex adverso deficit judex, quando majora *Vitia ejus-*
vel minora, plura vel pauciora admittit, *dem.*
quàm ad justam rei magnitudinem aut naturæ modum conducant. Hujus quippe

loci sunt variorum à se invicem longè remotorum unà complexus, nec non ad idem præcipuè spectantium neglectus; divagatio à re ipsâ de quâ differitur, in alias sexcentas; rerûmque à se mutuò abhorrentium, quasi unius essent gregis, consociatio: Ubi longiùs à finibus communis sensûs extra citrâve deerratur; ut non, quæ natura fert, sed quæ eidem adversa sunt ac repugnant, hisce excogitatis inhiæt; utque eadem proinde nullo delectu, nullo prorsus consilio, nisi tanquam inania ac mentis non bene sanæ figmenta proferantur. Hâc de re eadem in agris, eadem in urbium frequentia notantur; eadem feris, eadem domesticis tribuuntur; omniâque soluta ordinibus, soluta legibus privatim aut publicè describuntur. Atque ita neglectus aut sublatus decor, ac nulla vivendi norma constat aut intelligitur.

*Puritas
sine perspicuitatis.*

Advertere etiam hujus loci videtur, quæ sint ejusmodi enitentis perspicuitatis causæ, aut, quod eodem propè recidit, quænam sit ea dictionum puritas, cui tanquam fundamento gratus ille modus sensa interpretandi innititur; cujus dein interpretationis vis apud judicem tantum valet. Et ea quidem

dem puritas hoc pacto apud Latinos nata est: Nempe postquam rem prævidissent, fortiterque cogitassent, ad eam aptè delineandam verba delegerunt; quæ, si nova proferenda erant, à communi linguæ fonte deduxerunt, & parcè eadem detorserunt. Græcus nimirum sermo Romano fons erat, ideoque petenda ex eodem nova suasit (a) Horatius: At si vocabula non deessent, eadem promere, quæ auribus eruditis non offenderent, nec insuave atque acerbum sonarent; vel quæ usus jamjam repudiârat. Quæ sanè ipsis plerumque curæ fuerunt. Illud interim, quantum usus volet, servandum scriptoribus vocabula nova introducendis, ut nulla extendant, nisi quæ antiquitus jactis fundamentis, idque lege Analogiæ quatenus licet, extruantur. Secus novum memoriæ onus sine fructu congeretur, atque dum eadem, quæ priùs dicta fuerint, eduntur, obscuritas saltem, si non error enascetur.

Norma proinde puritatis eadem aliquatenus esse potest, ad quam nobilissimi olim

Norma puritatis.

(a) De arte Poëticâ.

scriptores opera sua concinnârunt, quæ summè poliverant, nec imperfecta ederentur ; nimirum si eas feligere dictiones placeat, quæ analogiam naturæ minimè displicentem referant, in quibus fontium puritas adhuc tranfluat ; quippe quæ ab iisdem non longius, quàm opus sit, remotæ, nec cœno vulgari commistæ, aut ab imperitis turbatæ fuerint. Sic Plautina aliquando nimis turbam sapiunt ; neque ita tersa ferè apud priscum eum autorem, quàm qualia apud Terentium laudantur. Vix quidem credas plures hujus locutiones in ore vulgi tunc temporis fuisse ; at cum eodem simul Lælium & Scipionem loquentes audis ; ideoque Ciceronis peculiare quoddam elegantias apud Terentium legere est ; unde dignus videbatur, cujus vestigijs nonnunquam egregius ille locutor insisteret.

Qualis optanda.

Nec profectò prætereundus puritatis ille fons, qui eximiè quidem laudandus, rerum videlicet natura ; quam quoniam adire semper licet utpote non hominum moribus variisve opinionibus immutatam, quæ ex eadem oriuntur dictiones in sempiternum claræ esse possunt. Iisdem verò opponuntur

nuntur quæ ex gentis cujusdam consuetudine deducuntur, qualis fortè aut ignota sit, aut vix cognitu aliâ de re digna, quàm ad locutionis sensum probè capiendum. Verum finè est, linguas quasvis ex usu populi hujus vel illius provenientes multò magis istiusmodi dictionibus quàm cæteris abundare, & quidem in singulis gentibus penes usum loquendi norma statuenda est; ideòque ex proprijs populi sui moribus Romanum loqui decere; At præstat ex hujusmodi linguæ pomœrijs, quæ jam non nisi eruditorum est, easdem exterminare, aut saltem non nisi necessitate adaçtos in scriptis uti, quæ à consuetudine pendent, cujus nullum unquam momentum dari potest. Ac modò hoc fieret, limpidiùs flueret sermo, ijs præsertim vocibus ditatus, quarum fontes lucidi in naturâ extant, quæque non ad unicam duntaxat gentem pertinent, verùm ad doctorum nationem, ubicunque per orbem sparsa fuerit.

Quoniam judicandi facultas tot tantisque *Judex pro*
dotibus clara est, ideo pro integrâ mente *mentis totâ.*

ab Hippocrate (a) usurpatur: Sicuti iudicia vel sententiæ eodem apud alios autores nomine Gnomæ appellantur. Quò pertinet locus ille Xenophontis (b); *Verba quidem ut parum ad institutionem conferunt, ita Gnomæ sunt utiles, si doctrinam egregiam contineant. Vituperant autem & alij plerique professores istos sapientiæ seculi nostri, non sapientiæ studiosos; quòd in verbis non animorum sensibus sapientiæ suæ acumen ostendent.* Quale quidem iudicium de ijs proferri videtur, quibus priùs verborum delectus instituitur, quàm de rebus signatis à iudice agatur: Quoniam hoc ipsum ordinem inter facultates invertit, juxta quem rerum apprehensio præcedere dictiones debet. Quin & siquando easdem enarrare placeat, verba ipsis quadrare par est. Idque quia ex verbis solùm decreta hujusce facultatis, conditióque exinde totius mentis certò cognosci potest.

(a) "Ὅσα γὰρ τὴν τῶν ὀφθαλμῶν ὁψιν ἐκφεύγει, ταῦτα τῇ τῆς γνώμης ὁψὶ κεκράτηται. Περὶ Τέχνης. Ὁνόμοι πονέοντες τι τῷ σώματι, τὰ πολλὰ τῶν πόνων ἐν μέσθ' ἐννύονται, τῷ τῶν ὀφθαλμῶν νόσῳ. Ἀφροδ. Τ. II, 6.

(b) Κυνηγητικ.

Ut autem hæc facultas non suo jure solo *Rerum momenta cognoscit.* sententiam ferre consuevit, at prout rationum momenta inclinant, proximum videtur in ea inquirere, quæ apud eandem præfertim valent: Qualia quidem sunt, quorum vi impellitur, aut quorum utilitate adducitur, quorum voluptate trahitur, quorumve ambitu occupatur. Affectus imprimis animi vehementiores atque appetitus sunt, qui vim judici aliquatenus inferre dicuntur, & qui sæpe in partes suas valenter inclinant. Quamvis etiam illud constet, quòd, quicquid veri summâ perspicuitate inclarescere sentiat, hoc ipsum solummodo vim propriè acceptam huic facultati jam sanæ vigentiq; inferre potest. Reliqua proinde omnia inter incitamenta recenseri queunt; utrùm talia fiant, quòd utilia aut quòd jucunda vel honesta videantur. Propterea verò, quod in se hæc tria complectitur, maximè apud hanc facultatem valeat oportet, nimirum Potentia, quatenus secum utilia, jucunda & gloriosa affert. Potentia interim dominio annectitur, & pro ejusdem amplitudine ad latiora extenditur, vel intra angustiores terminos coarctetur. Quapropter unico nomine

mine facultatum cùm potentia tum divitiarum comprehenduntur. At quoniam hæc mentis facultas eodem propè munere ibi fungitur, ac qui jus in forenſibus decernendis dicit, ideo & ipſa illinc nomen Judicis mutò accipit. Interea autem omnis hæc potentia, omnes facultates non niſi inane nomen illi ſunt, qui uti nequit; ideòque artes quæ uſum earundem facilem gratumve reddunt, in pretio habentur, prout magis vel minùs in hunc ſcopum diriguntur; quare & judicia peritorum plurimi æſtimantur. Atque hæ ſunt mentis opes, quæ propterea perinde ac quævis pretioſiſſima valent. Proinde quoniam ſi cui bene valere non licet, is vitâ ipſâ frui non poteſt, nedum facultatibus, voluptatibus aut honoribus, ſecunda certè valetudo, artèſque dein eandem tuendi, judiciâque eorum qui eaſdem calluerunt, meritò primas obtinent apud judicem æquum rerum æſtimatorem.

*Judicium
de Homini-
bus.*


Præcipuum proinde judicis officium ſpectare ad homines ipſos videatur, ut tanti, quanti ſunt, æſtimentur, atque ut eorum naturæ dotèſque quaſi ad ſtateram examinentur; idque ut eadem conſerventur excolan-

colantúrque optimâ ratione, atque ita publicæ utilitati inserviant. Interest quippe omnium temeraria de talibus judicia minimè edi, quales ad editissima munera consiliâque evehuntur.

Ex prædictis constat quanti est momenti hujusmodi de judice variisque illius sententij disquisitio. Quò dilucidius ergo hoc argumentum exponatur, quóque plenius hujusce facultatis integritas simul ac malè sanus intelligantur habitus, dispicere non abs re erit prima in teneris rudimenta, atque unde ex simplicibus ad intricata pervenit, ac dein ex imis ad summa rerum fastigia caput attollit.

*Hujusmodi
disquisitio
de judice
permagis
est momenti.*





C A P. XIII.

De ortu atque incremento ejusdem facultatis.

*Prospetus
initij at-
que incre-
menti ejus-
dem.*



ILUCULUM in parvis ante hujus solis ortum tunc temporis aperiri constat, quando dignitatis suæ conscij ijdem compareant, & sese inter coætaneos eminere studeant ; quando itidem facilè conservent, quam acquisierint, dignitatem. Primùm quippe elucescit hæc facultas cognoscendo seipsos clarè sensisse, ac dein conferendo sui ipsorum naturam cum vi aliorum ingenitâ, & posthac sententiam de ordine gradûque, quem occupant, ferendo, & hunc qualis reverâ sit, factis dictisve eidem paribus monstrando. Quæ si recta à coætaneis agnita fuerint, adeò ut ijdem æmuli illorum observentur, priusquam invidiæ mala pueriles animos torserint, indicium hoc manifestum

festum videtur mentem jam in sublime tolli, ac proprio sibi modo sese ultra communes coarvorum terminos efferre; sicut insignis staturæ proceritas inter homines facile cernitur.

Est tamen dos hanc facultatem simulans, *Dos illam imitans.* quæ ad præcoccia nonnunquam ingenia pertinet, verum qualis ex imaginatione valenti provenit; at quam cæteri quantumvis admirentur, non tamen eo modo suspiciunt aut venerantur, quin de eâdem tanquam sodales divexante ac non innoxia querantur: Ex quo ingenij quidem fonte sales subinde mali argutiæque exundant, eò quòd inania pro solidis amplecti consuevit, nugæque splendidas vel sonoras pro rebus magni momenti divendit. Atqui nil plane auctoritatis apud æquales plerumque adipiscitur vel diu conservat; ast ex levitate statim à verâ isthac mentis celsitudine dignoscitur, quam certè hoc ingenium imitari potius quàm esse amat. Ideoque tali ingenio præditi vix unquam ad grandiora evehuntur, aut si fortunæ eos evehere placuerit, jamtum distinctio innotescit, arque ex loco editiore futilitas vanitasque palàm conspici solet. Nempe judicandi facultas arctissime

ipsas tutiores sint, sed & dominorum tandem usibus plenius inserviant.

*Sit cura
puerorum
maxima.*

Ex quo fit ut rudimenta, quæ teneris subjiuntur, curam mereantur maximam; utpote ex quibus omnia reliqua vitæ humanæ emolumenta extruuntur. Siquidem hæc facultas exercitari potest, si indiscriminatim pueri per ludos quævis non capiunt, verum in rationes omnium inquirunt, nec sine causâ cognitâ etiam in ipsis versantur. Quin & hallucinatio perpetuò inter ludendum jure reprehenditur, & singula rectè cognita laudem merentur: Quâ ratione attentio mentis excitari, uti & curiositas eorundem, quæ ad lusum spectant, utrum felicia vel inauspicata consequantur, sciscitatio provocari potest. Hisce verò lusûs generibus idonei ut frequentius intersint pueri optandum foret, ut ubi errori undiquâque locus sit, & ut qualis esse solet potestve oculis tenelli judicis aperiat. Tum verò ibi monendum, ut indices recti perscrutentur, videântque quàm prope errores semitæ ad verum ducentes sitæ sunt; quantâque similitudo earum, quæ in falsum terminantur, atque harum, quæ versus pomœria veritatis tendunt. Quippe nihil judicis

dicis nascentis gressus firmiores reddit, quàm ut sæpe de casu periclitetur, idque periculi ut apertè eidem monstretur. Quale corpori accidit, dum vires colligit crebrò ambulationem tentando, postquam paulatim fascias exuit; aliàque dein subsidia in usum ducendo, quæ erectum progredi juvent, vacillansque inhibeat; cujus dehinc lapsus in minoribus leviter feruntur, dum ex ijs graviores vitari queant: Tali sanè modo & mens ipsa in agilitatem sibi propriam proclivis, nunc labi sine crimine sinenda; & labendi levia ejusmodi sentire incommoda, quò graviores fugere certiùs errores discat; nunc & nova audere, & per itinera sibi nondum nota verum requirere hortanda, quò clariùs falsi facies innotescat, uti & quàm facilè recti specie decipi possit, addiscat & accuratè teneat.

Dehinc fiducià quævis innoxia tentandi *Varia ten-*
 exercere par est, ut novitate, quam nil *tanda.*
 vitij comitatur, nec stupeat nec terreatur.
 Enimvero posthac satius futurum est, puerilem ætatem nil credere difficile, quod non nociturum est, & nihil alienum, nisi cui malum subest. Experiri igitur quid
 O gratum,

gratum, lepidum vel amœnum sit maturè incipiat, quidve nauseam delicatis pariat, aut inficetum planè atque insulsum sapientiæ audit. Sententiam interim suam sine ejusdem causis, quales sibi videntur, assignatis ne quidem proferre fas sit. Dubitare non modò concedatur, sed & disceptare querendi gratiâ; imò à tritâ deflectere viâ nunimè vereatur, dummodo quare id ipsum placeat, & quodnam exinde emolumentum, dum vulgatum deserit iter, speret, exponat.

Non cogendi juniores sed ratione docendi.

Profectò cogere juniores judicia eorum amplecti, qui non aliam causam cur ipsi tueantur, dedere, nisi quòd in hac fortè inciderint, ac tanquam communem cœtaneis suis modulum sentiendi opinati fuerint, iniquum est; non modò propterea quòd jus in posteros illiusmodi arrogetur, quale à nobis ipsis majoribus negatur; verùm etiam, quòd sententias, quas nosmet tradimus, pueri tueri nequeant, nisi eorum facultas judicandi de placitis nostris decreta sua sancire nòrit. Etenim si nihil ultrà posteris investigandum relinquatur, ac judicia jamjam prolata perpetuò amplecti præstet, quàm immutare,

no-

novæque sibi asciscere; attamen hæc exercitia liberè in utramque quæsitam partem differendi prorsus utilia etiam forent ad nostri ipsorum tuendum sententias; quantumvis, inquam, ampliandi, iisque rectius aliquid adjiciendi, aut pomæria veritatis extendendi copia haud facta fuerit. Hæc de causâ quo tempore disciplinæ, per secula obscurorum nomen merita, unicâ illâ quæ scholastica nominata est doctrinâ (an dicam solertissimâ Italorum arte?) obrutæ jacerent; nos tamen acriter disceptandi, qualis qualis erat, ideo obtinebat, quoniam autores hæc illaudata, ac tam longè à naturæ judicijs diffita tueri non poterant, nisi exercitatione tali facultatem hanc catenis vincitâ libertate aliquatenus donarent, atque ad incondita ejusmodi amplexanda idoneam jugo gravi ferendo redderent. Tantum valet simplex nudæ libertatis species, ut ipsi ignorantie patroni similem liberæ disceptationis morem introducere cogantur, ne ipsâ ignorantie mole imperium suum tandem oppressum ruat.

Quinetiam, quantumvis mens humana
seculis istis evilesceat, nec sententiam ali-
am admittere auderet, quàm qualis ex re

*Qui Li-
bertas fu-
dici resti-
tuta est.*

Romanâ esset; tantum tamen auxiliij in liberis disceptationibus situm est ad excitandam supinè jacentem hanc facultatem, ut ex disputandi (quod vocarent) copiâ factâ, licet materia satis angusta esset, utpote quæ integra ad decreta Pontificis confirmandum & ante illius pedes proculcâtam mentem prosternendum referretur, orta demum sit eorundem decretorum examinatio: Quam mox secuta est ipsorum repudiatio; sicuti eos decuit, qui triumphali Pontificis Romani currui sese devinctos fuisse jam conscij evasissent, & semet proinde antiquæ libertati asserere constitissent.

*Judicia de
Agnis.*

Denique quoniam per signa plerumque pervenitur ad rerum cognitionem, ideo de ipsis etiam distinctè sententiæ ferendæ sunt; cujus gratiâ vocabula singulas denotantia fuerunt adinventæ. Proinde ad hanc normam puerilis ætas non inutiliter quærît, unde proprietas nascitur, & quomodo pariter ab eâdem meritò disceditur. Quippe in illiusmodi ferè quæsitis probè intellectis primordia culturæ judicis facultatis sita sunt. Quin & ex hisce assurgit ad nomina rebus tam exquisitè aptanda, ut mentis con-

conceptus judiciâque clarè dictis scriptisve prodant. Quale quidem operis genus ei nunquam feliciter cessurum est, cujus mens hæc facultate decernente atque ad unguem eadem callente non ornatur. Frustra enim auctores laudantur, quorum verba rebus minimè congrua sunt; nec verba omnino congruere rebus possunt, quæ vagè & non determinatè ad has vel illas æquè pertinent. Imò & in talibus vacillatio, quantum alia forsan culpantur, pendet à primâ puerorum educatione, quando vim vocum fontèsve earundem proprietatis aut pravè ediscerent, aut non tanti quanti sunt momenti æstimantes veluti rudimenta spreverint; qualia verò tanquam fundamenta intueri oportet.

Profectò propter nomina improprie usurpata, potiùs quàm rerum ipsarum incertitudinem in errores plerique adolescentes dilabuntur: Enimvero quæ interdum laxius accepta, interdum arctioribus terminis restricta dicuntur, de hisce nihil certi præfiniri potest. Ideo in judicijs satis culta hæc facultas vocabulis utitur, quæ omnes ambigendi causas undiquâque præcidunt; quod sanè ab illis fieri nequit, qui artem

*Errores ex
malè in-
tellectis
signis.*

propriè loquendi perinde ac scribendi hanc quaquam callent.

*Quæ à
fontibus
investigan-
da.*

Dehinc autem liquet, quàm utiliter adolescentes occupantur, qui in sermonis vim sedulo inquirunt, quidnam propriò primò dicitur, ac dein aliter atque aliter à primario isthoc dicendi more translatum fuit, prout usus postulavit. Cum igitur ex fermone, tanquam fecundâ errorum minera, incerta mentis conditio deducti consuevit; ea stabilis reddi nequit, donec singula, ex quibus fermo constat, imò & præsertim particulæ, ad examen revocata fuerint.

*Usus artis
Crî ica.*

Propterea non sine causâ artem, quæ in maximè adaptandis dignoscendisve verbis cernitur, Criticam appellant eruditi; cuius sanè imperitus frustra in rebus percipiendis earumque naturis cognoscendis, nedum quæ ipse cogitavit deponendis, versari solet.

*Rerum
cognitio
adjungen-
da neces-
sario.*

Illud interim constat hanc artem non discendam, nisi rerum ipsarum cognitio adjungatur; quippe quibus isthæc signa affigi soleant. Quas dein cognitæ verbis disertis

disertis ornando, & distinctum singulis ordinem germanamque simplicitatem tribuendo firmitas judici conciliatur; quæ proinde alijs facilè perspecta est, eaque apparet, cui plerique ultro nec coacti invitantur, ac fidem sponte præstant. In quâ quidem mentis progressionem adolescentem oportet suo semper uti judicio, & quasi sine cortice nare: Et dum id solum, quod in quâque re sibi probabile videtur, amplectitur, animi vires sensim confirmabit. Hujus etenim facultatis æquè ac corporis membra mobilitate plurimum vigent, & eò plenius crescunt, quò liberius agitantur; donec istiusmodi tandem exercitatione sanitatem acquirunt agilem pariter ac robustam. Ex adverso autem ubi methodus tradendi talis est, qualis fidem decretis, etiamsi causæ cognoscendi abditæ sint, habendam postulat; quatenus hæc auctoritas sancitur, eatenus decernendi facultas extinguitur. Unde mentis quidem vigor perpetuæ quasi pueritiæ affigitur, neque isthæc, postquam organa maturuerint, sui esse juris valet. Hinc ea nascitur incertitudo, quæ eòusque adultos nonnunquam obsidet, ut æternum magistros respicere opus sit, atque in verba eorum perinde

ac sententias jurare addicantur. Idque propterea quòd judicandi facultas ab illis pendere, nullatenus verò sui esse juris dixerit.

*Judicis
maturitas.*

Iste autem à Juventà gradus, qui nostram disquisitionem jam meretur, tam altè situs est, ut sententiam ferre æquam judex queat de animi affectibus; qui vires perpetuùm in hoc usque ævi tempus colligere solent. Nunc enim forma, quæ juventutem irradiat, sæpissime laudata mentem ejusdem consciam effert; eamque ferè tumentem ob alias etiam dotes relinquit: Adeò ut valde contumeliæ vim sentiat, omnémque pro injuriâ observantiæ neglectum habeat. Hinc irarum fluctus, odiique ac simultatum, quæ non rarò humana omnia conturbant, origo. Hinc etiam arbitri non inepti desiderium & necessitas. Totum igitur quod extumuit inane vel opplere, vel intra angustiores contrahere fines oportet, donec ad justum apud æquales sorte viros modum redigatur. Atque ita judex maturescit, non verò ad summum maturitatis fastigium pervenit, usque dum omnia tumentis istius habitus vestigia deleta fuerint, ac prorsus

prorsus dispareant. Quin imò ad extremam hanc celsitudinem vix mediâ ætate pervenitur propter animi affectus, quorum vehementia non adeò inhiberi per totum hoc studium consuevit, quin novas iterum turbas cieant.

Quamdiu igitur mens cum hisce conflatur, incerta prorsus illius conditio patefacit hanc facultatem ad summum minime adaugeri, neque auctoritatem in tantum stabilitam esse, quantum ad personam judicis gerendam sustinendamque requiritur. Verùm quando easdem ita partes constanter tuetur, ut nec amore, neque irâ metûve, aliâve perturbatione ab instituto diduci queat; sed uno tenore affectuum vehementiam regit, æquâque præ se fert mentem; modò cæteræ dotes concurrunt, hicce status indicat, mentem non eo, quo prius, modo habere, ast ejusdem quasi clavo gubernatorem assidere, qui nec malis cedit, nec bonis nimium fidit; quique specie rerum non deceptus gaudijs incitatus haud effertur, neque irâ vehementius commovetur, neque demum tristitiâ valde deprimitur, aut desperatione obruitur. Non quòd constantis sit eodem
semper

*Signa maturitatis.
Constantia.*

semper modo ad omnes rerum vices se gerere, sed æquo ita animo esse, ut de singulis judicia juxta variam rerum naturam diversa edat, non qualia ex affectibus animi proprijs emanant.

*Et datum
ad judicium
speculatio-
nem con-
summatio.*

Dein quæcunque inter dotes hujusce facultatis enumerantur, eadem in maturitate vigent; ubi nil prius intelligitur, quàm ut imaginationi imperandum sit. Hæc quippe priore ævi stadio judicis æmula est, necnon sæpenumero in locum ejusdem sufficitur; adeò ut plures vix discernant, quidnam inter hæc ambas earumque opera interest. At quando hæc ipsa maturuerit, non ambigendi adhuc locus esse potest; quoniam non recti species ultra, sed hoc ipsum quæritur, nec quàm similia alijs alia sunt, nisi ut inde erroris periculum devitetur, & quomodo similia dignoscere ab iisdem liceat. Attamen minimè imaginatricis operam spernit, sed eam audacter frænâ regit, ipsamque sibi ancillari, prout rerum natura fert, jubet. Præcipuum verò judici munus est assidue scopum pro viribus suis dignum intueri; atque ita dignitatem conciliat tueturque:

Nec

Nec sine dignitatis suæ conscientia omnino viget.

Quandoquidem autem dignitas consistit cum vanitate nequeat, ante omnia ideo ab eadem cavet, & tutius ab alterâ parte peccari ducit, nempe modestiæ ejusmodi, quæ humiliora de sese, infra quod par sit, concipit, quàm arrogantia, quæ ad innumera tendit mala, & modum apertè negligens rationi palàm adversatur. Ex hac quippe parte majus periculum imminet, eò quòd insensissimos undique hostes creet, & simul mentis vires ac fiduciam depasci sinat, utpote quæ rebus, quales sibi deesse conficit, vix nôrit confidere. Sani proinde judicis maturitati opponitur præcipuè vanitas, quæ ex imaginatione excrescit; qualis certè impedit, aut in aliud tempus rejicit eorum acquisitionem, quæ hoc ævi tempore commodè nascuntur, ipsùmque ornant. Quemadmodum divitias (a) eadem deridendas propinat, honoremque inutilem reddit; potentiam etiam terribi-

Usi & vanitatis castigatio.

(a) *Fundos Ausidio lusco pratore libenter*

Linquimus, insani ridentes præmia scriba. Hor.

lem, atque scientiam ipsam peritiâque, ut nihili habeatur, necquid momenti secum afferat. Interea verò quò magis quispiam ad utilia conquirenda spectet, eò minoris dotes suæ indies sibi pendentur, & quò plus laudis meretur, eò difficiliora sentiet, qualia bene merenti perrumpenda sunt. Profectò mentem laude reverâ dignam reddere non est, nisi tantum attentionis laborisque adhibeatur ad explendos omnes cognoscendi appetitus, atque ejus asperiora polienda, tumentiaque dein omnia deprimenda & vitia castiganda, ut vanitas rarò locum in mente probè cultâ, scientiâque rerum ditatâ inveniat. Quòd si fortè in præclaris viris hoc vitij homines falsò conquerantur, & quidem plerumque (ut fit) omnibus sine ullo discrimine impudent, iidem ferè sunt, qui invidi, simul ac ignavi viam sibi apertam nullòque negotio monstratam volunt ad sapientium templorum adyta; ac honores illos acquirere student, quos quidem adire hisce solis fas est, qui à naturâ pulchrioribus animi dotibus ornati assiduos cogitandi labores feliciter perferunt. Tales quippe (ut jam dictum est) præclaros eruditione viros tanquam arrogantes aut vanos notare semper soliti fuerunt

erunt. Hoc sanè invidiæ genus est, quod intellectus prænobilis pretium indicat, ubi-
cunque ea conflatur. Hujusmodi verò il-
lustres viri & planè heroës si invidentiâ po-
pelli perturbentur, exinde discere possunt
perfectam judicis maturitatem se nondum
attigisse, verùm curâ ulteriore opus sibi
esse, quâ & radices hujusce vanitatis præ-
cidant divellântque.

Neque certè hîc prætereundum, quòd *in quali-
indole.*
nulla facultas fortiori indigeat pectore, ut
ad maturitatem justam perducatur; quod
si desit, fructus ejusdem velut immaturi, &
acerbi aut miti sapore indotati evadunt:
Unde omnia dehinc difficilem redolent se-
nectutem. Eadem etiam vix ad perfectam
maturitatem evehitur, cui corporis organa
eòusque sana non sunt, ut menti inservire
queant. Hinc siquidem mens humili in-
dolis forti affigitur, animique imbecillitati
succumbit. Est enim ubi judex æquàm for-
tiri mentem nunquam potest, quin umbrâ
periculi trepidet; nec quoniam tales af-
fectus dominantur, sui esse juris ei omnino
liceat. At si ætate corporis florente tam
pauperis esse indolis cuivis contigerit, vix
sperandum postea huncine ad majora com-
paratum

paratum iri, quum ex illo tempore meti-
culosi magis à naturâ fiant homines, quàm
animi robore præcellant. Quod quidem in
causâ est, cur juvenibus tantum ea lau-
datur, quæ animum adauget educatio;
quoniam si hæc ipsa tunc temporis neglecta
fuerit, posthac in vitâ robur istud minime
acquirendum videtur.

*Comproba-
tio bene-
rentis.*

His autem supervenit magnus ille bo-
norum consensus, qui acta incorrupti atque
omnia sani judicis probat: Consentaneæ
quippe tali sunt eorum sententiæ, quibus
facultatem hanc maturuisse palàm notum
est. Is enim videtur illorum, apud quos
judicandi potestas inclaruit, communis qui-
dam sensus. Interea judicis celebris futuri
indicium in omni ætate habendum est, si
qui boni sunt recta, quæcunque dicit, ar-
bitrantur: Nempe eadem facultas in pue-
ritiâ atque in sequenti vitæ curriculo sibi
constare solet. Quemadmodum Cyrus (a)
puer haud dissimili judicio ludicra regis ex-
equutus est officia, quo in adultione ætate
vera præstitit: Ideoque tam præcoci in-

(a) Justin, Lib. I.

gemii primitias Astyages jure merito admiratus est, & non vanum futuræ illius gloriæ agnovit augurium.

Tempus autem, quando hæc facultas ^{Ætas,} plenius fructus edat, vix statuere fas est, ^{quando viget.} antequam ad eam, quæ proximè insequitur, ætatem deventum fuerit: Ubi affectus animi non eòusque æstuant, omniæque conturbant. Hic quippe melius consulitur, quum ardor haud ita dominetur; quumque ideo moderatiora cuncta placeant. Et enim extra aleam ferè posita est hæc ætas, quæ non huc illuc negotiosâ actione impellitur, qualis junioribus contingit, qui cum coævis suis colluctari ferè perpetuò amant. Hinc itidem agitatio mentis non adeò vehementis aut præceps est; verum iudex æquâ lance omnia perpendere multò facilius potest. Ea siquidem ævi nostri tranquillitas ut plurimum videtur, quæ procellosæ tempestati paulò antè prægressæ succedit, nec tamen imbecillitate obsidetur, aut tantâ organorum debilitate laborat, quanta officio judicis minimè idonea est. Facultates hîc satis vigent, ac larga dein experientia varia, per quæ transitur, itinera monstravit; hîc tanquam in speculo quivis incertam negotiorum

gotiorum conditionem intuetur, eventusque rerum humanarum consiliorumque dubios. Hic, quoniam conflictus cum utilium tum cupiditatum semper in conspectu sunt, vicissitudines junioribus minimè expectatæ non valde commovent ; utpote quibus optima frequenter consilia immutantur. Unde oppositorum subinde ac planè repugnantium sententiarum morumque conciliatio, ac in unum aliquem scopum directio, id ipsum ferè est, quod hæc ætas ultro prospicere optat.

Atque increscit.

Increscit dein hæc facultas, prout aucta atque ampliata fuit priore vitæ studio, & pro copiosâ experimentorum varietate, eaque in difficilibus majorisque momenti rebus, & ubi scenæ personis gravioribus impletæ causas dederint, quare ad nobiliora opera adhibeatur. Liquet sanè frustra eum fore, qui messem vel vindemiam uberiores hoc vitæ autumno speraret, quàm pro sementis modo ; imò nec ab hac omnino diversam aut genere aut utilitate ac præstantiâ.

Morbi ejusdem.

Observatum fuit antea, quo ritu imaginatio per omnia judicem imitatur, eamque

que malè habentem præsertim hujusce affectare munera, atque inde vanæ imaginationis intemperiem minimè cum hâc facultate, modò integra sit, convenire. At verò ejusdem peculiare morbi amentia sunt ubi pravè, atque ex adverso insipientia ubi vix omnino judicatur. Quorum quidam priorem sæpe vehementia consequuntur symptomata, qualia dictis factisve notantur; in altero verò discrimen inter homines ac bruta animantia è medio sublatum videtur.

Ut iudex consummatus naturæ pressius *Signa eorundem.* vestigijs insistere, & ab ordine ejus stabilito non abhorre, verùm dignitatem suam juxta eundem conservare solet; sic etiam à moribus immutandis cavere, qui ad naturam tam propè accedunt, ut ab eadem non nisi ægrè separari queant. Ubique igitur hæc facultas integra manet, constans & perpetua cernitur voluntas singulos rerum ordines distinctos conservandi, prout consuetudine signati sunt, qualis legibus naturæ consona est, neque à communi iudicium oculatissimorum sensu aliena. E contrario autem si quis repentè longius ab hujusmodi consuetis moribus non datâ
P causâ

causâ abscedit, metuendum quidem ne mentis alienatio consequatur ; quoniam nil præter solitum est, quòd levis istiusmodi affectus sensim evadat periculosissimus. Atque ita sæpe evenit, ut, priusquam familiares insuetum hunc sensum notârint, morémque abnormem, quem mens hunc in modum induere sibi cœpit, isthic crescat, & in habitum deteriorem confirmetur ; qui & nonnunquam radices in insaniam usque agit. Quapropter medicus ad sensum communem veluti normam respicit, à quo si quem videat parum deflectere, nisi præjudicijs abductum, aut perturbationis repente obortæ vi similive aliâ ratione permotum, huic non immeritò à mentis alienatione jam tum cavendum censebit. Eo enim temporis articulo auxilia perquirenda sunt, quoniam, modò id negligatur, exinde prolixa malorum series insequitur. Altera pariter datur suspicandi causa, si quis decencia omittat, maximè ubi is, qui male sanus creditur, antea totus in illis fuerit ; sicuti etiam quum recentium nugarum quivis satagat, in quibus tanquam magni momenti rebus versatur. Talia sanè iudicem jam laborare frequenter ostendunt, eatenus scilicet, ut auctoritate suâ spoliari, atque
ad

ad sese minimè digna ac indecora deduci queat. Profectò nil longiùs ab hujusmodi morbo abest, quàm ut judicis auctoritas dignitasque integra conservetur; ac quicquid ad contemptum ejusdem propiùs accedit, id omne ad malè sanum itidem habitum tendit; nisi aliquid consilij graviorisve causæ ei subfit.

Quoniam autem hoc morbo affecti à moribus populi recedere consueverunt, qui insigniter in holce peccant eà de re mente capti fuerunt habiti, taliùmque ritu legibus soluti. Unde Solon celeberrimus Atheniensium legislator, amentiam prudenter simulans, reverentiam legum minimè violavit, dum abrogare quandam ex ipsis conaretur, quæ publicæ tunc temporis utilitati adversabatur; atque ita patriam juvare ausus est, quamvis lege cautum fuisset, ne quis id operis aggrederetur. *Est autem hoc (ait (a) Laërtius) ipsius factum vel celeberrimum. Quum de Salamine, ipsius patriâ, inter Athenienses & Megarenses ferme usque ad internecionem armis dimicatum*

Exemplum.

(a) In vitâ Solonis.

esset, multisque cladibus acceptis, capitale apud Athenienses esse cepisset, siquis legem de vindicandâ insulâ ferret; sollicitus Solon ne vel tacendo parum Reipublicæ consuleret, vel consulendo sibi noceret, subitam sibi dementiam simulat, cujus prætextu non dicturus modò prohibita, sed & facturus erat. (a) Deformis habitu more vecordium in publicum evolat, factoque concursu hominum, quò magis consilium diffundit, insolitis sibi versibus, per preconem suadere populo cepit quod vetabatur, omniumque ita animos cepit, ut adversus Megarenses bellum extemplo decernerent, insulâque devictis hostibus Atheniensium fieret.

(a) Verba Autoris sunt, Οὗτος γεφανωμένος εἰσέπεσεν εἰς τὴν ἀγορὰν quæ habitu non tantum deformem, quantum à communi sobriorum more in forum prodeuntium abhorrentem, scilicet coronâ redimitum sonant; Coronâ verò forsan tali, qualis Bacchantibus solennis, vel etiam compotioribus in usu erat; ita ut similem ebrietatis fingeret furorem. Quasi scilicet lætantium potius quàm tristium sibi habitum indueret. Quod magis signatè quàm Plutarchus; cui πῖλον περιέμενος, Pileolo amictus; tanquam malè duntaxat sanus dicitur.

Verun-

Veruntamen de hisce prolatam à vulgo *Now ad-*
sententiam minimè comprobandum ; quip- *mitten-*
pe quod nimium consuetudine, rectane an *dum vulgi*
prava ea sit obstrictum liberè philosophari *judicium.*
nesciat ; quin & ipsos philosophos sapientiæ,
velut insaniæ, arguat. Quocirca quod de
Hippocrate proditum est, eodem quidem
medico non indignum videtur ; qui, quum
ad Democritum tanquam insaniâ laboran-
tem, popularibus ipsius Abderitis iudicibus
accerferetur, primùm hærebat, (a) morbó-
ne Democritus laboraret, an ipsius concives
errore decepti essent. Dein postquam con-
venisset, ipsumque philosophum specimina
edidisse accuratæ suæ diligentiae coràm ob-
servâset (uti refert (b) Athenodorus) ad-
miratus est.

Ex alterâ autem parte morbi interdum *Insipien-*
eò tendunt, ut hancine facultatem ever- *tia.*
tant, ejusque auctoritatem prorsus aboleant ;

(a) Εἴπερ δὴ καὶ τῷτο νόσος ἐστίν, ἀλλὰ μὴ ἀπάτη
συγκιζέσθαι. Ἐπιστολ. Ἱπποκράτης Ἀβδηριτῶν τῇ βελῇ
καὶ τῷ δήμῳ.

(b) Apud Laërtium in vitâ Democriti.

quo pacto evenit, ut vix ulla rationis vestigia reperiuntur. Quod quidem ex imbecillitate hujusce facultatis oritur : ubi inter homines & bruta animantia maximum discrimen situm videtur. Proinde hoc casu, ipsis commodè exercenda adhuc restant organa, qualibus bruta nobiscum communiter utuntur, qui quondam rationis etiam participes fuerunt : Adeò ut speciem solam jam extrinsecus humanam gerant ; mente verò haud quidquam homine dignum ostendant. Atqui qualiscunque sit iste casus, eorum attentionem meretur, qui in arrogantiam atque morum insolentiam proclives sunt. Talibus siquidem natura spectaculum exhibet, atque invisam istam rationis inopiam tanquam monimentum erigit, ubi adhuc viventi mens quasi sepulta jacet : Nimirum ut quanti sit sapere, ex visâ insipientiâ, homines æstiment, & cognoscentes quantum decoris vigens mentis bene sanæ imperium corporis facultatibus superaddit, se eidem submittere studeant.





C A P. XIV.

De Ratiocinatione.



PERCEPTIS singulatim rebus ac dein inter se collatis facultas judex aut decernit hæc à se invicem per omnia discrepare, aut aliquid designat secundum quod sibi convenientia videntur. Illis interim prolatis sententijs mens idipsum perspicit, habetque veluti modulum, ad quem cæteras exigat; unde constat, quousque diversæ sunt, ac quàm prope se invicem accedunt. Quod quidem facilius apparet pro moduli aptitudine, quo ad hanc operam utitur, & per quem experiri queat, quàm longa latæve aut ampla hæc vel illa res est.

*Quale sit
ratiocina-
ri.*

At si nihil rebus commune habeatur, *Simplex* idipsum in usum ducendum, quoties de *ratiocinij* alijs *genus.*

alijs affinibus congeneribúſve his aut illis rebus de quibus sub iudice jam lis est, differere opus est, quòd ſcilicet' nil commune intercedat. Quale ratiocinij genus ſimplex à venatoribus tributum eſt canibus ſuis, dum ex tribus vijs in conſpectum venientibus, per quas ſerus tranſire potuerit, duabus nares indagatrices admoveant; ac ſi veſtigia nec híc nec illic redolent, per tertiam, quæ ſola reliqua manet; intentatam fidenter tranſcurrere ſoleant: Quasi ex tribus duabus demtis, tertiam ſine controverſiâ ingredi nôſſent.

Ratiocinatio vix alia à numeratione.

Itaque prout mens res eſſe diverſas, vel eaſdem ac alias decernit, ſic etiam rationes earum ex illis infert: Quo pacto evenit ut ratiocinia ab hoc ipſo fonte oriantur, quòd rem unam ac dein alteram ex illâ cognoscat: Quod ſanè vix aliud videtur, quàm numerare. Unde liquet hanc facultatem à numero petere non modò vires alijs demonſtrandi, ſed & ab eodem ſatis agnito pendere, ac primariò exinde deduci. Ad quarum proinde ſingularum notitiam ſpectat cauſas advertere, ex quibus inter ſeſe diſcrepare vel eodem modo habere notum ſit; quoniam ratiocinia hiſce tanquam fundamentis

damentis innituntur, neque pluris valent, quàm causæ res ipsas internoscendi exhibent. Non enim ad hasce spectant, quæ in rebus sitæ sunt, sed quatenus ipsæ cognosci possunt. Quapropter rationum series irrita est, ubi causæ cognoscendi ad omnes argumenti partes non pertingunt & comitantur : Idque quia de rebus disceptatur, qualiter cognosci possunt, non verò quatenus naturam sensus nostros fugientem, cujus indicia eadem nullatenus præbent, in se complectuntur.

Propterea ratiocinatio bene habet, dum secundum judicia veræ aut etiam falsa colligit, quæ jure exinde sequi patet. Unde ratiocinandi facultas officio suo ritè fungi potest, etiam si judex in errores digrediatur. Enimvero insanus ille, qui in Piræo Atheniensium portu omnia mercatorum navigia mercésque inibi contentas ad sese jure pertinere decreverat, tametsi pravè rem intelligeret, atque in errore verfaretur, id tamen ratus proculdubio non sine causâ inferre potuit, sibi met tantum divitiarum possidenti licere hisce tanquam suis uti fruique. Quòd si errores judiciorum in hanc itidem facultatem transeant,

*Non alia
à judicijs
repetitis
aut supputatis.*

atque

atque illis consentanea inferantur, veri simile videtur, sicuti prius observatum est, non esse alia hujusce facultatis atque judicis organa; verum quod consequitur esse ejusdem facultatis exercitium, denuo vel sæpe numero repetitum. Nempe primum fertur sententia, cui altera subjicitur; & in utrâque communis quædam mensura cernitur, quæ, dum ad duas res cognoscendas adhibeatur, indicat priorem posteriori quādamtenus parem vel imparem esse. Quo pacto evenit, ut tertia iterum feratur sententia, quæ in se complectitur judicium eorum, quæ cum mensurâ collata singulatim fuerunt. Inferre igitur nihil aliud est, quàm decretum condere de duobus, quatenus cum tertio tanquam modulo conferantur; qui dein sæpe usurpatur, prout inter homines commercia exercentes norma aliqua ad determinandum ea, de quibus hâc demtâ ambigeretur. Nec proinde opus est multiplicare facultates, ubicunque ex varijs affectibus aut etiam muneribus eas plures esse minimè patet. At enim functio inferendi unum aliquod amplius judicium ex duobus præmissis non magis aliena videtur à prioribus, quàm accuratior inspectio à simplici intuitu, aut ad
summum

summum ab ipso, qui ope tubi optici vel perspicillorum curiosius peragitur. Usu interim atque experienciâ crescit ratiocinandi potentia; ac peritiam facilitatémque, uti & acumen ac celeritatem adipiscitur; atque in aliquibus multò vegetior est quàm alijs, utrùm propter organa ipsa vel peculiarem quorundam naturam, quæ miram perspicaciam ijsdem cum temperamento æquabili tribuit. Quod ipsum cum in percipiendi tum decernendi facultatibus apparet; quibus tamen vis imaginandi non eatenus floret.

Quinetiam adeò acutum percipiunt non nulli, tamque impatientes satis longæ attentionis sunt, ut ratiocinari cum certitudine vix liceat, aut saltem non nisi ea intuitu, quæ primâ facie considerantibus sequuntur, nec omnino quæ serie prolixâ ex causis varijs deducuntur. Hujusmodi fere vulgaria sunt ingenia, quæ rebus humanis instanti temporis articulo utilia prospicere consueverunt, quibus tamen rationum momenta accuratè perpendere non licuit. Et quidem bene rebus in universum sic consulitur, ut non semper ad futuros è longinquo eventus respiciatur, nisi ab hisce
qui

*Quidam
laboris ra-
tiocinandi
impatientes.*

qui clavo assident, & quorum est pericula omnimoda, ut vitentur, considerare; quum ob situm celsiorem non angustis finibus, ad instar inferioris subsellij nautarum, prospectus circumscribantur. Enimvero non est cujusvis, modò pervideat, futuris optimè prospicere; tanta sunt rerum certamina, quæ nunc instituenda & provocanda majoris emolumenti aut futuræ securitatis gratiâ; nunc omnino fugienda, propter discrimina, quæ in ipsis negotiorum conflictibus tractandis perito oculo nuda & aperta conspiciuntur.

*Progressus
ratiocina-
tionis à
numero
noto ad
ignotum.*

Ut autem omnis scientia pariter atque sensuum externorum perceptio, radicem figit in unâ eâdemque rerum cognitarum naturâ vel divisâ & distinctâ, ita omnis ratiocinatio à numero cognito primis initijs ejusdemque genere noto vel indicato procedit, & continuo progressu firmatur; ac singuli in ratiocinijs errores exinde contingunt, quòd ad idem unicum vel eadem plura, prout diversum numeri genus constituunt; ratiocinandi ordo non respiciat, verùm huc vel illuc deflectat integra rationum series, aut catena quædam ex illis, quæ seriem absolvunt. Quemadmodum
cùm

cùm tertium illud cujus operâ ostenditur, quâ ratione res duæ ad se invicem habent, aliquando latiùs aliquando angustius intelligatur, prout idipsum diversum est fallacia in ratiocinantem incidit. Nec aliud fit quum exemplum vel aliquid simile proponatur, quod sanè pro eodem non ultrà habendum, quàm ejusdem imago esse cognitum fuerit.

Quo pacto fallacia ratiocinantibus eodem *Fallacia* ferè ritu imponit, quo præstigiatores visus *non aliter quàm præstigia.* decipiendi solent; nam tertium illud clanculum subducitur, aliudque in ejus locum tanquam idem substituitur, ut *ab ijs, quæ clara sunt, ipsa per sese* (monente (a) Cicerone) *quasi præstigijs quibusdam & captivonibus depellamur.* Animadvertere verò est versutos doli artifices rarò æquè fallere potuisse, ac quando socios concilient, fœdusque paciscantur, cujus virtute mens suspicax undique obsideatur, ac communis sensûs speciem induta fraus valentiùs deludat. Ad eundem sanè modum fallacia veri optat speciem, induitque icto quasi

(a) Acad. IV.



foedere cum imaginandi facultate aut animi affectibus; ac dein eorum operâ huic mentis facultati imponit. Quod quidem nullo ferè negotio fit, si res ipsæ ejusmodi sunt, de quibus in utramque partem vulgò differitur, ubi ratio nec verum nec falsum evincit. Hîc igitur curæ esse debet, ne nihil intersit; vel, quod eòdem recidit, ne mens ipsa antea in partes alienas discedat.

*Maxima
certitudo
ubi nullâ
refert.*

Quâ de re evenit, ut ibi maximâ cum certitudine ratiocinandi facultas inferre concedatur, ubi argumentum planè exors est ejus quod hominum intersit. Id quod in contemplationibus accidit, ubi verum apparet sejunctum ab utilitate. Quemadmodum in eâ disciplinâ, quæ numerorum potestates contemplatur, ac dein easdem clarè demonstrando ad negotia adhibet, litésque adeò dirimere supra omnia cætera apud homines valet.

*Illatio ge-
neris uni-
versi vel
singularis
rei.*

Porro hoc quod infertur vel in universum judiciorum genera regit, vel rem aliquam solummodo singularem; prius, quandoque certò de toto rerum genere constiterit, longè anteferendum est posteriori,
quòd,

quòd, dum unicâ re continetur, ad fines scientiæ ulteriùs proferendos conducit. Ad hunc modum iudicium deducitur in Analyfi numerali, quod ad plura extenditur, quæ ope ejusdem præcogniti intelligi possunt. Adeò ut norma fiat, secundum quam multa reguntur, & quæ demum ipsa adhibenda est, dum mens ulteriùs verum falsúmve investiget. Sic unicâ re cognitâ tota ars extruitur; veluti ex theoremate, quod Pythagoræ attributum est, norma illa Arithmeticæ, ex quâ Multiplicatio progredi solet, præstituitur.

Quo quidem modo iudicium prius ad *Series illa-*
alterum inferendum conducit; ac dein plu-
tiogum.
ra ordine suo seriatim sequentia cognoscendi causæ evadunt. Verum sanè est, falsum ubique admissum posse hanc seriem interrumpere, ac dein de sequentibus nil certi exinde constare: Nec dubitandum quin ex varijs rerum generibus, earúmque ratione multiplici, sæpe aliquid incerti & confusi irrepit. Neque verò id mirandum, quando negligentiae parum aut incuriae, in rationum serie catenam aliquam non satis advertendo, ut id operis inconfectum sit efficere valeat. Quale profectò etiam in
cla-

clarissimos caderet, non tamen ad contentum eosdem devocat; utpote qui plurima castigârunt, non tamen omnes omnino mendas perviderunt. Nempe non modò humanum est errare, verùm ex erroribus plures rectam invenerunt viam, quàm ex veris præcognitis. Quinetiam ex autorum celeberrimorum erroribus illud liquet, quàm non sit judicijs fidendum: At si judicia ad examen crebrò revocata perpetuò inter vera recensentur à iudicibus incorruptis, qui & fontes ipsos, unde depromerentur, adierunt; talia falsitatis arguere eâ solâ de causâ, quòd homines autores essent, ideòque falli juxtâ cum reliquis possent, nil sanè hocce fidei detrahare debet, at eosdem peracuere, quòd rectiora prodant iisdem quæ convellenda censent.

Ratiocinandi opus præstantissimum.

Clarè disciplinas dictis scriptisve tradere consummatissimum est mentis eximix opus, neque eò quòd, ut jam dictum est, in errores proclives sint homines, contemnendum est; at potiùs honor ijs debetur, quorum plura nitent, verisq; haud absimilia sunt. Profectò erroris genus habendum est, si aliquid proferatur, quod ad accuratissimas dicendi scribendive normas non quadrat;

quadrat; adeò ut deficere itidem inter errores haberi queat, perinde atque falsi specie decipi. Veruhtamen qui censet accusandos ideo mortales, qui pulcherrima quæque omnibûsque numeris absolutissima vix edunt, næ ille iniquum in humana omnia iudicium profert, atque indiciorum, quæ alijs postea fiunt, momenta haud satis perpendisse videatur. Gradatim quippe ad notitiam veri falsique quasi per scalam conscendere ratiocinandi facultas consuevit; & minutissima sæpe ab imperitis tradita indices maximorum deprehendit. Quod quidem abunde patet ex disciplinarum historijs; & quàm parvis primùm elisis scintillis radiantia earum lumina omnium ferè oculos, longè latèque procedente tempore percellerent.

Denique quòd tantum seriò naturam *Errores quantum licet cavendi.* perscrutantibus innotescat, hanc ipsam attentè considerantibus magis incredibile videri par est, quàm quòd erroribus ratiocinandi facultas obnoxia sit. Tam tenuibus enim fibris organa ejusdem contexuntur, & tantâ subtilitate dotantur, quanta varijs rerum generibus congruè adaptetur, quò liquidius earundem species percipiat, offeratque

râtque sincereas judici; ac dein tam proclive est hominum ingenium maximè omnium à labore mentis improbo in id, quod corpori volupe est; & viæ, quæ in falsum ducunt, tam undiquâque patent, facillimèque apertæ omnibus obijciuntur, ut quâ re aliqui permoti verum per ævi sui spatium exquirere possint audeântve, nisi purâ mentis nobilitate atque invictâ ipsius fortitudine, idipsum pro miraculo meritò ducendum sit. Enimvero illi, qui aut per prolixam annorum seriem hisce studijs assiduè incumbere dedignantur, aut clarissima seculi sui judicia cum vetustissimis conferre minimè consuêrunt, opinione hominum forsan clariore, non ratiocinijs acutiores aut circumspèctiores, neque firmiores constantiorêve aut saniores esse possunt.


*Idem mor-
bi hujus
atque ju-
dicis fa-
cultatis.*

Sicut autem ratiocinandi facultas judici coæva est, ita etiam eadem patitur. Atamen ut ex numerandi potentiâ modo sibi peculiari pendet; robur ejusdem perinde atque imbecillitas maximè æstimanda sunt ex eo, quod numeros calleat, aut calculorum discrimina prorsus nesciat. In hunc modum debilitas cuius notissima est, si quando primariam numeri distinctionem

ni-

minimè teneat; vel simplicissimos duntaxat numeros, non verò compositos aut involutos jam recenseat; veluti si summam colligere, aut eandem in partes resolvere inferiores nequeat. Quin & in deterius ruere tunc censenda est, quum neque vim numeri in rebus sentiat, quæ apud homines maximi valent; quales quidem sunt nummi ejusmodi, quibus populares uti frequentissimè solent. Hinc quippe patebit memoriam, quæ tanquam fundamentum utrique facultati substernitur, valde deficere, perinde atque hanc & illam esse infirmissimam.





C A P. XV.

De retrospectiendi & recognoscendi facultate.

*Jus hujus
facultatis
in cæteras.*



PERVENTUM jam ad mentis arcemne dicam? an speculam? Unde nimirum cæteras facultates lustrat, iisque invigilat, errores inibi commissos reteggit, eosdèmq; corrigendi, atque in ipsas animadvertendi jus potestatemque obtinet. Quippe isthæc in percipiendi, imaginandi ac judicandi facultates, earumque actiones, simul ac in memoriam resque ibi retentas inquirat. Dein eo perspecto, quo pacto se habent, animadversiones suas, castigationes aut confirmationes singulis adhibet; & ex collatis istiusmodi sententijs nova quædam sancit, præteritis interdum penitus repudiatis, interdum emendatis, atque ad normam sibi propriam exactis revo-

revocatisque. Atque hinc, tanquam suprema ibi sita esset jurisdictio, non datur ad alium ultrà judicem provocandi licentia; at si recentia & nondum audita ad hunc judicem deferantur, eandem denuo causam cognoscere idem potest, suamque priùs latam sententiam convellere. Quod ut quibusvis accidit, sic nemini magis, quàm cui anni longum rerum usum permiserunt, ac cui diuturna æquæ mentis sanitas ostendit, quàm parum fidei rerum speciei præbere fas sit; & quantum commodi ex erroribus castigandis, omniâque mentis suæ uti & aliorum operibus ad amussim revocandis provenire solet; ex quibus omnia fermè judicia, quæ in secula durant, ortum ducunt.

Vix autem initium capit hæc facultas *Ex suspitione oritur ejus exerciti-*
 auctoritatem exercendi nisi datâ quâdam
 suspicandi causâ; unde dubitare licuit, ut-
 trum falsi aliquid subesset. Hinc nascitur
 quæstio, an rectè res habeat, vel error ob-
 repperit: Ac proinde si erratum fuerit,
 ulteriùs quæritur, utrùm in rebus perci-
 piendis, an post eas jam perceptas com-
 missus fuerit. Quoniam dum perscrutari
 videtur, singula retrospicienda sunt; ad

quod peragendum sæpe utitur non hisce
 folis, quæ de alijs decreverit, verùm etiam
 quæ ratiocinijs varijs in hunc usum colle-
 gerit, ad retegendum ubivis latitans fal-
 sum, illiúsque admittendi causas. Ex qui-
 bus omnibus simul adhibitis rem saltem
 totam recognoscit; ac tandem vel facul-
 tatibus, munijs ipsarum ritè peractis,
 utpote ad talia idoneis fidem habet,
 vel de hâc aut illâ adhuc ambigendum
 censet.

*Tardè ma-
 turescit.
 crescitque
 inquirendo
 in facul-
 tates sibi
 subjectas.*

Itaque hæc facultas non nisi tardè crescit,
 ac serò ad maturitatem pervenit; quippe
 quæ magis atque magis cauta esse ex diu-
 tino varióque rerum usu ediscit. Hinc
 enim quàm obnoxia ipsa sit errori fre-
 quenter notavit, &, qualiter singulæ sibi
 subditæ facultates habent, accuratè rescit-
 vit: Scilicet an hæc nimis celeriter, tar-
 diúsve quàm par est capiat; an facie te-
 nus ac desultoriè oculis mentis percurrat;
 an etiam, quando nil præter speciem ina-
 nia contineant, in ipsis aliquid amplius
 spectando operam perdat: Utrùm imagi-
 nes rerum pravè effingantur, adeò ut um-
 bra sæpe pro imagine ad vivum delineatâ
 obtrudatur; quî fit ut imperfectum aliquid
 pro

pro opere absoluto habeatur ; aut, quod alius cujuscvis simulacrum est, pro alio dissimili menti objiciatur : Num itidem imaginatio res, prout in naturâ existunt, exprimat, an pervolitando ex varijs peculiâres desumat colores, atque ex ijsdem monstra, quorum partes malè cohærent, compingat. Quomodo deinde ipsa decernendi facultas afficiatur ; spēsne vel metus magis votis & consilijs ejusdem dominari consuevit : An pectus attollatur fallaci prosperorum gaudio ; aut felicitis eventus desperationi cedat. Unde haud satis promtè vera, quæ adsunt, amplectitur ; veravè, quæ futura sunt, sibi promittere audet : Unde etiam iniquus sibi judex hæc facultas videtur, studio quovis, cui dedita est, corrupta.

Porrò de ratiocinijs quærit, an observatis à se malè quadrent ; atque si id fiat, an imaginandi pleraque sint opera, potiùs quàm ex rebus ipsis oblatis oriunda. Quippe pari modo alios forsan deceptos recognovit. Quo dein fit, ut per talia incerta aut dolosa securior hoc tempore incedat ? Num hoc ipsum fiduciæ suæ, ac temeritati debeatur ? An sibi plus nôsse concessum

*Etiam in
ratiocinia.*

fuerit, propter quasdam peculiare, quis fruitur, dotes, ad quas exerendas felices plurimum occasiones contulerint? Nempe cuncta ejusmodi assidue secum mente revolvit, qui fidelis sibi met omnino esse velit, quique quam curta vel larga sit sibi supellex, reputare constituit, atque hanc facultatem excolere, adaugere ac ad summum evehere optat. Enimvero tantum est hujusce facultatis momentum, ut quam maximè contra isthæc, quæ blanditijs inescare, aut dolis irretire queant, munienda sit, ut liber animus sincerè sententiam proferat imperturbatus, ac clarè res coram apertas intuens in ratiocinijs rectè pergat viâ.

*Assimila-
tur ætheri.*

Idcirco non ineptè hi, qui hominem mundo assimilârunt, hanc facultatem ætheri comparârunt; ubi extra crassum vaporibusque inspissatum aërem, regionem nebulæ nubium atque exhalationum, ventorumque simul ac meteororum imperium, cœli facies perenni effulgens luce, perpetuòque aperta & serena conspicitur.

Cujus

Cujus quidem facultatis nobilissima dos est prænoscere, qualia ex naturis rerum oritura sunt; eaque, antequam contigerint, prælagnire. Quod ipsum in Promethei fabulâ antiquissimi Græcorum sapientes docuere; qui Minervæ operâ in cœlum sublatus, igne domo æthereâ subducto luteum suum hominem animavit; ac proinde insidias formidans munus pyxidis, morbis malisque alijs repletæ, rejecit: Qualis dein Epimetheo tradita est, qui ingenio consilio ac prævisione carente præditus erat; quique fatali aperto vasculo in finium transformatus poenâ ipsius patefecit, quantum singularis animi prudentia ab æmulâ illâ vi ingenij abesse solet; quantum nimirum humana ab ejusdem initatrice bruti illius natura. Nil ergo miri, si sapientes hanc præcognoscendi facultatem colere aggressi fuerint; qui sanè mentem futurorum scientiâ, nec solùm præsentium præteritorumve ditare audebant. Atque uti in alijs disciplinis se plurimum posse nonnulli experti fuerunt, ita in ipsis quæ ad humanam spectarent naturam, assiduam adhibebant vigilantiam, ut medicina, quam adornabant, præsentendi virtute incla-

*Prævisio
huc spe-
tat.*

inclaresceret. Inter quos senex ille Cous eminebat, *quum* (ut (a) ait Celsus) *recentiores quoque medici, quamvis in curationibus mutarint, tamen hæc [instantis valetudinis signa] illum optimè præfagisse fateantur.*

*Et quæ
ratione.*

Interea quamobrem hujus præfagiendi facultatis incunabula intra retrospectiendi pomœria sita esse indicantur, atque ad ipsam pariter pertinere, ex Scythæ illius historiâ discere est, qui, quando vulgus secum solis radios, quum primum oboriretur, discernere ex more apud eos obtinente conaretur, ideóque orientem prospectarent, in opposita montium juga oculos suos flectebat; eorúmque altissima, priusquam circumstantes solare corpus videre possent, radios ipsius illustrantes respexit. Pari nempe ratione ea mentis nostræ fors videtur, ut sæpe numero præsentia commodiùs ac certiùs in speculo præteritorum videat; at futura semper non nisi inibi delineata intueatur. Quale certè speculum experienciâ poliri, atque in usus varios adaptari queat. Quod tamen ut ad amuf-

(a) In libri secundi præfatione.

sim respondeat, (quid enim in allegoriâ progredi vetat?) tumentia omnia in facie ipsius speculi prorsus exæquanda; & quæcunque vitrum in bullas inflant, aut aliquatenus ab æquabili planitie defleſcunt, ea profectò impediunt, quò minùs futurorum perinde atque instantium fida exemplaria prodantur. Quò quidem spectat monumentorum historiæ suavis utilitas; quorum laudes ore omnium celebrantur, quicunque in vitæ curriculo aut feliciter impetum illustriſ naturæ regere cupiunt, aut quidnam ex ſuis alieniſque rebus geſtis commodi vel incommodi futurum ſit, præſcire optant.

Nimirum ea præclaræ ac bene ſanæ mentis conditio eſt; ex quâ totius integritatem cognoscere atque æſtimare licet. Si-
 quidem quanto felicioriæquioriſque acumine animadvertendi opus peragitur, aut quanto longiùs à recto abeſt, tanto accuratori omnium facultatum ſanitate atque præſtantiâ mens beatur. Ubicunque enim hæc facultas munere ſuo fungitur, cæteræ inferiores, quantum in ſe ſitum eſt, oſtendunt: Hæc quippe non niſi earundem virtute inclareſcit; iſque deficientibus & ipſa

Ex ejuſdem ſanitate colligitur ſanitas totius mentis.

sa jacet. Hunc in modum gradus subtilitatis atque celeritatis percipiendi in animadversionibus notantur; sicuti & quàm fida falláxve sit memoria; quàm vividè delicatè & ad amussim opera sua effingit delineátque imaginatio, aut quàm insigniter deerrat; quantum judex valet; ac denique quàm perspicua vel incerta ac fallacia sunt ratiocinia.

*Hic fita est
conscientia.*

Ex hujusce autem facultatis exercitio oritur recti pravique conscientia; ac proinde si posterius sibi conscit, hoc ipsi dolet. Qui quidem dolor remedium petit, reversionemque ad integritatem; ideoque secundum naturæ ordinem dolor poenitentiae præcedit resipiscentiam. Exitus itaque pravi conscientiae consilij mutatio est: Unde hanc tanquam cynosuram homines merito respiciunt. Quapropter hæc facultas, quatenus ad facienda spectat, eademque dirigere apta nata est, nomine Intellectus Prædici appellata est. Idipsum interim à Græcis denotatur duobus istis nominibus, quorum unum dolorem (a) poenitentiae ex pravi conscientia, alterum verò mentis (b)

(a) Μεταμέλεια.

(b) Μεάνοια.

consiliique mutationem insequentem exprimit.

Hinc igitur medicus indicia colligit fida, *Indicat bonum.* mentem malè sanam ad integritatem reversuram, dum hujus facultatis vim atque auctoritatem renascentem videt. Ex quo frequenter affluxus lacrymarum saltem paroxysmi, si non ipsius morbi, solutionem promittit, ac sanioris futuræ mentis sæpe prænuntius est. Rescire quippe incipit mens, se à celsâ istâ & imperturbatâ regione in inferiorem merfam fuisse, non verò talem, qualis dignitati suæ conveniat.

Ut à suspitione hæc facultas primò ad *Morbi.* munus obeundum excitatur; sic etiam pro genere vel gradu ejusdem fortius aut segnius irritatur. Duplex autem suspitionis genus est, pro vario fonte, ex quo effluit, nempe admiratione, vel metu; utrumque itidem gradu diversum est, prout sibi objectum melius vel pejus prævidetur. Propterea quum suspicio non omnino expergefaciat, nulla dein animadversio; verum omnia judicij verisne aut rectis; an falsis aut pravis reguntur. Hinc erroribus judicis
mi-

minimè castigatis, malus ejusmodi habitus hanc facultatem adoriri solet; quo ex desuetudine profecto alia quævis laborare consuevit : Qui dein habitus nullo juvante obfirmatur. Ex alterâ verò parte suspicandi quardam licentia obsidet; unde suspicaces eousque homines evadant, ut inter symptomata insaniam ad hanc facultatem pertinentem præcurrentia jure ipsamet recensentur. Inter utrumque autem affectum interjacet legitima illa suspicandi libertas, quæ menti bene sanæ competit, quæ exinde judicis peccata frequenter sibi conscit, eadèmq; ad veri rectique normam componere ac emendare legibus studet. En sanitatis pomœria ! En loca extra hanc posita latè patentia, qualia præfinire non est, per quæ morbi spatiantur ! Quòdusque igitur illa extenduntur, antequam ad morborum fines perventum fuerit ? Ut hoc quæsito satisfiat, tales medico notas servare æquum est ; ut, si quis de conditione suâ aliena omnia comminiscitur, hominum verò communia negligit despicitque ; & si hæc commenta mores illius regunt, qui dehinc forte suâ minimè contentus vivit, at supra se longè sita intuetur experitque ; is sanè appetitus in mor-

morbidum ut plurimum rectè habitum ducit, ac tandem in insaniam, nisi franis hujusce facultatis aliquando coërceatur, desinit. Quò pertinet Æsopi fabula verbis Phædrianis tradita ;

*In prato quodam Rana conspexit bovem,
Et tacta invidiâ tantæ magnitudinis
Rugosam instavit pellem : tum natos suos
Interrogavit, an bove esset latior ?
Illi negârunt. Rursus intendit cutem
Majore nisu, & simili quasiivit modo
Quis major esset ? Illi dixerunt, Bovem.
Novissimè indignata, dum vult validiùs
Inflare sese, rupto jacuit corpore.*

Hic quippe autor exemplo ranæ, quæ ubique personam vulgarem inopémve sustinet, hoc vitij ejusque non insolitum fontem, invidiam scilicet longè potentioris, aperit. Judices sunt nati, qui, quod viderunt, matri nudè adulationis nescij retulerunt. Ubi tres indicantur termini, vel illi, quos natura non coacta præstituit, aut quando vis, quam ferre eadem potest, inferatur, vel hi
ultra

ultra quos ipsamet ferendo impar est. Nempe intra naturæ non coactæ fines viventi nil insanix metuendum ; dum nullæ excursions in fines, citra quos natura substitit, periculo vacant. Quapropter nec sine suspitione gravibus de causis obortâ feliciter studio vitæ decurritur ; neque nimis huic genio indulgendum, quoties nulla detur suspicandi causa. Quoniam interim causæ suspicandi difficulter internoscentur, gravesne an leves sint, ex earum proinde notitiâ discrimina inter homines abunde ortum ducunt. Nempe aliæ sapientibus, aliæ vulgo graves causæ sunt ; unde profectò illi hoc secernuntur : Illi quidem in sua intus peccata animadvertunt, & assiduè judicia corrigunt, atque altiora certiorave in dies pro pulcrioribus naturæ suæ dotibus expetunt ; hoc verò religatum ad consuetos patriæ mores inibi, velut arbores solo suo, defixum hæret. Nec aliter pauci saniores à turbâ, quæ sanitate aliquatenus donatur, secerni solent, quàm eo quòd nulla huic animadversio extra morem contingat, dum ipsis de judicijs suis vel alienis plerumque disceptatur, ac mos tanquam errorum vel parens patronusve habetur. Aliæ profectò, quod ad momentum

tum attinet, sunt, æternúmque erunt eruditæ causæ, aliæ vulgo; ac propterea, quos hoc ipsum admiratur maximèque facit, iidem ab illis minimè eâ de re sãniores habebuntur. Ac proinde medici est utrumque dijudicare, ne dum è populo quosdam sapientiores à vulgi moribus abhorrentes videt, eosdem malè sanis annumeret; aut dum sapientibus consulit, eos dementes habeat, qui populi moribus judicia sua minimè omnium regunt.

Sicut hæc facultas pro inferiorum integritate particeps & ipsa sanitatis est, quæcunque easdem juvant, ipsimet pariter profunt; modò isthoc perpetuò intelligatur, ut ordo naturæ inter eas accuratè fervetur; ex quo harmonia earundem istâ ratione consistit, ut dum singulæ sanæ sunt, universæ animadversionibus hujusce facultatis subjiciantur. Remedia verò fortissima desumuntur à duris adversisque rebus, magis quàm prosperis; atque à parientibus dolorem potiùs quàm voluptatem: Quippe quæ notas inurunt haud facilè obscurandas aut oblivione delendas; atque men-

R

tem

tem, quæ earum reditum præsentit, suspicionem invigilantem tuentur. Ut verbo dicam; Quæcunque faciunt, ut mens corpori imperet, atque ut hoc alacriter eidem obsequium præstet, huic facultati malè habenti remedia tanquam præsentissima comparantur.





C A P. XVI.

De mentis comprehensione ac captu.

PRO organorum mentis vigore *Diversitas*
 vel infirmitate, ac pro eorun- *compre-*
 dem tono à naturâ cuique sorte *hensionis.*
 dato, comprehensio ejusdem vel
 ampliatur, vel coangustatur. Idipsum ve-
 rò est, quod captus nominari solet : Qui
 igitur in alio amplior, in alio contractior
 virtute ipsius fabricæ videtur, citra ratio-
 nes vim mentis promovendi, ejusdemque
 facultates excolendi. Ac præterea fabrica
 illa ex cujusque temperamento aut acuta
 aut hebes reddi potest : Unde compre-
 hensio ceu celerior & agilior, sive tardior
 ac remissior evadit. Dein accedunt institu-
 tio, doctrina, rerumque usus ; ex quibus,
 si ritè adhibeantur, ad extremas, quas na-
 tura fert, comprehensionis metas undi-
 quaque perveniatur.

*Clarius in
pueris.*

Proinde hisce constituitur discrimen illud inter singulos, quod cuique advertenti sermones factaque illorum abunde patet; at clarius per annos pueriles manifestatur, antequam vela sibi injicere solertia monuerit, & dum naturæ opera jaceant aperta, remque ætas incauta ac nondum callida palam faciat. Quippe tunc temporis puer alius alium captu superare tam evidenter quam robore corporeo observatur: Adeo ut quales pueri, tales quoad comprehensionem viri cernantur; præterquam quod hæc ipsa crescat, ac maturitate magis pro suo cuiusque modulo vigeat; haud secus ac staturæ corporisque exteriori figuræ contingit. Enimvero prout diversa admodum ea est, si species magnitudinem, verum quoad naturam simillima perpetuò manet, quantumvis à pueritiâ tenuis & coarctatus primis initijs externorum ordo lineamentorum ad virilem ætatem dilatetur, imò & deinde æqualis postea ad se invicem eorundem habitus & textura in senectutem usque servari soleat; ad eundem etiam modum organa mentis interiora se habere vix dubitandi locus datur. Ac sicut hominis cuiusvis statura raro ultra notos evehitur terminos;

minos ; mens etiam communes rarò metas excedere observatur. Et propterea captus hominum vulgaris mediæ ad instar staturæ assurgit ; & sunt, qui infra supràque hanc altitudinem vel deprimuntur vel elewantur.

Interim comprehensio eorum, qui ad summum evehuntur inter homines fastigium, non eò usque pertingit, nisi omnium assiduâ facultatum mentis exercitatione, ac non nisi educatione accuratâ primùm fruatur, posteaque laboribus perpetuis firmetur atque adaugeatur, & optimorum frequenter ingeniorum luctâ versetur, iisque quasi cotibus peracuta reddatur. Enimvero plures primam docti itineris viam rectè ineunt ; at infortunijs si non opprimuntur, tamen divexantur, atque eorum vires in certaminibus sæpe cum rudibus atque pervicacibus æmulorum ingenijs dissipant, perduntque subinde grandes melioris naturæ dotes ; uti & patria ipsorum luminaria amittit, longè latèque radios ejaculantia. Quinetiam si Herculeæ eòusque suppetant dotes, ut superstites fiant post hæc cum robustâ atque imperitâ aut hebetè sibi que longum infestâ juventute luctas ; rei mox angustæ

Qui excelsitur.

R 3

domi

domi repagula obsistunt, & repetiti fortunæ adversæ ictus dejiciunt, aut blanditiæ hujus nimium secundæ frangunt corrumpuntve, cursumque eruditum inhibent. Verum si ex hisce mentis vegeta ac fortis comprehensio elucetetur, dein eorum repugnantia, quorum falsa aut saltem dubia pro certis haberi intersit, sæpe progressui adversatur. Quippe ita res habet, ut, licet plures fateantur se verum sincerè amplecti velle, factis tamen iisdem frequenter negent. Inde potentum sæpe numero obstitit auctoritas, qui aliena pro veris jamjam amplexi immutare opiniones suas nonauerunt; at quasi falsum cum hæreditate conjungeretur, ita se ad simplices veri scrutatores habuerunt, tanquam hi novitatem introducere auderent, quandocunque, quæ sibi constitere, indicarent.

*Cultura
difficultas.*

Itaque non nisi paucissimi comprehensionem suam, quatenus extendi queat, norunt; quoniam tentamina subinde frustrà fiunt, ac conatus irriti ideo, quia non licet esse tam acutis aut perspicacibus, nec, quantum mens sua capiat, prodere omnino tutum est; nisi ejusmodi temporibus, quorum rara felicitas fuit propter principum indolem

indolem verè generosam, qualia Tacitus sua esse sub Trajani auspicijs docet. Hæ interim facultates, quæ res modo tam amplo comprehendunt, plurimorum caput edusque solent excedere, ut vix ullos nedum rectos iudices nactæ vulgarium hominum invidiæ obnoxia relinquuntur, qui dolum opponunt ijs omnibus, quicunque à partibus suis stare non videntur. Ex quibus omnibus non rarò evenit, ut comprehensio, quantumvis fines eximiè prolati fuerint, nisi solertiâ æquè insigni semet tueatur, tanquam inutilis habeatur despectui, ac sæpe tanquam non innoxia damnetur; unde qui eâdem dotatur, hanc celare eâ de re cogatur.

Hisce autem præmissis veluti causis, quare comprehensionem hominum variam dignoscere in singulis vix licet, & quâ ratione isthæc ad instar agri toti communis plebi minimè cultum exquisitum admittit; progrediendum ad ipsa fundamenta, quibus innititur, ut exinde eruatur, qualis reipsâ experimentis adinveniatur. Complectitur sanè hæc facultas cæteras omnes mentis facultates earumque dotes, videturque illarum veluti situs, & quousque se porrigunt,

*Qualis sit
compre-
hensio.*

gunt, terminos statuere. Prout igitur omnis notitia, præter eam quæ ad ipsas mentis facultates spectat, de rebus singulis eisdem objectis provenire consuevit, comprehensionem humanam vix ultra hosce limites extendi credibile est. Neque sanè ex libris operibúve eorum, qui clarè rem exposuerunt, neque ex dictis faciúve omnimodis aliquid ultrà videre, nisi adulationem pro veritate admittamus, contingit. Fuère profectò celeberrimi præteritorum seculorum viri, uti & nostri, qui plura prodiderunt cognitionis non vulgaris exempla, ratiociniúque scripta sua præclaris ditârunt. Sed si hosce taceamus, qui intelligi noluerunt, quibus igitur fides mininè exigenda est, vix quidquam protulère, quod intra cancellos non continetur, quales facultatum prædictarum operibus atque exercitijs præstituuntur.

*Funda-
mentum
certitudi-
nis.*

Verùm quoniam Pyrrhonij alijs philosophis fidem detraxerunt, inque omnes eorum opiniones atque fundamenta inspexerunt, hoc operis ab illis confectum est; atque ex ipsis discere est, quare eorum sententias repudiare studuerunt. Illud siquidem ex Sexto Empirico patet, qui sectæ istius

istius placita tradidit. Atque iisdem, quæ ipse objicit, perspectis, id demum manet veri falsive indicium; nempe quod sani, qui res attentè sincero consilio advertunt atque clarè comprehendunt, illud verum aut falsum meritò haberi posse. Quòd si res ejusmodi non tantam compleant summam, quantam aliqui volunt, isthuc forsan causis assignatis imputandum, non menti quasi ad comprehendendum ineptæ, aut pluribus impari, quorum cognitio ulterius scientiæ causa esse potest. Nusquam enim, ultra quod hæ causæ in se complectuntur, adhibita fides fallere solet. Neque certè cum ratione sanis obijciendus est mentis non bene sanæ conceptus; neque opponenda huic qui aliquid clarè comprehendat, usitata ejusmodi, proclivitas scilicet in errorem & vulgi opinio eruditis contradicens; nec multò pluris apud hunc valet vel audax veri cujusvis negatio, vel contrarij asseveratio, talem nimirum rem nemini hominum posse cognosci, quia modum ipse nescit. Hoc enim viæ ignaris accidere solet, qui tamen ob oculos posita satis perspiciunt; & contradicendi studijs respondere nil opus est. Id autem constat, neminem clarè rem unquam comprehendisse,

disse, nisi causas cognoscendi perpetuò committes secum affert; neque si easdem in viâ deseruerit; nec si, plusquam ipsæ effecerunt, sine indicibus alijs asseruerit.

Comprehensio intra certos limites restricta.

Cæterùm quum de comprehensione disscratur, non ea intelligenda est, quæ omnes rei rationes habitúsve ad alias complectitur, imò neque ipsius naturam integram, quâ à cunctis reverâ alijs distinguitur; sed sæpe quatenus nostrâ refert. Quemadmodum aurum ab argento internoscimus, nec tamen omnibus, quæ de iisdem metallis quæri possunt, respondere possumus. Abunde sufficit quòd tot ac tanta de ijs clarè liquent, etiamsi plura exquirenda restent. Quod sanè animadvertere ex usu videbatur, quoniam fuere, qui si non omnia scire valent, ideo prorsus nil certi videre volunt. Utrumque videlicet ratione caret, aut omne aut nihil mentem posse comprehendere. Sed & de sanitate cujusvis quærendum, qui clarè aliquid comprehendit, quod, quo pacto in mentem venit, haud ipse novit, neque alijs per ulla indicia manifestare potest.

Hic

Hic autem loci advertere liceat, errores: *Compre-*
in unam facultatem adeò ab aliâ prolabi, *benſio er-*
ut attentionem mereatur illius, qui verum *rorum.*
à falſo internoscere velit, qualis ad hanc
vel illam pertinet. Sicut qui ex rebus
ſingulis totum earundem genus agnoſcit,
quod ab ijs mens abſtraxit. At genus iſt-
huc ſæpe opus imaginandi facultatis eſt;
quæ pro tali tradit judici, eò quòd res
hiſce ſimiles in memoriâ recondantur, ideò-
que ſub eodem genere ipſa complecti va-
leat. Siquidem ab exemplaribus ejuſmodi
ſingulorum quaſi in unum collectis & cog-
natis oritur generum notitia, quæ unâ
comprehendere in poſterum mens affueſcit;
ac deinde in univerſum de iſſdem diſſerit;
ſicut unum aliquid in partes ſeparatum
videt, atque exinde rationes earundem
ſingularum ad illud totum notat. Enim-
vero harum unam & alteram ſejungit, &
reſiduum diſcernit; atque iterum quot
velit, conjungit; unde ſummam earum
ſupputare eſt.

Quoniam igitur in hiſce ſimplicibus, *Modus*
quale eſt numerus, designandis mens ver- *compre-*
ſari facillimè ſolet; ideò hujus virtute plu- *hendendi.*

ra alia ad eandem comprehendere formam aggreditur, qualia scilicet sunt puncta, lineæ, ac superficies, quæ in unum conflata (quod solidum nominatur) vel à se invicem separata secum pro re natâ perpendit. Hisce subjicit motum atque ejusdem rationes, adinvenitque quâ temporum momenta secundum motum annumeret. His dein adjicit sonorum per tonos distributorum numerationem, ac temporis ad eos spectantis, rationesque eorum conferendi ac variè concinnandi modos comprehendit, qui auribus eruditis placeant. Simili modo innumera etiam alia percurrit: Nam dum hisce inspicendis oblectatur, res ipsas vario modo connexas intuetur, ac diversis sæpe modis sibi invicem oppositas; quasdam eòusque ut alia tollant, vel aliquatenus repugnent, adeò ut simul adesse nequeant; aliquas porrò, tametsi non eatenus repugnantes, quin ex iisdem commistis tertium quoddam emicet. Hinc advertit principium seu fontem decernendi esse singula distribuere eâ ratione, quâ maximè adversâ fronte pugnent; videlicet ut numero quovis ab alio subtracto, residuus tantâ summâ non compareat. Sic tribus à quatuor subductis partibus, residua eadem

ac prius esse nequit. Inde primum illud fundamentum judicijs subternitur futuris; ad quam quasi normam cætera judicis decreta exigi possunt. Maneat igitur fixum, nihil posse idem simul esse & priorem numerum & posteriorem. Quippe hi duo contradicunt sibi invicem, scilicet unam partem residuam esse æqualem summam ei, quæ conficitur ex ipsâ ac cæteris tribus adjectis. At si cæteris tribus una reddatur, iterum quæ fuit antè apparet summa. Hinc numeros in genera partitur mens; prout variè addendo vel subducendo indicantur.

Nimirum gradatim mens puerilis hæc *A principijs quâ ratione cavendum.* comprehendit, quæ prout ad vigorem maturefcit, usu longo, tanquam naturæ ipsius judicia essent, adeò confirmantur, ut planè nesciat horum cognitionem esse habitum acquisitum, sed ex naturâ suâ proveniente agnoscat. Et, si non ultra illa simplicia progrediatur, non magnâ refert, utrùm hæc cognoscendi normæ insitæ credantur, vel ex naturâ sponte ortæ: Sed quando ad alia porro transducantur, & rerum naturis implicentur, ac homines à vero rerum sensu in errores seducti fuerint; dein sanè consideranda

sideranda horum in genere pronunciatorum origo; ne mentis naturæ istud falsi impu-
tetur, quod ab amplexu eorundem incon-
siderato solum deducitur: Cùm nempe
hæc appellantur fundamenta cognoscendi
res ipsas extra mentem, de quibus non
certò constat easdem ita se habere, ut ad
has normas exigi possint. Imò id verum
exquirenti ante omnia statuendum, ne ali-
quid normæ vim apud se obtinere per-
mittat, cujus aptitudinem non penitus exa-
minavit. Legem aliter iniquam sibi ferre
foris potest; cujus auctoritate liber ani-
mus quasi æterno servitio defigatur; ac
catenis ipse vinctum semet non videat,
quas cæteri acutum cernentes omnino per-
spiciunt.

*Consensus
faculta-
tum ve-
rum com-
probat.*

Quærendum igitur quæ sit basis, in quâ
verum collocari tutò potest: Ea nempe
videtur facultatum sanæ mentis conveni-
entia; quo pacto sit, ut res ipsæ, prout se
habent, intelligantur. Siquidem conspi-
ratio quædam atque consensus earundem
adesse debet, quicum rerum singularum
naturæ congruant. Neque sanè cuivis soli
fides habenda est; unde accidit ut philo-
sophi veteres inter se dissentirent. Nimi-
rum

rum solis sensibus externis Epicurus fidem habendam esse docuit; unde plura sequi absone abunde & clarè demonstratum fuit. Atqui sine his verum nequit consistere: Ideo verò sensus minimè rejiciendi; ast ab alijs facultatibus causæ eorundem dissensus exquirendæ; ac si veræ appareant, non est cur aliquid dubij exinde oriatur. Sicuti quum res pro longo spatij intervallo minores quàm proximè adjacentes conspiciantur: Cujus rei causa satis nota est. Itaque hoc modo res percipi debent pro variâ earum distantia. Harum igitur imaginatrix depingit figuras majores, ut oculis distantibus minores, prout scilicet par est, videntur: Quibus memoria consentit, quæ earum reverâ majorum meminit, quando propè adessent, & pro distantia minores repræsentari. Hanc rem cognitam ita habere judex decernit; quam quidem rationandi facultas ex causis deduxit. Quibus demum animadversis & comprehensis fidem mens adhibet.

Sicuti autem sensibus externis, ita etiam imaginationi accidit, ut neque eidem circa propria sibi objecta credendum sit; nisi dum huic cum reliquis convenit. Fingitne igitur

*Consensus
etiam in
ijs circa
quæ ima-
ginatio
versatur.*

igitur isthæc imagines? Hæ dein probandæ, imò & nonnunquam castigandæ, si inter sanæ mentis opera numerare oporteat. Quæ quidem nisi judici subjiciantur, atque animadversioni recognitionique, vana velut ægri frequenter somnia sunt: Ast cæteris consentientibus, operamque unâ adhibentibus, ecce suaviter similes depinguntur, judicibus ocellis, attestante itidem memoriâ harum exemplaria tenente; & quales etiam superioribus mentis facultatibus arident. En verò formæ pulchritudinisque natalitia! Cujus sanè vim quum Socrates perspexisset, nunquam à bono abesse voluit; & vocabulum illud celeberrimum ex pulchritudine (a) conflatum cum honesto conjunctâ laudavit. Est profectò imaginationis vim formæ & sentire & probare; sed si nullis astricta fuerit legibus, sanitas non diu constabit, neque ab ejusdem judicio alij pendebunt. Hoc enim est delirare, sensûsque officium violare, qui imaginationi tributus est; quò nimirum felicius suo quisque ingenio fruens, voluptate pariter suâ trahatur. Quin nec faustum esset

(a) *Καλοναγυθία.*

formæ

formæ ejusdem vim eòusque omnes sentire, ut unam æquè depereant. Unde à naturâ omine non infausto varias depingit formas imaginatio, lufûsque ejus diversimodi profunt oblectântque. Interea quamvis operum pulcrorum diversitas conspiciatur, quantâ bene sanæ imaginationi liberè feriarî licet, in illis tamen dirigendis ratio numeris modulîsque suis utitur; sin minùs neque ipsa sibi constabit, nec alijs placere poterit. Adeò ut etiamsi ad rerum solummodo simulacra imaginatio spectet, rectitudinem tamen certam veluti normam operum suorum intueri, verûmque tanquam ultimum sibi scopum proponere oportet. Idipsum autem superiorum facultatum consensum quodammodo indicat.

Judicia igitur fide digna sunt compluriâ, *Qualia sunt præjudicia.* quæ ex rerum notitiâ decerpta sunt; quatenus alia alijs tribuuntur, vel à se invicem fecernuntur. Qualia cùm certa esse constiterit, in usum reponuntur tanquam normæ, ad quas alia non imparia in posterum exigi possunt. Hisce interim sententijs ab alijs prolatis si quis, eorum causis minimè cognitis, assensum præbet, næ ille iisdem credit, qui hæc ediderunt, nec sibi per-
S
spectas

spēctas res eatenus novit. Hinc quoniam sæpenumero falsa tradita fuerunt, quibus tamen veluti fundamentis alij inania decepti extruxerunt, hæc ipsa præjudicia vocitantur. Quippe hæc, ab alijs non nobis ipsis cognita, pro normis veri & falsi traduntur; quales quidem philosophandi libertatem intra injustè præscriptos fines cohibent; adeò ut si pravè conceptæ fuerint, mentis errores necessariò sequantur.

*Præjudi-
ciorum vis.*

Hiscæ quidem præjudicijs si cui mens diu idque à teneris annis laboravit, eidem profectò generosam oportet esse indolem, qui tandem examen de ipsis justum instituire, ac libertatem cogitandi eò usque sibi asserere poterit. Tam cæcus quippe istorum amor esse solet, ut licèt solùm adoptata fuerit hæc soboles, non minùs tamen quàm germana sæpe placeat; imò nonnunquam menti affixa adeò hæreat, ut difficiliùs ab hac, quàm ab aliâ quâpiam illusione retrahatur. Unde sanè liquet, indicem esse largæ comprehensionis, uti & sanioris facultatum omnium habitudinis, ex præjudicijs emergere; atque idipsum longè nobiliores requirit dotes, quàm verum quantumvis

tumvis obscurum & occlusum in lucem edere potuisse.

Nec proinde contemnenda sunt ejusmodi axiomata, si causæ eadem cognoscendi apertæ fuerint; verum hæc omnino tenere æquum est, non modò propterea quòd aliquid falsi subesse possit, verum itidem, ut, quòdusque & ad qualia rerum genera pertineant, comprehendatur. Etènim si quis pro normâ axioma aliquod amplecti velit, eandem certè adhibere nesciet, nisi, cujusmodi sint quæ sub eâ cadant, probe nôrit. Et quidem nonnullos videre est, qui axiomata ad res cognoscendas extenderunt, quæ non sunt ejusdem generis, atque ipsæ de quibus dicuntur. Neque enim species, quæ menti adsunt, quas imaginandi vis crebrò fingit, quâsque dein judex amplectitur, perpetuò res ipsas, quales sunt, expriment: Ubi, si non erratur, saltem fides temere non adhibenda est. Exemplo sit spatij corpore carentis species, de quo à philosophis quibusdam recentioribus tales habitos fuisse sermones accepimus. Arbitror equidem, inquit alter, spatium non longè à corporis naturâ abesse, quoniam corporis mathematici præfinitioni idipsum

Axiomatum usus

quadrat; nempe trina eidem dimensio tributa est. Quin tu ad nihilum à numine redacta corpora concipias, quæ inter hujusce aulæ parietes nullatenus amovendos interjacent; tum verò, quid tibi videtur? Nónne hi duo tantùm distarent? Minimè quidem, respondit prior, quoniam ea tangunt, inter quæ nihil interest. Novi sanè, subjicit posterior, spatium non esse nihil, quoniam modi ejusdem sunt, scilicet longum latúmque & profundum existit. Nimirum fluctuant hi sermones; eò quòd hic pendet ab uno, ille ab altero axiome. Uterque spatium existere extra mentem novit; quorum alter vix à corpore separat, alter rem esse naturalem fatetur. Trina sanè dimensio rebus omnibus, quæ visibus innotescunt, competit; unde imaginatio effinxit forsàn speciem eam cujusdam rei, nomine spatij, in naturâ extra ipsas res existentem. Dein id ita habere axiome confirmant; Nihilo quippe nulla sunt attributa. Quod nec alienum à ratione est, quatenus ea quæ à mente finguntur, aut à rebus seorsim concipiuntur, existere intelligantur. Quo quidem modo existunt punctum mathematicum, lineæque superficies & ipsum corpus. Adeò ut corpus

pus mathematicum sit illud ipsum spatium, de quo disceptatum est, quod dicitur comprehendere longitudinem in se ac latitudinem; quatenus ipsæ ad mensurationem spectant. Itaque è quorum medio totum hoc spatij, quod interfuerat, tollitur, ea jam contigua futura sunt. Nec profectò Reales nominati apud Scholasticos multum diversa de Unione differuerunt; quam rem esse quandam voluerunt, juxta quam duo in unum coaluerunt; sicuti spatium denotat interstitium, secundum quod corpora distant. Qualibus quidem commentis rectè intelligendis is considerandi modus convenit, qui speciei atque axiomati hujusmodi fidem eatenus solum adhibet, quatenus ad rerum naturas concipiendas referri possint; non tamen ex specie simili conceptâ aliquid præter res ipsas, quibus inhæret, extra mentem existere separatum nōrit; uti nec genera rerum extra res singulas; neque eadem omnia, quæ ex fabricâ organorum mentis, eorundemque varijs sentiendi modis deduci consuērunt.

Hic tamen observandum, quòd imaginandi facultas ad claram veri notitiam plurimum conducat; quoniam isthæc ad
vivum

*Ufus imaginationis
ad comprehendendum.*

vivum depingens, nec à re ipsa abhorrentem exhibens speciem, quæ consentanea cæteris facultatibus apparet, opem ad fortiter cogitandum subministrat. Itaque, ut priori exemplo utar, quum corpora locum teneant quendam necesse sit, atque vacua etiam corporibus dari spatia verisimile; hæc spatia adeò interjacentia concipiuntur, ut tamen corpora contigua sint, ac ut filum seu concatenatio corporum nullibi in totum interrumpatur, tametsi vacuum ubique interspersum fuerit; tum sane ex corporum juxta sitorum dimensis facile illa spatia animo metiri licet. Imò & illa prior species, quum concipiatur, facile intelligenda est veluti ratio, quæ corpori mihi correspondebat, antequam in nihilum esse redactum mens sibi effingebat; quam quidem rationem adhuc memoria tenet. Et si universum hoc mundi contemplari fas sit, ad imaginem tabulæ orbis terrarum considerare haud absolum videtur; in qua lacus mariaque pro variorum spatiorum interstitijs designantur; & quo situ oceanus speculatori in extremo, quem alluit, scopulo vastus prospicitur, eodém sanè illud spatiorum extra mundum, si qua sunt, immen-

immensum atque interminatum æquor
concipi potest.

Memoria interim si ibi deposita non teneat, aut non exactè singula custodiat, conatus omnes circa vera cognoscenda irritos reddere poterit. Ac dein nisi eadem simul complectendi superfit facultas, vera sæpe dignosci nequeunt, quæ ille, qui amplitudine ipsius beatur, captu facillima experietur. *Ac memoria.*

Proinde morbi, quibus mens in universum laborat, captum peculiariter afficiunt; quando scilicet vigor ipsius eò usque flaccescit, ut quæ prius facilia conceptu atque intellectu expertus fuerat, jam seu difficilia sive minimè omnium comprehendenda sentiat. Nimirum mens ex hisce affectibus se habet, ut ex Tabe corpus; & omnibus ferè facultatibus aliquantum sensim decedit, dum forma totius quantumvis imminuta, & quidem quasi umbra, per omnia tamen similis diu permanere solet; illiusque reliquæ, qualis isthac olim fuit, usque condocerant. *Affectus.*

Remedia. Propterea si cogitandi defuetudine ægrum infirmitas invaserit, ad exercitia mentis idonea confugiendum; ac hisce æmulatio conjungenda. Quæcunque enim animum irritant, fortémque organis tonum conciliant, remedia sunt, quæ juvare confuêrunt. Interea verò morbi tales à corpore nimis saginato nonnunquam pendent; utpote originem suam ex vi mentis suppressâ dotibus corporeis fatentes; quibus interdum accedunt grave solum, necnon diæta, quæ sanguinem humoribus viscidis ferè restagnantem onerat. Contraria dein auxilia evadunt; idque jugiter cavendum, ne divinæ hæc auræ particula, quo nomine Horatius mentem dignatur, vitio quovis corporis humo affigatur.





C A P. XVII.

De Sagacitate.



UÆ jam restant à nobis præci- *Dotes ad*
 puè tractandæ mentis dotes, ut- *medicinam*
 pote quæ ad Medicinam ap- *spoliantes.*
 primè utiles repertæ fuerunt, &
 sine quibus ars nec satis intelligi, neque
 in usus, qui eandem facientibus opus sunt,
 duci potest. Hæ quidem Sagacitas atque
 Solertia nominari solent. Quare de pri-
 ore hîc loci, deinde de posteriore agen-
 dum.

Utraque autem dos oritur ex facultati- *Quæ con-*
 bus, quarum mentio facta est, & peculia- *lescent in*
 ribus sibi frequenter Gratijs ornatur. Ex *medicina*
 utrâque verò à naturâ priùs consociatâ in- *indolem*
 doles ea constat, quæ ad medicinam ex- *accommo-*
 colendam

colendam adaptatur. Quòd si huic accedit educatio, quæ eidem conveniat, & quæ non in exiguum angustumque concludat, sed pandat atque in ~~extremum~~ ^{amplius} ampliet, jam tum Æsculapius alter vel Hippocrates exurgit, vel quivis alius inter egregios eorum successores, qui tam celebri nomine inclarescit. Cujus sanè sagacitas morbos ad usque causas investigat, dum solertia dictat, regitque eos tam felici imperio, ut arma medica manus Deorum rectè applicentur; qualia per inscitiam ~~perperam~~ ^{adhibita} adhibita malorum saepe scaturigines sunt, atque urbes gentesque populantur. ~~Quod~~ ^{Quod} quidem à veteribus duplici nomine ~~Phœbi~~ ^{Phœbi} atque Apollinis proditum est; ubi prius luminaris splendorem, scientiamque; posterius verò ardorem radiorum vastatricem denotat. Nempe hæc duo in autore medicinæ indivisa reperiuntur; verum ardor lucis expers seorsum sumtus pestiferum denunciat; sicut eidem conjunctus beneficium declarat. Idque ipsum plenius indicatur, quando Musas ejusdem Dei filias nominent, matrémque earum Mnemosynen; quò clariùs cognatam esse peculiarem Medicinæ atque alijs disciplinis indolem ostenderent.

derent. Et hæc quidem ab illâ ad eò ex
sententiâ veterum indivisa est, ut, siquem
sapientiâ præclarum produant, ipsius itidem
peritiâ rei medicæ minime taceant.
Quod sanè & in ipso Socrate designant,
quamvis primus à naturâ ad morum studia
discipulos suos abduceret; utpote qui mo-
rita & consilia de sanitate corporis & men-
tis tuendâ frequenter apud Xenophontem
laudat. Profectò nec sine disciplinarum
fructibus medicus satis dotatus ad præstan-
tiora in arte suâ dignoscenda se accingere,
neq; famam auctoritatè sibi aut con-
ciliare aut tueri potest. Imperiti verò &
ignavi est, quicquid ad naturam spectat
negligere. Imò & mores studiaque homi-
num omnimoda ad medicinam ditandam
conducunt; professionemque hanc longè
ampliorem atque utiliore reddunt.

Si judicandi & ratiocinandi facultates ad
sumum evehantur, felicesque evadunt,
ad eò ut verum indagare, quod plures fu-
git, liceat; sagacitatis nomine dōs isthæc
appellatur. Hæc quippe vox dicitur pro-
priè referri ad acutam illam, quæ in ca-
nibus notatur, sentiendi vim atque odo-
ratu

*Qualis
dōs saga-
citas.*

ratuprehendendi; quibus (a) *incredibilis ad investigandum sagacitas narium*: Quasi scilicet illa indagandi apud nonnullos facultas nomen à venatione mutuò acciperet. Et quidem vox sic intellecta opus ipsum in imagine comprehendit; quoniam in hunc planè modum mens sagax per

(a) Cicer. Tuscul. 3. Qui etiam rationem docet primo de Divin. *Sagire enim sentire acutè est; ex quò saga anus, quia multa scire volum, & sagaces dicti canes.* Deducunt alij à *scyth*, quod verriculum sonat, & retis quoddam genus est; cui conjecturæ favet parallelà illa analogia, juxta quam indago nominatur series plagarum ad venationem spectantium, quâ feræ clauduntur, & veri indagatio sagacis est. Nec sanè omittenda est alia illa notatio, quæ à Sagis deducit, Scythiæ Asiaticæ incolis pro domibus nemora & speluncas habentibus; quales igitur rei venaticæ se dedere. Ubi advertendum hoc nomen Scythiis omnibus Persas tribuere, idque forsàn per opprobrium ipsis non inusitatum: Persicum quippe canis nomen *sag* fuisse traditur. Hujus autem regionis incolæ hodierni sunt Tartari, ad quos tanquam occupantes victoriæ securos atque incautos historiola vulgatissima de Tartaro capi-endo spectat, quod jamjam in diverbium abiit.

plures

plures rerum classes ordinésque & rationum prolixas variásque series verum frequenter indagat; imò nec subtilissimos earum nexus negligit, quibus altiùs ad suprema genera perveniat; atque ita integram varijs orbibus nodísque & commissuris interstinctam catenam demum perspectam habeat. Eóque magis consummata est hæc facultas, quo celerius facilitusque è longinquo sitas res pervestiget; & quæ longissimè inter se dissidere visæ sunt, contrarióque prorsus modo habere, hæce tamen ultimùm confluere, & in unum aliquod commune conceptaculum desinere exploret. Planè quasi sagacibus contingat, quale fluviorum decursus speculantibus; quos in unum ferè omnes oceanum per quascunque licèt ambages undas suas exonerare observant; utrùm iidem ex montium editis defluant, an etiam ex diversissimis ubivis terrarum fontibus scaturiant, atque ab oppositis mundi cardinibus alvei eorum amnes ducant.

Quinimo neque statim animum studiosi & sagaces venatores despondent, etiamsi conamina investigandi sæpe irrita fiant; verùm omnia circum explorant, cunctisque

Quæ ratione sagacitas in opere versatur.

nota-

notatis, quæ fefellerunt, itineribus, montes annosque sedulò perferunt, usque dum ad extremum aliquem docti laboris terminum pervaserint, qui ulterius progredi vetat: Pari scilicet modo, quo feras venantes notissima earum latibula singulatim perquirunt; & si hîc aut illic nulla videant vestigia, nulla canibus redoleant, in alia tamen digrediuntur, ac per tractum regionis circum sitæ undiquaque divagantur, donec in cubile recens incidentes perpetuò insequuntur; ac finem tandem aut capiendo faciunt, aut interdum amittendo quancumque extra limites peregre aufugerint; aut illuc se receperint, ubi non licet venandi instrumenta transportare, imò ubi nonnunquam nec ipsis canibus canumve magistris adire fas est.

*Unde materia
operum
adipiscitur.*

Ad eundem sanè modum sagax plures experitur vias, & quò plures novit; eò plus valet non modò ad insequendum, verùm & citiùs certiùsque hunc illumve finem attingendum. Itaque Ciceroni (a) homo

(a) De Leg. III.

animal providum, sagax, multiplex (a) dicitur. Ex rerum quippe naturâ ingeniiſque animantium, plantarum ac locorum variorum pendet ſagacitas in diſquiſitionibus. Et primò quidem ſigna ex rerum naturâ ſatis cognita perſpicit, quæ ad negotia ſibi tractanda conducunt. Hoc quidem ſatis in Agriculturâ liquet; ubi, qui ſuccedere volet, ſpectat ad anni tempeſtates, loci ingenium, cæterâque ad agrorum fertilitatem pertinentia. Nam ex (b) Columellæ ſententiâ *qui ſe in hac ſcientiâ perfectum volet profiteri, ſit oportet rerum naturæ ſagaciſſimus*. Neque aliter ſanè Medicina progreditur, quum tempora & ſigna tradat, ex quibus morbi ipſius ingenium, uti & illius exitus ſanandique methodus cognosci queant.

Verùm quoniam ſigna eadem ſæpenu-
mero varias res indicant, in hiſce itidem
dignoſcendis ſagacitas verſatur; ut qualia

*Signa quo-
tuplicia
ſunt.*

(a) 1 Paralipom. 2, 47. Inter poſteros Chalebi invenitur *Σαγαῖ*, id eſt *Comprehendens* ſive *Attin- gens*; quod nomen apud Syros denotat *Mulus* vel *Multiplicans*.

(b) Lib. 1. c. 1.

propria

propria sint, qualia etiam communia, patet. Nempe alia sunt, quæ sola rem declarant, alia quæ non nisi conjuncta manifestam faciunt ; alia præterea, quæ, quoniam naturâ opposita sunt, nunc non posse adesse nec in posterum fore ostendunt. Ac secundum hosce modos multiplex indiciorum natura est ; quam si quis non clare intelligit, omnis ejusdem sagacitas non longè à facultate conjecturali abest. Hic igitur pedem figit sagax, ubi signa peculiariora sunt, quæ indices fiunt rerum abditarum, utrùm eadem jamjam præteritæ, quæve præsentis, aut certò expectandæ sint. Nec sanè dubitandum, quin is sit præstitutus & præcognoscendus plerumque rerum ordo, ut ei, qui ad harum naturas perpetuò attendit, signa excogitare liceat, quæ rem latentem, æquè ac si aperta fiat, demonstrent ; quod ipsum interim universum alijs non nisi ex conjecturâ provenire videatur.

Ex conjecturis innotescunt veri indices.

Itaque conjecturâ semper aliquid incerti habet, quum mens ad verum tanquam scopum collimet ; ubi deerrare perinde atque eundem attingere licet. At verò ex repetitis ejusmodi conjectando erroribus,
sagax

sagax ad verum propiùs accedit, notásque
deprehendit, unde idipsum tandem cog-
noscendum sit. Et tantum valet hujus-
modi mentis frequens exercitatio, ut ex
levissimis notis rem ipsam expiscetur;
quale quidem hisce, quorum mens mi-
nimè sagacitate dotata rationum momenta
seriò perpendere assuevit, vix contingit.
Proinde usu atque experienciâ discunt, qui
multiplicia tractare negotia solent, minuta
quædam observando, unde totum pendet
eadem absolvendi artificium; quæ quidem
tam ipsis perspecta sunt, quàm majora illa;
quæ inexercitatorum attentionem occu-
pant, qualiaque advertendo rem acu tan-
gere nequaquam possunt. Enimverò ex
sagacium illiusmodi observationibus usque
ad peritiam repetitis atque unâ congestis,
ortæ primùm fuère disciplinæ, quæ & ipsis
excoluntur. Hasce interim qui posteris
feliciter tradiderunt, promptius atque ex-
peditius ad veri falsique notitiam iter ipsis
monstrârunt: Ab unâ nempe re cognatâ
ad aliam manuducunt, & totum hinc ge-
nus cognoscendum ostendunt, generaque
alia quæ ad hoc ipsum referuntur, & quæ
analogiam quandam præ se ferunt, ex eo-
dem investigare præcipiunt. Illi autem

T

inter

inter cæteros eminent, quicunque ad errores, qui sibi ludos facerent, digitum intenderunt, ne incauti iterum otio suo abuterentur, ac eâdem prorsus ratione operam perderent. Quocirca omnimodis cumulandi sunt laudibus, qui causas apertè declarârunt, unde sibi & verum cognovisse, erroréque in quos inciderant detexisse, contigerit, & qualia quidem animum inani spe pascere, seque indagantes falsâ opinione lætarent. Siquidem ex errorum fontibus probè exploratis, modisque, quibus mens abduci atque abalienari solet, satis perspectis, & initijs, ubi primum à recto in obliquos tramites deflectit, bene intellectis, verum oculis clariùs demonstratur, contrariisque sibi coloribus juxtâ sitis non modò illustratur, sed & integrum conservari potest. Nil enim tam fidè verum custodit, & undiquâque tuetur, quàm varias falsi facies nôsse ; ac quæ sunt curvorum istius itinerum primordia ; quàm prope lucidos veri fontes hæc insident, & quàm procul postea à rivis perspicuis, inde decurrentibus in confusam obscuritatem, sensim licèt relabuntur.

Enim-

Enimverò ut plurimum malis vitandis nata est sagacitas, potius quàm fruendis bonis, atque ita ad verum feliciùs appropinquare falsum fugiendo consuevit, quàm ad illud rectà tendere, idque ipsum veluti suà coruscans luce promptè amplecti. Ubi igitur via utrinque quasi spinis munitur, ibi sagacitas mira præstare solita est; utpote quæ hisce excitata atque irrequieta exquirendi operæ se totam dedat; at in rebus versata; quæ, si falsæ sunt, non tamen urunt, tranquillè nec anxie se habet; atque utrùm verum falsumne sit, quo mens fruitur, vix curæ est; ideòque nec operæ pretium illius vestigia subtiliter notare ducit.

Ubi sagacitas plus valet.

Sagacitati autem nulla magis debetur ars, quàm Medicina; quæ integra fermè ab ipsâ pendet, uti principiò eâdem nata erat. Siquidem res chirurgica & pharmaceutica potius sensuum exteriorum ope innixæ, dexteritate sive operandi, seu medicamina componendi felices evaserunt. Atqui hæc quantumvis ad artem medicam probe noscendam pertineat, non tamen ibi hærerè medicum oportet. Quinetiam, dum

Sagacitati debetur medicina.

per talia transit subinde advertere est, quomodo arma medicinæ geruntur, ac parantur: At quis eorundem usus naturæ dictatis respondet, atque auxilium eidem ferre solet; & qualis tegit, qualisque nocet; illud fanè medico dignum opus est.

*Quòdusque
extenditur
sagacitas
medica.*

Interea medica sagacitas angustis terminis non finitur; verùm per triplex istud regnum vulgò nominatum ubivis terrarum Animale scilicet Vegetabile ac Minerale à naturâ recondita explorat: Ac dum varia naturæ opera ab artificibus in usus hominum adaptantur, advertit sagacitas eorum affectus, discitque obiter quid nocet, quidve prodest: Idque non modò ut ipsorum malis mederi, sed & exinde indicia mutuari queat, quæ universi generis humani commodis vertat. In hunc ferè modum sagaci medico ubicunque versatur, indicia occurrunt; aliquisque huic in malis perinde ac bonis usus esse solet. Præsentia quippe signando cum præteritis confert, inde per vestigia ad futura pergit; eadèmq; iterum vestigia requirit, quoties idem rerum habitus eadèmq; conditio apparent. Verùm quoniam omnes medicinæ partes, præclara omnium medicorum opera totidem
exem-

exempla ac vestigia sagacitatis relinquunt; ideóque labores plusquam Herculeos exantlare foret eorundem singulatim meminisse; non nisi illud nominare híc videtur, quod per totum vitæ curriculum naturæ sensim procedentis gressus persequitur. Ea profectò Hippocrati laus debetur, qui primum conjuges, quales ad maritalem torum accedere par sit, intuetur; quali dein operâ liberis beandi sunt; qualiterque sponsæ se habere debent, ut sobolem omnibus numeris absolutam per debita naturæ tempora conservent, & perductam ad maturitatem in lucem edant: Quid posthac infantia & sequens omnis seriatim ætas passura est; quæ bona malæ ijs singulis peculiaris sunt; indèque qualia aut alenda vel tollenda; qualia in præsens omittenda, & quo tempore curanda; quali etiam fonte bona malæ oriunda ætates perfluunt in senectutem, aut quâ in ætate finiuntur. Profectò quæ huc spectant, cuncta sagacis mentis opera sunt; sine quibus Medicina adhuc maneret indotata & parvi quidem æstimanda.

Atqui non defuerunt, qui hæc Medicinæ esse fundamenta non agnoverunt, ve-

Fundamenta medicina.

rūni in aliena omnia excurrerunt; quorum deinceps posterī ad prius jacta non illæsi redierunt. Siquidem quæcunque ipsi excogitârunt priscis meliora habuerunt, donec res ipsæ ulteriorem progressum vetarent. Non quòd adinvenire alia novæque sit prohibendum, neque labores quovis doctos contemnendum; sed quòd ipsis adhærendum, quæ natura indicavit, curandūque ut ipsi perpetuò medendi ars respondeat. Ea enim augendi facultates medicas ratio est, quæ à vetustissimis usque ad nostra tempora certa fuisse constiterint, hisce recentia astruere à naturæ ipsius penu investigata. Qualis proinde Medicina sibi per omnia seu vetera seu nova constabit; & solidis illiusmodi innitetur principijs, quæ ut per secula plura jamjam durârunt, firma & inconcussa in posterum manebunt, quantumvis recentibus inventis exornentur atque amplientur. Pluribus interim ingenijs à scopo frequenter aberrandi occasionem quædam opiniones obtulerunt; de quibus inter sese plurimū veteres medici disceptârunt, quales à Celso breviter recensitæ sunt; & de quibus nonnulla ad præsens argumentum spectantia desumere liceat.

Primò igitur, ejus [medicinæ] quæ victu morbos curat, longè clarissimè autores etiam aliùs quædam agitare conati, rerum quoque naturæ sibi cognitionem vendicaverunt, tanquam sine eâ trunca & debilis medicina esset. Post quos Serapion, primus omnium, nihil hanc rationalem disciplinam pertinere ad medicinam professus, in usu & experimentis eam posuit. Quasi scilicet rerum naturæ cognitio non superaddi possit eidem, quæ ab usu & experimentis derivatur. Quod, licet tam clarè pateat, à priscis istis usque ad nostra tempora quæsitum fuit. Quis autem est iste usus? an automati cujusdam cursum sponte sua conficientis, an mentis sagacitate suâ singula notantis, atque iterum dignoscentis notas ejusmodi, non quidem ab iisdem prorsus dissimilibus, ubi rariùs errare datur, sed ipsis quas noverat aliquatenus similibus? Quonam autem pacto experimenta sine ratione aliquantum valere possunt? aut, an similes sint casus, sine accuratis rationum habitis momentis cognosci possit? Et sanè, si quod res est fateri oportet, nihil facilius experimentali notitiâ videtur, nihil rarius quàm experimentis potiri quæ curiosiori menti

De Rationali disciplina atque experimentis.

satisfacere possunt. Quod & Hippocrati placuit, qui experimentum (a) fallax aut instabile atque in lubrico situm esse monet.

Qua ratione Empirici hoc argumenti praestant.

Dispiciendum autem, qualibus dictis Empirici hanc professionem tutati fuerunt; ubi primò advertendum, quòd (b) evidentes quidem causas, ut necessarias, amplectuntur; obscurarum verò causarum & naturalium actionum questionem ideo supervacuam esse contendunt, quoniam incomprehensibilis natura sit. Quale sanè, modò verum esset, omnes philosophos vanitatis insimulare potuit, quicunque per experimenta itidem

(a) Ἡ πείρα σφαλερῇ. Oppositè ad artem, quæ longa est. Ideo Latine dicitur Periculum, quia rarum est tentamentum sine periculo. Hæc vox etiam citò præteriens denotat, quo nomine ad priora connectitur, scilicet καιρὸς θεῦς, occasio acuta. Quare in Ajace Sophocleo ad Ulyssem dictum est, Πείραν τιν' ἐχθρῶν ἀρπάσαι θηρώμενον, Ipsum periculum quoddam hostium corripiendo facere tanquam venatorem. Πείρα usurpatur propriè pro tentamine in ludis sacris, ac dein σφαλερῇ idoneè adjicitur propter proclivitatem ibi in lapsum, potius quam victoriam.

(b) Cels. in Præfatione.

ipfa

ipsa causas sibi nondum notas vestigant. Atqui hoc eorum dictis malè consentaneum videtur, quippe qui aiunt, cum illa incerta incomprehensibilisque sit, à certis potius & exploratis petendum esse præsidium; id est, his quæ experientia in ipsis curationibus docuerit, sicut in cæteris omnibus artibus. Nam ne agricolam quidem, aut gubernatorem disputatione, sed usu fieri. Nempe Agricultura, ut & gubernandi ars quantum debent naturam rerum contemplantibus, ijs patet, qui quousque hæ duæ artes apud Britannos exultæ fuerunt, ex quo philosophi hæce res aggressi sunt, curiosius observârunt. Rursus aiunt, *Ne inter initia quidem ab istis questionibus deductam esse Medicinam, sed ab experimentis.* Id verò, tametsi non planè constet, negare nihil opus est: Quoniam licèt ex hisce initijs olim sagaces cognitionem suam deducerent, artémque rationi congruam dilcerent traderentque; non tamen ad initia semper recurrendum, nec medicinam veluti nondum adultam, sed in cunis usque jacentem contuendum. Nec aliter sensêre, qui Medicinæ præcepta priùs addidicerunt, ac dein usu confirmârunt; ij quippe vident, quantum Hippocrates rei Medicæ intellexit, maximè si quàm lentè
omnis

omnis ex experimentis solis notitia progredi solet, satis comprobatum sit.

Sophismata Empiricorum.

Quod sequitur verò apud Autorem sophistas planè sapit; *Requirere, ratio idem doceat, quod experientia, an aliud. Si idem, supervacuum esse; si aliud, etiam contrariam.* Utrumque enim laborat; siquidem utilissimum est nòsse experientiam rationi consentire, ut ratio ipsa recta esse liqueat; ac si aliud, ut eadem corrigatur. Atqui dum hæc adversus rationem sophismata excogitant, causam ipsam produnt. Interesse enim eorum idipsum videtur, ut ratio è medio tollatur, utque obscuram atque confusam artis suæ opera maneant. Quapropter scripta ferè eorundem interiøre, ijs exceptis quæ alij auctores laudaverunt. Mentis quippe tam angustæ cogitata rarò æternitatem merentur aut fortiuntur.

Qui Empirici opinionem tuebantur.

At verò, quod aiunt Empirici, *primò remedia exploranda summam curam fuisse, nunc verò illa explorata esse; neque ulla aut nova genera morborum reperiri, aut novam desiderari medicinam.* Illud interpretatione eget, quare eadem mox sequitur; *Quòd si jam incidat mali genus aliquod ignotum, non ideo tamen*

tamen fore medico de rebus cogitandum obscuris; sed eum protinus visurum, cui morbo id proximum sit, tentaturumque remedia similia illis, quæ vicino malo sæpe succurrerint; & per ejus similitudinem opem reperturum. Neque enim se dicere consilio medicum non egere, & irrationabile animal hanc artem posse præstare; sed has latentium rerum conjecturas ad rem non pertinere, quia non interfit, quid morbum faciat, sed quid tollat.

Quoniam hisce objectis cæterisque similibus Celsus respondit, quæ apud eundem Exemplum. requiri possunt, plura huc transferendo nil opus est; verùm historiolum hîc tradere vulgatissimam quidem, at qualis ad propositum spectat, non alienum videtur. Empiricus seculo superiore nobilis usu Kinkinæ evaserat; qui Lutetiam à Rege Carolo missus medendi ergò feбри intermittenti quâ Delphinus laborabat, atque à Medicis Parisiensibus interrogatus, quidnam esset Febris, respondisse fertur, ignorantiam tegens, Febrim esse morbum, quem ipse sanare potuit, illi verò minimè. Quo audito non sine plausu qui aderant, *Macte*, inquebant, *Definitio perbella est.* Cujus profectò responsum ostendit novam jam tum

tum medicinam desiderari, idque ad febrim tollendam ; ad qualem sanè curandam Empirici illi veteres plurima velut utilissima laudârunt, nihilo tamen plus quàm Rationales efficere valuerunt : Adeò ut Quàrtana febris tandem opprobrium medicorum nominaretur. Quanquam & illud pateat, nec arti nec professoribus jure hoc ipsum exprobrari potuisse ; donec natura quatenus ipsis explorata instrumentum, quo opus erat, minimè suffecerat. *Quorum enim instrumentorum, siue naturæ, siue artium facultatem obtinemus* (ait (a) Hippocrates) *per ea sanè opifices esse possumus ; per alia verò minimè licet.* Quemadmodum hoc remedij ab Americâ inauditâ olim orbis parte in Europam advectum est. At verò, quum jam usus illius Corticis satis cognitus fuerit, liquet non omnem ejusmodi febrim tollere, sed etiamnum opus esse discernendo latentes morbi ejusdem causas, priusquam ægris administrari salutare hoc medicamentum cum fructu queat. Si enim

(a) Ὅτι γὰρ ἐστὶν ἡμῖν, τοῖσι τε τῶν τεχνέων ὀργάνοις ἐπιπρατέειν, τῶν ἐστὶν ἡμῖν δημιουργοῖς εἶναι ἄλλων δὲ οὐκ ἔστιν. Περὶ Τέχνης.

vitij sanguis aut etiam viscera onerentur, hoc remedij genus licet febrim arceat ad tempus, non tamen prorsus solvit. Ac certò reversura est, nisi alia adhibeantur, quæ huic consilio satisfaciant. Quòd si febris, uti sæpe accidit hujusmodi remedij non insuper adhibitis, minimè tollatur, ea utique in continuam transformatur; atque ita, nisi ad morbi causas spectes, res ægri in deterrimas ruunt.

Observatione porrò dignum est, sagacitatem antiquorum reverà indagasse naturæ modum, quo utitur ad miasmata corpore pellenda, quotquot sanguinem polluant, nimirum per eruptiones pustulæve in cute nascentes. Id autem rectè statui patet, quoniam ea ipsa miasmata, quæ ex altero corpore defumuntur, cum sanguineis alterius rivi communicata ipsum inficiunt; unde via apertè retegitur, quâ contagia homines lædunt. Hoc sanè ipsum clarè ostenditur methodo illam transferendi materiam, quæ per variolosam febrim pellitur; qualis in sanguinem admissa, ibique per plures fluitans dies febrim demum acutam excitat cum symptomatibus, quæ in variolis priùs observata sunt. Adeò eandem

Exemplum sagacitatem medicorum ostendens.

eandem ferè Tragœdiam ea ipsa renovant
miasmata, quæ ex alio antehac pulsa cor-
pore fuerant.

*Signorum
investiga-
tio admo-
dum lau-
danda.*

Propterea nil miri videri potest, si hoc
argumenti claudatur medicorum filios hor-
tando, ut pergant investigatione causarum
per signa, jungantque eorum cognitio-
nem perpetuæ experientiæ; idque eò ma-
gis, quò naturam rerum obscuriorem re-
periant: Plura quippe ejusmodi erui
possunt, si ad indicia respiciant, atque ex
eo quod constat ad aliud abditum progre-
diantur; unde aliquando in lucem prodi-
turum est hoc ipsum, de quo ambigendi
primum locus fuerat; & nunquam venan-
di opus omittant, quamdiu suspiciò sese
offerat, aliquid adhuc falsi latitare. Atque
ita quamvis morbos Podagræ nodosæ, ut
& ubi lapides prælargi nequeunt corporis
eluctari angustijs, nondum medicina nôrit
solvere; ipsi tamen ope præfagiorum vi-
tandi sunt, modò signa nobis prævia satis
accuratè cognita sint, qualia docent cor-
pora ad causas horum generandas proclivia
esse, & dein qualia hoc operis intra pene-
tralia naturæ jam reipsâ agi indicant. Hu-
jusce quidem rei vestigia apud Hippocra-
tem

tēm nonnulla inveniuntur : Quā sanè plenius cognitā medicis liceret amicos saltem incolumes præstare, eosque omnes, qui singula ipsis minutissima, quæ ad sanitatem spectant, aperire velint. A minutijs quippe istiusmodi cognitis ut plurimum pendet, quòd medici apud alios felicissimi operum, apud alios æquè obtemperantes haud ita felices notantur.

Ut sagacitas propterea laudanda est, *Vitium eidem oppositum.* quòd rerum vestigia non inutiliter premat ; sic malè fida indiciorum declaratio eidem vitio vertitur : Quæ quidem ex veri indicum præproperâ ut plurimum prensatione oritur ; unde mentitos veri colores, pro ipsius indicibus assumit, etiamsi nondum affecuta fuerit. Nec absimile videtur id vitij canibus quibusdam venaticis imputatum, qui veluti odorem naribus prehendentes claro omnia ululatu complent, nec tamen quasi vera indicantibus turba credit. Quod quidem sæpe inexpertis accidit ; ac nonnullos etiam vis talis videtur deficere propter naturam, alios etiam propter consuetum aliquod vivendi genus, quale ejusdem potentiam immiquat.

Affectus

Affectus. Affectus igitur hujus loci ea animi remissio est, quâ indiligenter verum sagax scrutatur; quâ desultoriè rem agit, nec laborem perpetuum aut satis diu continuatum, quanto ad assequendum opus est, adhibet. Remedium proinde hujusce affectûs ex gymnasio solertiæ petendum est; ubi qui assiduè versatur, jugiter experiendo exercitatur; ac dein lubricane an fida sint indicia compertum demum habebit.





C A P. XVIII.

De Solertia.

T verum vestigando sagacitas Quæ ratione à Sagacitate contradi-
singultu. venatur, sic solertia idem arripit, usuique vertit: Illa ipsum per varios mæandros insequitur, usque dum, ubinam jacet, manifestum fuerit; hæc verò repertum occupat, utilitatemque adinvenit. Ideoque temporis diurnitatem sagaces, occasionis momentum solertes exoptant. Illi proinde magis res futuras prospiciunt, hi præsentis intuentur; unde sagacitas consilij, solertia agendis rebus nata est.

Solertis mens ad attentionem parata & Solertia interpretatio. prompta servatur, ita ut ipsa perpetuò instantibus adesse rebus videatur; quo pacto solertia opponitur mentis avocationi per illum saltem temporis articulum, ubi ejusdem

U imperio

imperio opus est. Hic quippe cogitandi modus Græcis familiaris olim fuit; unde ex hoc fonte dictio vulgò derivatur, quo nomine hanc dotem (a) appellârunt; ubi mentem in proximo & juxtâ sitam esse, minimè divagantem at veluti præsentem indicârunt. Nec tamen tacenda nominis illa (b) notatio, quæ mentem, hujusce vi eam quasi in nodum complexâ, coërceri innuit. Siquidem præcipua in periculis imminentibus solertia est, non modò arctè attendere ad præsentia, sed nunc imperio regere impetum, ac effrænem esse nequaquam sinere; nunc & omni nisu, qui rebus mœstis occurrat, insuper uti; quique per angorem mentis (c) aptè exprimitur. Unde patet eminentissimum solertiæ gradum duci in belli tumultu competere, quo opus est ad similia tractandum, qualium facies quovis horæ momento immutari solet.

(a) Ἀγχινοια, quæ vox solertiam denotat, conflata esse fertur ex ἀγχι, *propè* vel *brevi* & νῆς *mens*.

(b) Ab ἀγχα coërceo, *fræno*.

(c) Aut ad humum mœrore gravi deducit, & angit. Hor.

Duo nimirum sunt solertiæ officia, aut *Prima
ejus pars.* occasionem arripere aut amissam redintegrare. Quocirca illud Xenophontis (a) monitum legitur; Ita semper paratum esse ducem oportet, quasi si jam nuntiatum sit, hostes adventare. Licet enim valde fideles sint exploratores, in eo tamen difficultas est, ut aliquid in tempore nuntient, quum multa in bello accidere impedimenta soleant. Postea verò scribit; Bonum esse dari operam, ut res hostium per exploratores cognoscantur. Ego verò esse omnium optimum existimo, ut aliquis ipse, si (b) de tuto quopiam loco liceat hostes alicunde contemplari, num in aliquo peccent inspicere conetur. Cujus dein exem-

(a) Ἰππαρχῆς.

(b) Turenus dux Gallicus (narrante legato suo) hunc perpetuò morem servare solitus est; quo ipsius more duci exercitus adversi Montecuculo cognito, circumspexit senior ille imperator qualis editus est locus, tam prope castra situs, ut exinde Turenus omnia contempleretur; atque ad eundem locum tormenta bellica direxit: Quò factum est, ut ipse hanc rem ignorans, ibi globo ferreo percussus fuerit, quamprimum copiam sui fecit.

plum in alijs animantibus exhibet putâ milvi luporûmque; *qui si quid incustoditum sit, rapere nôrunt, & prius in tuta se recipere, quàm capiantur.* Nempe prima est hæc solertiæ pars, occasionem exploratam & clarè perceptam arripere.

*Occasionis
descriptio.*

Quoniam autem occasio, quamprimum sese offert, captanda est, veteres eam finxêre (a) pedibus pennatis rotæ volubili insistentem, vertigine quasi velocissimâ se in orbem circumagentem, anteriore capitis parte capillosâ, posteriore glabrâ, comitem verò ejusdem pœnitentiam; hæc nimirum remanet, postquam ipsa effugerit. Quinetiam huc liceat transferre pulcrè apud Phædrum (b) delineatum tempus, quatenus ad occasionem spectat,

*Cursu volucris pendens in novaculâ,
Calvus comosâ fronte, nudo corpore,
Quem si occupâris, teneas; elapsum semel
Non ipse possit Jupiter reprehendere:
Occasionem rerum significat brevem.*

(a) Auson. in Epigramm.

(b) Lib. V. Fab. 8.

*Effectus impediret ne segnis mora,
Finxere antiqui talem effigiem temporis.*

Siquidem ab hâc imagine in novaculâ pendente crediderim Hippocratem (a) occasionem dixisse acutam: Quare & medicorum filij illud acutum morbis tribuentes, non modò vehementiam, verùm & temporis brevitate signant, locumque, ubi occasio critica consistit, veluti in aciem confurgere exilem, qualis latitudine, quæ moram transeundo trahat, propemodùm destituatur.

In hunc modum solertia medica se habet; dum morbos ad crisin assurgentes curret, symptomata advertendo, quæ eandem antecedere, & quæ comitari solent. Si quando enim à naturâ occasio prius detur, eandem arripere novit; neque sanè expectat dum vitium diutius insidens novum malumque introduxerit morem; verùm idipsum mox tollere nititur, antequam humores in partes suas traxerit, aut viscera

*Exempla
solertia
prima.*

(a) Ἡ δὲ τέχνη μακρὴ. ὁ δὲ καιρὸς ὀξύς. Ars in longum excurrit; occasio verò in acutum.

partesve solidas corruperit. Scilicet hoc artis medicæ est, quod facere eum oportet, cui ægrorum malis invigilare, & dehinc occurrendo felici evadere liceat. At rarò nec nisi apud paucos, qui amicorum nomine salutantur, tam auspiciò medicinam illi faciunt beati hujusce scientiæ professores, quibus prudentiores experiri ægros contingit. Primum quippe, quod in occurrendis morbis venientibus versatur, medici munus ijs cedit ut plurimum, quibus causæ minoris momenti, quales nimirum morborum initia haberi solent, committuntur. Ac propterea hisce, quibus non ita beatis esse licet, ulteriora prospiciendum morborum tempora, quando radices jamjam egerint, atque adoleverint, & pejora indies metuenda mortem minitentur. Ac proinde quid in gremio naturæ præsidij situm sit serotinis istis horis perquirere sæpenumero opus est. Ubi quidem positi advertent primùm medici, quousque morbi naturalis ordo turbatur; aut an ægrum statim velut è flammis eripere fas sit. Et quandocunque per hæc rerum discrimina medicina exercenda est, solertiâ etiam imperatoriâ haud minore opus erit. Ad quam sanè officij partem exequendam conducunt
consilia

consilia ex sagacitate provenientia, antehac memoriæ prodita: Eòdem enim pertinent omnia, quæ ex Crisi laudabili speranda veniunt, quo in opere medicus naturam adjuvabit. Et si morbus istiusmodi invaserit, qualis est Cholera, cujus nisi remedijs sublata intra paucas horas exitus fatalis est, efficacissima in promptu auxilia suppeditare medicus singulari solertiâ dotatus nôrit; cujus exemplum (a) invenire est apud medicum sæpe laudatum.

Altera itidem solertiæ pars est quæ, *Pars solertiæ altera.* etiamsi occasio elapsa aut nondum data fuerit, aliam ejusdem similem, paritve usûs & momenti vel novam planè parere novit. Quali quidem generi non semper locus est; attamen rerum humanarum conditio adeò in orbem circumagi solet, ut perpetuò in veterem figuram revolvatur; atque si non facie & habitu eadem, non tamen multùm diversa in scenam occasio reducatur. Quî autem talis nascatur, exemplo tradit laudatus autor; (b) *Egregium hoc*
 U 4 *arti-*

(a) Ἐπιδῆμ. Βιβλ. Ε'.

(b) Xenoph. ibid. Qui & Græcæ Historiæ Libro quinto ostendit exemplo Teleutiæ, quantum momenti

artificium est, si possit, quum ipse viribus inferior est, metum hostibus incutere, ne se adoriantur: Quum potior ipse viribus; eorundem animis indere fiduciam, ut aggrediantur. Sic enim & ipse minimum detrimenti acceperis, & in primis hostes in errore deprehendere possis. Ubi sanè hinc metum, illinc fiduciam excitare docet, ut occasio ex hostium errore in utrâvis fortunâ, ubi viribus inferiori cuivis vel superiori esse contingit, pariatur.

*Hæc solertia pars
Medicina
utilissima.*

Quoniam occasio frequenter præterijt priusquam Medicus ad ægrum accersitus fuerit, professio plurimum huic posteriori solertiæ parti debet. Exinde ad occasionem denuo pariendam se accingit; ut, quamvis natura ad sanitatem rectâ tendens impediatur, quò minùs eventum felicem conaminis sui sortiatur, ad alios tamen nixus incitetur; &, si unico nequeat adortu hostem superare, per plures ut idipsum aggrediatur. Similiter unum opus, ratione virium habitâ, in varia partitur solertia;

momenti sit in irâ regendâ; quæ, cum occasionem plerumque præbet, tum nequa data occipitur, impedit.

&

& quod per unum aliquod itineris genus pelli non potest, nec quamdiu unitum sit omnino superari aut tolli, jamjam imminutum, fractum domitumque per mille canaliculos excernere annititur. Cæterum ejusmodi solertiæ exempla per medicorum libros ubique sparsa reperiuntur, ad qualia proinde digitum duntaxat intendere impræsentiarum opus est.

Ex prædictis porrò liquet solertiam flo- Solertia
enitet ex
ceteris do-
tibus.
rem esse ex facultatibus ad summum ex-
cultis natum, qui earundem dotes in se
complectitur; cujus etiam vis ac pulcri-
tudo à singularum præcellenti integritate
atque harmoniâ inter se pendent. Quæ-
dam proinde ingenij dexteritas est, quæ om-
nium vires in unum collectas concinnat,
atque adaptat negotio, quod occupat, fe-
liciter tractando; sive hoc sit jamjam parta
tueri, vel nova quærere; ex difficilibus se-
met expedire, vel mala defendere; incer-
ta stabilire, vel fixa convellere; in ordi-
nem confusa redigere, aut ordinata tur-
bare; denique quæcunque mens cogitanda
suscipit, eadem opera peritè conficere, at-
que omni arte absoluta reddere. Ut so-
lertia enim vigeat, perceptio sit acuta ce-
lerrimæque

Ierrimâque necesse est ; ut imaginatio statim res vividè depingat, útque memoria errores æquè ac causas eorundem fideliter ac distinctè teneat. Siquidem hâc dote prædita mens errores priùs detectos fugit, subitoque excogitat quo pacto, si quando iter ejusmodi transeundum est, gressus aliò dirigere licet, atque incommoda undiquâque urgentia devitare. Quo in negotio discernendi facultas eximiè prodest, quæ à noxijs utilia nunc distinguit, sagaci priùs habitu edocta, qualiter res habent.

*Exempla
ad medicinam
speculantia.*

Ad hunc modum Medicina contemplatur ævum istud quod hominibus degitur, unâ cum omnibus, qui eidem accidunt, morbis, atque exinde discit nullam sanandi rationem esse adhibendam, quæ vel ætatis vel itidem morbi ipsius tempori minimè conveniat ; quæ nec in discrimen tale adducat, quale morbi ingenium in se minimè comprehendit. Nimirum qui Arthritidis dolorem sævientem sedat, atque ex articulis in viscera sive intestina repellit, in tempus saltem hominem doloris expertem reddit, at malum adauget ; quo factò sæpius occasio auxilia administrandi amittitur. Sicut etiam qui pueros puellâsque

tan-

tanquam puberes tractat, næ ille curat, ut vix unquam ad virorum mulierumque perfectam ætatem provehantur.

Huic proinde doti opponitur mentis inertia, quæ iterum duplex videtur, quatenus ex adverso respondet huic vel illi solertia parti: Priori nempe, quæ occasionem prætervolantem seque offerentem arripere novit, à contrarijs stat partibus istud inertiae genus, ubi peccatur hinc ob ruditatem atque imperitiam, aut etiam prævum ex consuetudine morem; illinc propter ignaviam aut ejusmodi stupiditatem, à quâ rerum in præsentia utilium necessariarumve sensus abest: Posteriori verò quæ apud animum reperit, quo pacto occasio parienda sit, alterum inertiae genus adversatur, quæ licet præsentia de facie nōrit commoda, atque illico eadem sibi conciliare acprehendere studet, non tamen in rerum penitiùs naturam inspicere, aut cum præteritis præsentis conferre potest; ideoque occasionem, quæ nascitura est, non prævidere, neque eidem adeò imminere solet; nedum cogere res ipsas dimicare, atque ex sibi felici futuro earum conflictu commoda aucupari, aut incommoda depel-

*Vitium
eidem op-
positum
inertia.*

pellere à se novit. Illa quidem inertia in priore casu haud absimilis isti corporis vitio videtur, quod naturæ minimè excultæ deberi consuevit, dum incompositos arte & consilio carentes dat motus; & in posteriore casu non multum à segnitie abludit, qualis corporibus subinde morbidis agilitatem prohibet, & ex quâ quoad celeritatem graviter ac ineptè ipsa se habent, atque ad labores perferendos oneræque sustinenda prorsus inhabilia cernuntur. Hæc verò mentis inertia, quæ occasionem parere omnino nescit, sterilitatis corporeæ vitium potiùs refert.

Affectus. Ex illâ dein, inertiam duplex affectuum genus; ex hac non nisi unum nascitur. Ex illâ quippe prius affectuum genus in eo consistit, quòd mens læva sit, atque omnia pravè agat & interpretetur. Quale quidem junioribus magis accidit; ac proinde, antequam confirmetur, tolli potest. Cui sanè educatio remedium accommodum est; præsertim si sodalium atque amicorum dexteritas in auxilium vocetur. Usus dein rerum adhibendus, & quidem experientiæ crebræ scuticâ (ut ita dicam) sæpe ad amovendum opus est; nec quidquam

quam præsentius ferè compertum est, quàm sic habentem occasionis amissæ conscium fieri; unde feliciùs ac plenius docetur, quanti hæcce præterita valet. Hinc enim prompta ingenij dexteritas innascitur, mentisque præsentia tanquam necessaria cogitur, ne dein occasio, si fortè renovetur, rursus elabatur. Quinetiam in posteriore casu, qui ignavâ mentis hebetudine usque ad stupiditatem afficitur, hunc eâdem uti magistrâ oportet; eoque plus acerbitalis requiritur, quò remissiùs sentit, & quò graviùs hebet. Educationi interim ac bonorum societati conjungenda est nervei generis confirmatio, non modò diætâ tenui ac parcâ, sed & frequentiore inediâ. Imò & peregrè proficiſcatur, ut familiariter versetur cum alienarum regionum incolis; variisque & sibi invicem contrarijs hominum moribus ignavus ejusdem animus arrigatur. Ac denique, in universum quæcunque mentem fortissimè exacuere valent; hîc eadem usui futura sunt. Alterum autem istud inertix genus, quæ infœcunditas quædam mentis videtur, vix auspiciatius amovetur, quàm amoris operâ; cujus quidem flammæ in pectore suscitare fœminæ pulcherrimæ ingenioque florentissimæ dos est,

est, cui sale sermonem condiendi, ac dulci omnia lepore contingendi peritissimæ esse liceat.

*Solertia
rãvior, vel
plurimum
communis.*

Ut autem solertiæ gradus est, quæ ab alijs parta sunt, hisce oblati frui, ac nobismet tradita tueri; ita plures huc conscendunt; verum non cuivis contingit esse occasionis artificii; ac proinde ad illum superiorem gradum non posse se evehere, raro inter vitia hominis numeratur; neque affectus exinde orti curatio ferè desideratur; utpote qui perpaucis innotescere soleat. Idque sanè non immerito, quoniam sæpe pendet à penetralibus naturæ probè perspectis; cujus exemplum prodiderunt (a) antiqui in historiâ Thaletis, quem ferunt, *præcognitâ futurâ ubertate conduxisse olearia, pecuniâsque innumeras sibi comparâsse.* Quod paulò aliter Cicero: Eum nempe, *omnem oleam, antequam florere cœpisset, in agro Milesio coëmisse.* Plinius (b) verò hæc; *Ferunt Democritum, qui primus intellexit,*

(a) Hieronymus Rhodius apud Laërtium, & Aristoteles.

(b) Hist. Nat. l. 18. c. 28.

ostenditque cum terris cæli societatem, spernentibus hanc curam ejus opulentissimis civibus, prævisâ olei caritate ex futuro vergiliarum ortu, quâ diximus ratione, ostendemusque jam plenius, magnâ utilitate tunc propter spem olivæ coëmisse in toto tractu omne oleum, mirantibus qui paupertatem & quietem doctrinarum ei sciebant in primis cordi esse. Atque ut apparuit causa & ingens divitiarum cursus, restituisse mercedem anxie & arida minorum pœnitentiæ, contentum ita probasse, opes sibi, quum vellet, in facili fore. Hoc Sestius postea è Romanis sectatoribus Athenis fecit eadem ratione. Ut interim plura sunt solertiæ inventa utilissima, quæ plerumque in disciplinis conclusa reconduntur, sic quædam ex hisce ad artes singulares pertinent; Ex quibus etiam quædam vix ullis nisi artis suæ peritissimis cognita sunt; alia dein rudioribus satis intellecta. Artes autem vel tales sunt, quales propter demonstrandi facilitatem, omnibus ferè aperiri queunt; vel quales singulari ingenio præditos, ut ritè ac cum laude exercean- tur, requirunt: Prioris generis sunt artes literas depingendi, ac voces singulatim legendi; pariter atque numerandi secundum regu-

egulas vulgarissimas ; posterioris sunt O-
ratoria & Poëtica, necnon Medicina.

*Solertia
circa sco-
pum ver-
satur.*

Solertia dein alia scopum proponit ; alia consilia ad eundem spectantia dirigit. Sco-
pus interim dignior ac cellior est ; aut vi-
lior ac humili forte hominibus convenien-
tior : Interdum etiam latior atque amplior
est ; interdum angustioribus terminis con-
tinetur. Et in hisce singulis præcipuum
solertiæ munus videtur, ut nequid propo-
nat, nisi quod humeri ferre valeant, & cui
se ipsam haud imparem esse tandem ex-
periatur. Quò sanè spectat celeberrima
illa Hippocratis observatio; (a) *Quidam*

(a) Εἰσὶ δὲ τινες, οἳ καὶ διὰ τῆς μὴ ἐθέλοντας
ἐγχειρεῖν τοῖσι κενρατημένοισιν ὑπὸ τῶν νοσημάτων
μυμεῖται τὴν ἰητρικὴν, λέγοντες ὡς ταῦτα μὲν καὶ
αὐτὰ ἰφ' αὐτῶν ἂν ἐξυγιαζοίτο, ἃ ἐγχειρέουσιν ἰᾶσθαι
ἃ δ' ἐπιτηδείως δεῖται, ἔχ' ἅπτονται· δεῖν δὲ, εἴπερ ἦν ἡ
τέχνη, πάνθ' ὁμοίως ἰᾶσθαι. Οἱ μὲν ἔν ταῦτα λέγον-
τες, εἰ ἐμμεφοντο τοῖς ἰητροῖς, ὅτι αὐτέων τοιαῦτα
λογιστὰν ἐν ἐπιμελῆνται ὡς παραφρονεύντων, εἰκότως
ἂν ἐμμεφοντο μᾶλλον, ἢ ἐκεῖνα μεμφόμενοι. Εἰ γάρ
τις τέχνην, ἐς ἃ μὴ τέχνη, ἢ φύσιν, ἐς ἃ μὴ πέφυκεν,
ἀξιώσται δύνεσθαι, ἀγνοεῖ ἀγνοίην, ἀρμόζουσιν μανίῃ
μᾶλλον ἢ ἀμαθίῃ. Περὶ Τέχνης.

sunt,

sunt, qui ob eos, qui victis à morbis curam adhibere nolunt, medicinam ipsam reprehendunt, dicuntque, quòd morbi, quos sanare aggrediuntur illi, per seipsos fuissent sanati. Qui verò auxilio opus habent, eos non contingunt. Oportebat autem, inquiunt, siquidem ars erat, omnibus æquè morbis sanitatem afferre. Qui igitur hæc dicunt, si medicis indignarentur, quòd ipsorum talia dicentium non ut delirantium curam habeant, meritò sanè succensuerint magis, quàm quòd illa reprehendunt. Si quis enim ab arte potentiam in ea quæ non profitetur, aut à naturâ facultatem in ea ad quæ nata non est, exigat; is ignorat insaniam dementiæ potius quàm ignorantia convenire.

Nempe primum curat solers, ut propositum assequendi securus evadat, ac dein ^{Vel consilia.} ut consilia eòdem propriè pertinentia ineat; ideòque viam, quæ per consilia aperitur, undiquaque muniat, ne causæ velut ex insidijs adortæ transitum inhibeat. Hinc igitur invenit, quibus rem totam, dum transigitur, celet, & cœpta, aliâ ab eâ quæ apparet specie, prætexat. Hinc & consilijs imperatorijs species vel jugiter diversa à verâ facie ostenditur, vel tam frequenter,

quenter, ut minimè eidem fidendum sit :
 Ac propterea Xenophon (a) disertè prodit ;
Nihil adeò fructuosum in bello, quàm de-
ceptio. Qualem scilicet solertiam aucupes
 in volucris notant, dum nidos celent,
 hosce quærentes abducendo à locis ubi siti
 sunt, procul nimirum ab iisdem volitando,
 atque aliò iter aëreum faciendo. Ad
 eundem pariter modum solertia meden-
 tium absinthij, dum pueris exhibet, (b)
 amaritiem fallit.

*Confilia
 consilij
 opponit.*

Verùm non rarò evenit ut consilij con-
 traria consilia sint, atque exinde eorum
 conflictus nascantur; haud secùs ac qui

(a) Ἰκπαρχ.

(b) — Veluti pueris absinthia tetra medentes

Cùm dare conantur, priùs oras pocula circum

Contingunt mellis dulci flavóque liquore,

Ut puerorum ætas improvida ludificetur,

Labrorum tenuis, interea perpotet amarum

Absinthij laticem, deceptaque non capiatur,

Sed potiùs tali facto recreata valeat.

Lucret. Lib. i.

trans-

transversis cuniculis hostium cuniculos excipiunt. Idem propè solertiæ accidit, quam subinde irritam reddere alienum consilium oportet, antequam sibi cogitatum exequi queat. Enimvero hîc magnopere annitendum videtur, tam aperta coràm omnia habere, ut quæ abdita sunt non ultrà metuere par sit. In hunc modum Palamedes Ulyssis furorem solummodò fictum retexit; dum, quò graviùs insanire videretur, junctis diversæ naturæ animalibus salem ferebat. Telemachum quippe filium objecit, quo viso Ulysses aratum subito suspendit, ne eum læderet, sc̃que non furiosum esse, prout simulârat, prodidit. Quo in genere periculum, contra quod maximè munientum est, exinde imminet, quod etiamsi hoc consilij irritum reddatur, aliud tamen integrum manere forsân possit. Atque ita quamvis Palamedes tectum Ulyssis consilium frustratus fuisset, & ad bellum coëgisset, ei tamen solummodò occasionem præbuit, vitæ suæ insidias postea struendi. Nec hujus quidem solertiæ exors est Medicina; utpote quæ frequenter monet, inter symptomata atque morbos ipsos multum, quod ad curationes, interesse; ideòque cavendum, ne, dum symptomatis ali-

cujus vehementia mitigatur, morbus interim aggraveſcat.

*Solertia
juniorum
ac ſeniorum.*

Quoniam autem irrita frequenter optima redduntur conſilia, ideo hæc ſolertia, quæ dum juniores ſunt, novis adhuc excogitandis exequendiſque probatur, non ſine cautione provectâ jam ætate in operibus verſatur : Idque quia hæcce didicit bona rariùs, mala verò ſæpius expectare; ac dein prorfus nova vix tentare audet, at notioribus ſibi que omnino perſpectis contenta manet. Ac proinde ſolertia intra fines coërcetur anguſtiores, prout magis magiſque indies cautionem fidum ſibi comitem aſciſcit. Quippe quò maturiori quiſpiam ſolertiâ dotatus fuerit, eò plenius clariùsque artes fallendi conſiliâque, quibus doli artifices illudere ſoliti ſunt, novit; eò ſcilicet frequentiùs incertam omnium conſiliorum conditionem expertus fuit. Quare ſolertes jam ſeniores minimum negotij fortunæ poſthac tranſigendi volunt permittere : Ac propterea id ultimum in votis habent, ut ſeſe ſibi que parta tueantur; & ſecum in primis ſedulo perpendunt, quâ ratione ſecuri iſdem fruendi evadant; & dein ſiqua ſibi nova optant,

tant, ut viâ ipsis notissimâ ad eadem accedant, in quâ nimirum eos nullum adire periculum abunde constiterit. Sagacitas enim, quæ, nisi natura neget, largâ experientiâ adaugetur, crescîtque prout res ipsæ quotidie exhibitæ atque coràm apertæ semet signis manifestas faciunt, ad justam maturitatem unâ cum solertiâ consurgit; ac dein sub auspicijs illius hæc ipsa in posterum militat, nihilque injussu ejusdem audet. Suspicio quippe magis solertiæ jam seniori dominatur, & quæ sola periculis fida satis nôrit, ea veluti indicia reponit, ex quibus futura innotescant. Adeò ut solertiæ labores suspicionibus perpetuò recurrentibus ad sagacitatem perducant, eaque certa suppeditent indicia; unde itidem nulla nisi sagacitati probata solertes ultimum affectare solent. Ex ordine demum earundem dotum sic dispositarum melioris ea naturæ fors nascitur, cujus expertes evasisse medicinæ peritissimos, ipsiûsque operum felicissimos memoriæ nullibi, quod sciam, proditum est.





C A P. XIX.

*De Imperatrice facultate.**Qualis sit.*

IMPERATRIX facultas, quoniam in eâ mentis potestas tumè elucet, totius titulo frequenter insignitur. Siquidem ipsius est, dum omnia intus bene habent, non modò reliquas mentis facultates, verùm etiam animum pariter regere. Sub eâdem itidem militat Locomotrix; omnesque corporis copię eidem aliquatenus parent. Quanquam illud non diffitendum sit, hanc facultatem plus apud alios, apud alios minùs valere, non solum ob naturam, sed & institutionem, ac eorum præcognitionem, quæ actiones consecutura sunt. Hæc ipsa interim ab initio dux (a) est,

(a) Græcis τὸ ἡγχιμονικὸν dicitur.

perpetuóque agendis rebus mentis instat, monitáque & consilia, qualia probat, exequitur : Atque ita prout sponte ex hisce oritur, Voluntas (*a*) nominatur. Quæ quoniam fui (*b*) juris est, legibúsque adeò soluta, ut omnibus alijs facultatibus frænum injicere, atque animadversionibus earum non solùm reniti, sed & contraria amplecti penes eandem sit, arbitrium in hæc situm videtur.

Profectò idipsum hîc situm esse palàm fit observando, ipsam vel non omnino res rationésque ipsarum advertere, vel quò-usque solùm vult; ideóque in partes judicis ire, aut animi affectuum. Prius est rationis iter; posterius verò, quale sine ratione placuit: Prius naturæ æquabiliter temperatæ plurimum debet, ac dein institutioni rectæ, rerúmque longo usui; dum alterum æstuantis atque incultæ naturæ soboles est, qualis restat indomita, ac fræna rationis depellere sæpe solita est.

(*a*) Βέλομαι [unde & Volo] ἀπὸ τῶν βελῶν.

(*b*) Αὐτεξέσιον, suæ potestatis.

Proinde quicquid hoc imperium ratione solutum auget, non sanè dubitandum, quin idipsum robur corpori, virèsq̃ue locomotrici facultati, imò & sensibus externis addat, hominèmq̃ue ad bruta animantia propiùs deducat; mentem verò quatenus rationis particeps est eatenus lædit, ac in errores procliviores atq̃ue contumaciores reddit, imò ita propositi tenacem, ut ab eodem nullâ ratione abduci queat.

Vitia.

In vitium proinde currit imperatrix, quandocunque sese permittat imaginationi malè sanæ affectibúsq̃ue animi rapiendam in omnia alia ab ijs, quæ judicandi ac recognoscendiq̃ue facultates declarant. Duplici enim nomine peccat; vel eò quòd nunquam ab hoc, quod temerè & sine ratione vult, dimoveri queat, vel è contrario, quòd ab optimè institutis facilè seducatur. Prior siquidem ea obfirmata voluntatis pertinacia sæpius animi cuidam affectui debetur, ac proinde donec ejus vehementia resederit, mens in alterius quasi potestatem redacta, eidem omnino paret. Posterior verò tractabilis hæc voluntatis mollietates in alteram inclinat partem non minùs

minùs periculofam ; ubi hæc facultas du-
tilis & in quemvis habitum fequax, ve-
luti cera impreffam aliam ab aliâ imagi-
nem capit, omniùmque dein formarum
eft, neque fibi conftans, nec, quæ ab alijs
difcit, diutius retinens.

Inter utrumque autem extremum felix *Sanitas.*
ea arbitrandi libertas interjacet, quæ non
nifi rationum momentis in has vel illas
partes inclinatur ; neque ullius verbis eò-
ufque fidem habet, ut ab ijs potestas dif-
fentiendi, quodocunque res aliter habeat,
minuatur. Enimvero nullum infignius aut
certius fanitatis integerrimæ documen-
tum imperatrix dare poteft, quàm quod
ipfius libertas prodit ; ideòque omnia,
quæ hanc præcidunt, eatenus etiam illam
perdunt. Interea undecunque fit ut ali-
quid facere imperatrix addiéta fit, quod
aut confilijs monitiſve facultatum reli-
quarum mentis ſuperiorum adverſatur,
aut ex ijsdem non deducitur ; exinde
fanè libertas adimitur. Eâ quippe lege
imperat, ut in primis fui ipſius ſaluti in
univerſum conſulatur, & ut quicquid eò
tendere videtur, ne illud repudiare, ne-
dum

dum eidem repugnantia amplecti velit. Huc autem pertinent non modò ea, quæ ad sui conservationem primâ facie rectâ conducunt, verùm itidem, quæ, ut ipsi bene sit, faciunt. At si novum aliquid hisce adversum tentet, renitendi & reprehendendi studia singularum facultatum hinc censura est, eoque fortiora quò accuratioꝝ sanitate eadem fruuntur. Quo tandem pacto talis illius libertas est, quale imperium; hoc verò nullâ aliâ ratione constare potest, quàm quâ vota convenientia sunt naturæ suæ dictatis; unde hæc facultas aliena ab hisce ipsis nonvult, dum liberrima est.

Libertas.

Libertas proinde hujusce facultatis non ultra fines naturæ extenditur; qualis corpori liberè se moventi accidit, dum extraneâ quâvis vi, aut etiam defuetudine habitûve malo, aut aliquo alio morbo minimè impeditur, quin pro naturæ modo ultro ad hoc vel illud loci illæsum pervenire potest. Neque sanè idipsum liberiùs movetur, quoniam velociùs violentiùsve aut diutius, quàm natura ferre queat, se homo proripit & exagitur, &
quia

quia si id fiat læditur; propterea quòd hoc ad naturæ solutam lege licentiam pertineat. Ad eundem quippe modum vera arbitrij libertas intra naturæ suæ fines subsistit; secùs ordo naturalis facultatum turbatur, & earum repugnantia voluntati inde initium sumens, harmoniæ vincula abrumpit; unde etiam poenæ naturæ violatæ se in ejusmodi libertatem vindicantes pendunt.

Quod autem vi extrinsecus illatæ ut *Libertatem adimmentia extrinsecus.* & desuetudini corporis libertatem adimentibus respondet, hoc ignorantix veluti vincula referunt; quoniam ut res externæ motibus corporeis obsistunt, ac desuetudo exinde ortum ducit; ita etiam imperatrix ab inscitia tanquam devincitur, cæteræque mentis facultates coërcentur & quasi incarcerantur; unde neque dotes suas ampliare, nec munij suis fungi, si quid proponitur, possunt. Ac porro res ipsa sæpe in causâ est, vel ob hanc intelligendi atque interpretandi difficultatem, vel etiam ob varias ejusdem multiplicesque rationes, quibus mens impeditur; quare circa eandem evolvendam cum

cum libertate versari nequeat. Tam varia quippe ac multiplex est quarundam rerum rationumque ad eas spectantium natura, ut, haud secus ac labyrinthi ostia atque ambages, aperturis passim novis numero carentibus huc illuc mentem avocent; quorum omnia, unicum si excipias iter rectum, à vero deflectunt.

Et intrinsecus præjudicia.

Præterea imperatrix frequenter præjudicijs adeò occupatur, angustatur, atque ad eadem quasi religatur, ut dehinc libertas ab hisce alia meditando adimatur. Præjudicia quippe respondent malo corporis habitui, ex quo imbecillitas libertatem præcidit. Hoc autem casu captiva hæc facultas servire his, quæ jam occupârunt, & ex illis omnia eidem subiecta æstimare propè cogitur. Quo quidem animadverso, philosophi in libertatem discipulorum suorum mentes vindicare aggressi sunt, omnemque anticipationem rei cujusvis ab ijs amovere; ut hæ tanquam tabulæ rasæ evaderent. Neque sanè liberas esse easdem agnoverunt, quæ opinioni cuivis assensum præbuerant, cui recta ratio non prorsus astipularetur.

Hinc

Hinc propterea orta est ingeniorum distributio, quæ vel liberis vel servis accensetur: Hæc vel talia sunt naturâ, vel libertatem pristinam amiserunt; illa naturâ sunt libera, at non sine culpâ suâ servitutem patiuntur. Alia itidem mediocria frequenter occurrunt, quæ nec totam servitutem pati possunt, nec totam libertatem.

Morbis itidem ea libertas præciditur, *Et morbi.* ac nonnunquam prorsus amittitur; idque diversimodè accidit. Est enim ubi nunquam postea recipitur; est ubi aliquatenus, non tamen in integrum. Morbi verò, per quos liberæ huic facultati esse non licet, aut ij sunt, qui facultates aliquas mentis afficiunt, vel tollunt; idque aut statis temporibus periodicè recurrendo, aut per vices incertas: Quemadmodum prioris casûs exemplo sunt febris intermittens; cui per paroxysmos certò reversuros frequenter delirium accidit; ut & Epilepsia, cujus insultu durante cogitandi libertas adimitur. Est etiam ubi ea libertas præciditur per accessionem unicam, quale in Apoplecticâ cernitur; quæ
modò

modò non fortis sit, sed curationem perfectam admittat, minimè per paroxysmos reverti solet. Idem & Comati accidit. Quin & libertatem pariter adimunt Phrenitis; cæteræque insanix species: Et ex hisce itidem sunt, quæ quibusdam tempestatibus exacerbantur. De quibus sanè omnibus quatenus varia morborum genera sunt, nunc non est agendi locus.

*Morbi ejus
peculiares.*


Morbi proinde, qui ad hanc facultatem peculiariter spectant, ex vitijs ejusdem priùs nominatis ut plurimum oriuntur. Illius siquidem pertinaciæ ac perseverantissimo pravæ cujusvis rei studio malus iste habitus plerumque debetur, qui Mania dici solet: Sicuti alteri cereæ ipsius molitiei accidit stoliditas. Ac propterea prior iste affectus, ut ad inferiorem sanitatis corporeæ gradum deducatur necesse est: Ad quem sanè finem utilis cibus potioque infirmissima; utilis itidem aër humidus. Mens interim à studio eodem hujusce rei pervicaci avocanda est, quam tam obstinatâ antè vehementiâ amplexata fuerat. Quod quidem vix fieri potest sine variarum voluptatum irritamentis, perinde
atque

atque dolorum acerbitate. Remedijs verò posteriori sunt, quæcunque vim menti addunt, ipsamque acuunt. Qualia sunt corporis exercitatio per siccum purumque aërem, temporumque sæpe inedia congruentium interpositio; talisque per omnia regiminis observatio, quale ad corpus attenuandum conducatur; neque vitiosis humoribus procreandis inserviat, qui crassi segnēve aut inertes minimè latices corporis circumfluos onerent, neque mentem exinde prægravent.

F I N I S.







1

1

1

1. The first part of the document discusses the importance of maintaining accurate records of all transactions and activities. It emphasizes that proper record-keeping is essential for transparency and accountability, particularly in financial matters. The text suggests that organizations should implement robust systems to track every aspect of their operations, from procurement to sales, to ensure that all data is captured and stored securely.

2. The second part of the document addresses the challenges of data management in a rapidly changing environment. It highlights the need for flexible and scalable solutions that can adapt to new technologies and evolving business requirements. The author argues that organizations must invest in training and development to ensure that their staff are equipped with the skills necessary to manage complex data sets effectively. Additionally, the text stresses the importance of regular audits and reviews to identify potential vulnerabilities and areas for improvement.

3. The third part of the document focuses on the role of technology in enhancing operational efficiency. It explores various digital tools and platforms that can streamline processes, reduce errors, and improve communication. The author notes that while technology offers significant benefits, it also presents challenges, such as data security and integration with existing systems. Therefore, organizations must carefully evaluate their options and implement a balanced approach that maximizes the advantages of technology while mitigating its risks.

4. The fourth part of the document discusses the importance of collaboration and teamwork in achieving organizational goals. It argues that no single department or individual can succeed in isolation; instead, success is achieved through the collective effort of all team members. The text provides practical advice on how to foster a collaborative culture, including encouraging open communication, sharing resources, and recognizing the contributions of all team members. It also emphasizes the need for clear roles and responsibilities to ensure that everyone is working towards the same objectives.

5. The fifth part of the document concludes by summarizing the key points discussed and offering final thoughts on the future of the organization. The author reiterates the importance of continuous improvement and innovation, suggesting that organizations should always be looking for ways to enhance their performance and stay ahead of the competition. The text ends with a call to action, urging all stakeholders to work together to achieve the organization's vision and mission.

177

178

1

2

3

